

**NINTH MIZORAM LEGISLATIVE ASSEMBLY  
(SECOND SESSION CUM BUDGET SESSION)**

**LIST OF BUSINESS**

FOR TENTH SITTING ON TUESDAY, THE 5<sup>th</sup> MARCH, 2024  
(Time 10:30 A.M to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**FINANCIAL BUSINESS**

2. **GENERAL DISCUSSION** on the Budget for the year 2024-2025 (to be concluded)

VANLALTHANTLINGI  
Commissioner & Secretary

\*\*\*\*\*

**HON. SPEAKER** : “*A ram leh a felna chu zawng hmasa zâwk rawh u; tichuan, chûng zawng zawng chu a pêk belhchhah dâwn che u nia.*”

-Mathaia 6:33

Vawiinah kan Member zahawm tak Pu Lalthansanga kan zingah damlohna avangin a tel thei dawn lo a ni tih House ka hriattir e.

**QUESTIONS & ANSWERS:**

Zahna leh Chhanna ah kan kal nghal anga, *Starred Question No. 141-na zawt turin* Siaha Bialtu Member zahawm tak Dr. K. Beichhua i lo sawm ang.

*Starred Question No. 141 - Siaha DIET chungchang.*

**DR. K. BEICHHUA** : Pu Speaker, ka lawm e. School Education Department changtu Member zahawm tak hnena ka zawhna chu –

- a) Siaha DIET Lecturer post ruak hnawhkhah tumna a awm em?
- b) Siaha DIET Hostel sak mek November 2023 thlenga hna pawh sei sak a ni em? A nih chuan eng vang nge? t ih ka zawhna a ni e.

**HON. SPEAKER** : Chhang turin School Education Department changtu Minister zahawm tak Dr. Vanlalhlana ilo sawm ang.

**DR. VANLALTHLANA, HON. MINISTER:** Pu Speaker, Dr. K. Beichhua, Siaha Bialtu zawhna chhanna chu hengte hi a ni e -

- a) DIET Lecturer post ruak 32 hnawhkhat turin hmalak mek a ni a, DP&AR (ARW) phalna dil mek a ni.
- b) Siaha DIET Hostel sak mek November 2023 thlenga hna pawh sei chu, pawh sei belh a ni lo.

**HON. SPEAKER** : *Zawhbelhna - Zawhna neitu Dr. K. Beichhua.*

**DR. K. BEICHHUA** : Pu Speaker, ka zawhbelhna chu - Siaha DIET Lecturer post hi 18 tur a ni a, chutah chuan 12 dah an ni. 12 zinga mi pahnihte chu Aizawl lama attached an ni a, hei hi ngaihthah vang nge? tih kha ka zawhna ni se. Vawiina kan Minister zahawm takin 32 lak belh tura hmalakna kal mek a tih zingah khan rawn dah belh ve turah ngai ta ila. 2 Aizawl-a attached-te tal hi chu min rawn dah let sak thei lo maw?

Tin, Hostel sak chungchangah Ni 23<sup>rd</sup> August, 2023-a ka zawhna Starred Question No.228 chhanna ah khan, ‘November, 2023 thleng pawhsei a ni’ tih a ni a. Vawiin ni thleng hian a thawktute khawng an awm tih pawh hriat lovin, a building sak pawh 60%

vel chauh physical achievement la awm a ni. Saw saw rang deuh hleka hma la turin ka ngen a, chu chu ‘a theih ang em’ tih kha ka zawhbelhna a ni bawka a.

Tin, chubakah a building hrim hrimah a vertical extension pawh 70% vel chauh zawh a ni a, saw pawh saw chhonzawm lohin vawiin ni thlengin a awm avangin, saw saw ‘hma min laksak thei ang em’ tih ka zawhbelhna bawka a.

Tin, Pu Speaker, Samagra hnuiaia Higher Secondary Lecturer leh High School Teacher te hi an dinhmun a chhe viauin ka hria a. An hlawh a tlem em em a, quarterly-a pek an la ni zui a; annual increment hi an nei lova, medical reimbursement an claim thei lo bawka a. Amaherawh chu, professional tax te an pe ve vek lawi si a. Hengte hamthatna tur hian kalphung thar hian hamthatna siam a tum em?

Tin, Pu Speaker, Siaha College hi 2010 ah khan science stream neih theihna tura gazette a ni tawh a, vawiin ni thleng hian kan la nei lova. Tunah chuan feeder kan nei tha tawh a, hei hi kalphung tharah hian hma min lak sak thei ang em; a bik takin - Science, Commerce leh Geography stream tura tan? Pu Speaker, ka lawm e.

**HON. SPEAKER** : *Zawhbelhna* - Pu T. Lalhlimpuia, Lunglei West bialtu.

**PU T. LALHLIMPUIA** : Pu Speaker, ka lawm e. Hon. Minister, School Education Department-in min chhan atana ka zawhna chu –

Sawrkar hmasate khan Education Department ah hian thil tih lian deuh deuh kha an nei thin a, chutah chuan, school timing sawn te, uniform pakhat hman te kha a ni a. Hei, ‘kuminah hian school uniform hi thlak a ni dawn em, sawrkar tharah hian?’ tih zawhna tam tak a awm a. Chu chu kan Education Minister chhan atan, ‘School uniform hi thlak a ni dawn em?’ tih kha ka zawt a; a chhan chu – “School uniform thlak leh tur hian nghawng nasa tak a nei dawn a, school te pawh inbuatsaih a ngai dawn a, tin, chhungkua inbuatsaih a ngai bawka a. Chunga hma lak a nih dawn chuan, hmalak hma hi a tul hle dawnin a lang a. Chuvang chuan, ‘School uniform hi thlak a ni dawn em’ tih kha ka zawhbelh a ni e. Ka lawm e, Pu Speaker.

**HON. SPEAKER** : *Zawhbelhna* - Serlui Bialtu Member zahawm tak Pu Lalrinsanga Ralte ilo sawm ang.

**PU LALRINSANGA RALTE:** Pu Speaker, ka lawm e. Education Minister-in min chhan atana ka *Zawhbelhna* chu –

i) SAMAGRA zirtirtu CSS hi dah ngheh tumna a awm em?

ii) Sawrkar hmasain school eng emaw zat lump-sum grant-in-aid ah te, Ad hoc grant-in-aid ah te leh school thenkhat a provincialize te hi engtikah nge function tir a tum?

**HON. SPEAKER** : *Zawhbelhna* - Champhai South Bialtu, Member zahawm tak Lt. Col. Lalhmingthanga.

**LT. COL. CLEMENT LALHMINGTHANGA:** Pu Speaker, Pu Speaker, School Education Department changtu Minister zahawm tak hnena ka zawhbelhna chu hei hi a ni –

Ram pumah teachers:student ratio hi a inmil lo lutuk a, a thenah teachers indaih lohna sang tak a awm a. Hengte leh, a thenah pheih chuan student awm zat phu loha teachers tam zawkna te a awm nia hriat a ni a. Heng zawng zawng problem solve tur hian rationalization hi engtianga tunah hian kalpui mek tawh nge?

**HON. SPEAKER** : A theih ang anga chhang turin (*interruption....*)

**PU K. HRAHMO** : Pu Speaker, *point of clarification* – hei. House ah ni 4-5 kan lo thu ve tawh a, Starred Question MLA zahawm tak teina an siam leh Supplementary Question in relate lo lutuk hi a tamin ka hria a. Hei hi chu, i thuneihna hmang la, concerned minister hnenah chhang lo tawp turin order pe mai la; i thuneihna a ni a. Hetah DIET Siaha chungchang kan zawh mek lain khulamah 10+2 te, helamah primary teacher indaihlo chungchang te a ni a, a minister tan chhan a har lutuk. I thuneihna a ni a, khatiang in relate lo lutuk kha chu chhang lo turin ti tawp mai la, a tha lawm ni ka ti.

**HON. SPEAKER** : Kan Palak Bialtu member zahawm tak sawi kha a valid khawp mai a. Nimin khan ngenna ka siam a, GAD changtuin a chhan dawn khan; kan question tak kha ka chiang lutuk ta lova, Aviation lampang kha a ni a. Zawhbelhna-ah khan aviation/airport lampangah khan kan cheng a, lawmthu ka sawi nghe nghe a ni. Supplementary question zawttu pathumte khan khami Aviation/Airport leh Air service chungchang hlir kha an zawt a, a lawmawm ka ti nghe nghe a. Tuna kan Palak bialtu zahawm takin a rawn sawi kha thil awm tak a ni. A chhan chu - a changtu minister te kha Starred Question chhang turin an rawn inring a, an department chan tih avanga a kilkhawr tak tak, dictionary an ni ta emaw tih tur ang ziazanga kan duh lai lai zau lutuk kan han khawrh ta thin hi chu a zia lo deuh thin a.

Member ten zalenna kan nei a, kan inzawt thei a, kan inzawt a ni mai a; amaherawhchu, Member zahawm tak Palak Bialtu ngenna kha ngai pawimawh hram hram thei ila A theih hram chuan Starred Question-ah khan chen tum ila, a department tho ah a hnu lama zawhna hun te pawh a la awm tho turah ngai ila. Tin, nakinah Demand sawi hunah te pawh kan la sawi theiin, duhtawka sawina hun la awm turah ngai ila. Chuvang chuan,

*Zawhna & Chhanna* hunah hi chuan Starred Question ah hian chen hram hram tum ila, zawm hram hram kan tum dawn nia.

Aw le, a theih ang anga chhang turin, School Education Minister Dr. Vanlalthlana ilo sawm ang.

**DR. VANLALTHLANA, HON. MINISTER:** Pu Speaker, ka lawm e. Dr. K. Beichhua, Siaha Bialtu ina a rawn zawhna, DIET zirtirtu chungchang kha - DIET zirtirtute kan indaih lo khawp mai a, a then laiah erawh chuan kan lo tam deuh niin a hriat a; hemi chungchang pawh hi ngaihtuah a ni a. Amaherawhchu, kan han sawikhawm danah khan a thenin ‘transfer ngheh ka ni’ an inti a, a thenin ‘attached’ an intih bawrah thil buaithlak deuh hlek a awm a. Hmanni ah pawh order kan tichhuak a, order tihchhuah sa pawh cancel a ngai leh hial a; chumi chungchang chu tunah hian chinfel mek a ni a.

Tin, seniority list pawh peihfel a ni tawh a, ‘Principal te, engtiang angin nge kan insiam rem ang’ tih te ngaihtuah a ni a. Chumi a nih chuan kan indaihlo lutuk hi chu (zirtirtu 32 kan dil belh nen hian) sawrkarin min pek chuan kan inpe thei mai turah ka han ngai a.

‘Aizawl-a attach te lak let theih an ni ang em?’ tih kha, nichina ka sawi ang khan, kan in attach dan kha, *transfer* nge *attach* tih kha chiang taka enfel ngai thil a awm a, chu chu kan enfel mek a ni.

Tin, DIET Hostel Siaha hi extension te an rawn dil leh a, kei ngei pawh ka zinchhuah hmasak berah Siaha leh Lawngtlai-a DIET hmun leh a sak te ena va kal tum ka ni a, Council of Ministers te koh thut a nih avangin, Siaha ka thleng phei thei ta lova. Lawngtlai erawh ka tlawh a, a lungawithlak loh khawp mai; keimah ngei a hmunah ka va kal a. Lawngtlai lam pawh thil buaithlak hrang hrang a awm a, COVID te chhuanlam a ni a, amaherawhchu back date-in extension an rawn dil leh a, hei chu department lampangin ‘a theih tawh lova’, kan ti a.

Tin, Siaha DIET chungchangah hian, tunah hian sa zo tawh tura tih an nih laiin a chhuat phah tile ang chi kha engmah phah a la ni lova. Tin, side drain te, septic tank te, railing te, underground water tank te siam a la ni lova; khatiang khan vertical extension ah pawh hian rawng la hnawih a la ni lova. Tin, chung lam pang, a chhung lampang pawh zawh a la ni chiah lova; Mipa zun in te, a kawngka leh a tukverh te pawh vuah a la ni lova; hei hi chu kan lo enfel vat ang.

Lawngtlai lamah pawh kan va kal a, ka haw hnua contractor te pawh tum hnih lai koin, kan innawr viau tawh a. A bak chu, kan tih theih a awm a nih chuan, Dan lampangah kan luh mai pawh a ngaih hmel e.

Tichuan, Samagra chungchang a rawn zawhna kha - zirtirtu hlawh hi hei vawiinah hian hei Finance lampangin min rawn pek chuan kan inpek theih kan beisei a, December thla thleng kan pe tawh a, January leh February hi eng chen nge kan pek theih ang? Vawikhatah vaibelchhe 24 chuang hi a chhuak a Chutiang chuan, State-ina min rawn pek, an rawn release atang hian keinin kan lo sem leh thin a, hlawh pawh inpek leh thuai kan tum a ni. Quarterly ang em em chuan kalpui lo ila, a theih ang anga um kan ti a ni.

Tichuan, ‘hamthatna siam tum a ni em’ tihah hian, tunah rih chuan siam tumna a awm lo. Amaherawhchu, sorkar thar hian Mizoram Education Reforms Committee a din a, chumi te chuan an ngaihtuah ang a, a tha an tih chuan sawrkarah rawtna an thlen ang a, a thaa pawmtlak a nih chuan, chutiang chuan hmalak a ni ang.

Pu T.Lalhlimpuia, he House zahawm taka kan Member, Lunglei West bialtuin sorkar hmasain school timing a tidanglam a, a uniform te a tidanglam a, engtia hmalak tum nge? tih danglam tumna a awm em, tih a rawn zawhna hi – Nichina ka sawi ang khan Education Reforms Committee kan nei a, anni kutah hian dah tur a ni a. Uniform chungchang phei chu, School zirtirtu Association ho an rawn kal thliah thliah a, “Uniform chungchang hi rawn kan ni ti a sawi ni thin mah se la a rawng min thlan tir a, kan duh leh duh loh chungchang hi chu min zawt lem lo a ni” tih a ni a. Chuvang chuan hemi chungchang pawh hi ngun taka ngaihtuah a ngai a, sorkar hmasa policy a ni a, a lo la tha a nih chuan kan chhonzawm ang a, a remchang lem lo a nih chuan tih danglam a ni ang. School timing pawh Reforms Committee kutah hian dah a ni dawn a ni.

Tin, Pu Lalrinsanga Ralte Serlui Bialtu ina upgradation chungchang a zawhna hi, sawi tur a tam khawp mai a, a chhah khawp mai a. A hmasa zawkah hian Samagra CSS chungchang a rawn zawt a. Zawhna kha a rawn awm nual a, kar leh lamah a rawn chhuak a nih chuan awlsam deuh zawkin kan chhang thei turah ngai ila. Eng pawh ni se la, Pu Speaker, Samagra CSS chungchang hi kan ngaihtuah lek lek hman a, Council of Ministers meeting ah agenda-ah te pawh CSS hnuaia awm chungchang pawh ngaihtuah a ni a. Amaherawhchu, ngaihtuah that leh atana tih a ni a, tah hian Samagra te pawh hi telh tur a ngaih a ni.

Tin, a zawhna pahnihna - Upgradation chungchang hi, nikum kum tawp inthlan dawn hnaih tea school eng emaw zah an han dah san thut chungchangah khan zawhna kan dawng hnem khawp mai a. Hetah hian sawrkar hmasaina Council of Ministers meeting ina notification a chhuah kha cancel a la ni lova, budget ah pawh hian upgradation kha dah tel a la ni a. Chutiang chuan, sawrkar hmasaina hmalakna a neih te kan endik a. Amaherawhchu, Pu Speaker, sawrkar hmasain notification a tihchhuah hma lawka Education Department hnuaia, Council of Minister hma lawka Education Deptt-ina notification an tihchhuah September ni 22 ah khan, School provincialize dan tur te, Grant-in-aid dan tur te, Lump-sum a dah dan tur te, chi hrang hrang ruahmanna a rawn siam a, khatah khan – ‘School hian building a nei tur a ni’ tih te a awm a. School tuna

kan upgrade tur te, provincialize tur te, lump-sum ah dah tur te khatiang chi hrang hranga kha, a nih dan turin a ni em; School te hian building an lo nei tak tak em, tih en fel ve kan duh a. Tunah hian, “lo la ti hrih lo lawk rawh u; zirtirtu DEO ina DPC kaltlang a an lak tur pawh lo ti hrih lo rawh u” tiin Chief Minister hriatpuinain tunah kan han dah tha hrih a. Amaherawhchu, sawi ang khan budget ah erawh chuan ruahmanna kan nei vek a, a dik leh a felfai chu kan kaltlang pui mai pawh ka beisei a, Council of Ministers meeting-ah ngaihtuah leh tura tih a ni dawn a.

Tin, Pu Speaker, notification pakhat chhuahah hian, *lump sum aided* a kan hlankai tura hi notification-ah hian tihsual palh a lo awm hlauh mai a, chu chu a vai mai khan Higher Secondary School rate khan rawn tih vek a ni mai a. Hei hi sawrkar hmasa khan siamtha duh sela chu, siam thatna hun an ngah a, an tum lutuk lo nge ni; inthlan dawn hnaiha an tihpuat avang khan inthlan mode-ah an lut ta lutuk a, siamthat a la ni lova, tun hnai te ah kan han hmuchhuak a; notification siamthat a nih loh chuan hman theih pawh a ni chiah lova. Amaherawhchu, hun tlemte kan la nei a; April ni 1, 2024 a hman tan tur tih a nih avangin hei te pawh hi kan lo enfel ang a. Sawi ang khan school ho hi eng ang chiah nge an niha, kan rules neih anga kal theih te a ni em; heng ho hian dan angin Rules neih te an paltrang thei em, tih kan en leh mek a ni.

Tin, zawhna palina rawn zawttu Pu Col. Lalhmingthanga, Champhai South Bialtuin, “ram puma teacher:pupil ratio a then a inang lo sung mai a; engtin nge hmalak a nih?” tiin a rawn zawt a, ‘rationalisation’ a ni ber a, a saptawng tak chuan. Tunah hian *Transfer and Posting Rules* siam thar tum a ni a, a rules neih chauh ni lovin, a taka hman kan tum a ni. Tuna transfer and posting rules-ah hian a hmun nuam deuhhleik, a khawpui lampang deuh ‘A’ a ni a; a harsa, a kilkhawr chu ‘D’, chutiang zelin A, B, C, D in dah a ni a, chu chu kan lo neih tawh tlem tidanglama a thar siam tum a ni a, rationalisation hi kalpui tum a ni a. School thenkhatah zirtirtu 12-13 nei an awm lain school thenkhatah pakhat chauh te an nei a, tunah hian order kan inpe tawh a, kan sorkar kumkhatna atang hian ‘single-teacher school hi a bo vek tur a ni’ kan ti a hma kan la mek a. 66 lo awm kha kan rationalise a, single-teacher school - zirtirtu pakhat chauh nei school hi tihtawp kan duh a, 60 chuangah hian zirtirtu pakhat tal dah belh dan i ngaihtuah ang kan ti a, tunah hian department lama kan hotute’n hma an la mek a, chuatiang chuan hmalak a ni a.

Ram pumah hian zirtirtu kan indaih lo nasa em em a, nakinah demand sawi hunah te pawh sawi a la rem ang a, hemi tur hian beng sikin ngaihtuahna kan seng a ni. Ka lawm e.

**HON. SPEAKER** : Starred Question No. 142 - zawt turin Champhai North Bialtu Member zahawm tak Pu H. Ginzalala ilo sawm ang.

*Starred Question No. 142 - Lirthei intlan chhawk chungchang.*

**PU H. GINZALALA** : Pu Speaker, ka lawm e. Hon. Minister, Transport Deptt. changtuin min chhan atan ka zawhnate chu hengte hi an ni e –

- a) Lirthei intlanchhawk avangin lirthei a pun chak phah em?
- b) Lirthei intlanchhawk kan hman hma leh kan hman hnua lirthei kum tina a pun dan min hrilh thei em?
- c) Lirthei intlanchhawk avanga ni tina tlan lo (ding) engzat nge awm?
- d) Aizawl khawpui chhunga motor intlanchhawk hian kan ram economy-ah a tha lo zawnga nghawng (adverse/negative impact) a siam hi zirchianna a awm tawh em? A la awm loh chuan, sawrkarin zirchian tul a ti em? tih a ni e.

Pu Speaker, ka lawm e.

**HON. SPEAKER** : A chhang turin Transport Deptt. changtu Minister Pu Vanlalhlana i lo sawm ang.

**PU VANLALHLANA, HON. MINISTER:** Pu Speaker, Member zahawm tak Pu H. Ginzalala, Champhai North Bialtu zawhna chhanna chu hetiang hi a ni e –

- a) Lirthei intlan chhawk vangin lirthei a pun chak phah em tih chungchang hi Transport Deptt. in zirchianna a la nei ngai lo.
- b) Lirthei intlanchhawk kan hman hma leh hman hnu (kum 6 chhung) data a hnuaiah hian tarlan a ni e. Heng data te hi Transport Deptt. hnuaia VAHAN data base atanga lakchhuah a ni e.

<b>Period</b>	<b>Nos. of registered vehicles</b>
2011 – 2012	9,435
2012 – 2013	9,952
2013 – 2014	10,517
2014 – 2015	9,247
2015 – 2016	9,445
2016 – 2017	11,820
<b>TOTAL</b>	<b>60,416</b>

Tichuan, kum 6 chhung hian motor (lirthei) 60416 registered an ni a, a hnu kum 6 chhung, 2017 – 2023 inkarah hian vehicle 12,6697 registered a ni.

- c) Lirthei intlanchhawk hi Aizawl Municipal Corporation Area-ah chauh hman a ni a. Aizawl hi Mizoram khawpui ber a nih angin, Aizawl lirthei chauh pawh ni lo, Mizoram hmun hrang hrang atangin lirthei lut leh chhuak a inpawlhsawp nasa em em a. Chuvangin, intlanchhawk avanga ni tina lirthei ding zat hi chu sawi mai theih a ni lo.
- d) Transport Deptt. atang hian chuan hetiang lam hi zirchianna a la awm lova, tun dinhmunah zirchiangtu tur pawh ruat a la ni lo.



**HON. SPEAKER** : *Zawhbelhna* - Zawhna neitu Pu H. Ginzalala.

**PU H. GINZALALA** : Pu Speaker, ka lawm e. Motor intlanchhawk avang hian motor hi a pungchak hle a ni tih hi hriat a ni a, a zat chiah erawhchu sawi thiam a har khawp mai a. Ka zawh hmian Pu Speaker, sawi zau a ngai a, he thil hi; member-te pawhin min lo hrethiam sela. Tin, Motor thar hi kan lei nasa em em mai a, motor thar kan lei avanga Mizo mipuite hian sum tam tak kan senral hi a nasa khawpin ka ring a. Chuvangin, intlanchhawk avangin sum leh pai leh thil dang dangah pawh harsatna kan tawh phah hle dawnah kan ngai a.

Tin, heng motor dingte hi Hon. Minister-in a sawi ang khan a zat chiah chu kan sawi thei lova. Amaherawhchu, idle-a a ding hrim hrim hi economy-ah chuan tangkaina nei lo a lo ni a. Motor pakhat ni tina a din si kha chuan, motor tin zelah khan sum tam tak kan lost tihna a lo ni a, kum tam takah phei chuan sum tam tak kan lost dawn tihna a ni. Khalai kha kan zirchian loh avangin sawi thiam a har deuh a. Tin, motor pun chak avangin insurance lam te hi pek a lo ngai a, sum tam tak khatah pawh khan a luangral a ni.

Tin, a dawt leha ka sawi duh chu, motor pung zel hian traffic mai ni lovin, parking problem a siam nasa em em mai a ni.

Tin, a dawt lehah chuan intlanchhawk hi a nihna takah chuan temporary solution mai niin kei chuan ka ngai deuh a, permanent solution chiah pawh a ni lova. *Entirnan*: motor kan intlanchhawk hmian motor hi singkhat lo awm ta sela, kan intlanchhawk hnuah sangthum lo ding ta se, sangsarih a tlan dawn tihna a ni. Amaherawhchu, motor a pun phah miau avang khan sangthum a recover hun chhung kha a awm leh mai a, singkhat kha a rawn tling thuai mai a ni. Chuvangin, temporary solution mai mai niin ka hria a. Tunah hian kan intlanchhawk avang hian motor hi a pung em em tawh a, hei hi tunah hian a vaia tlan ti dawn pawh ni ila, traffic problem nasa lutuk chu min siamsak dawn a, 'i tlan tir leh ang u' tih pawh ka rawt ngam chuang lo a ni. Amaherawhchu, hei hi zirchian ngai deuh niin ka hria a; kan economy-ah hian nghawng nasa lutuk a neih avangin hei hi member-te pawh hian kan ngaihtuahnaah dah ila thain ka hria a.

Thil pakhat pawimawh deuh ta chu, kan traffic jam chhan hi chuti lutukin a tam lem lo a ni. Kawng kual lai deuh leh pengthuam lai deuh te, a thenah phei chuan ft 2 - 3 lek te pawh a ni; han zauh hlek ila motor jam kha a awm lo mai dawn a ni a. Junction hi land acquisition zawng te pawha han tiha khatianga hmalaka improvement a tih theih kha chuan, intlanchhawk ngai lovin a kal theih dan hi awmin ka hria a. Motor hrim hrim hi chu natural growth a awm hrim hrim a, a punna hi. Chuvangin (**Hon. Speaker**: Zawhnaah khan lut tawh la aw). Aw le, Pu Speaker, ka zawhnaah ka lut tep e.

Chu chu a nih avangin, ngaihtuahna zau tak neiin Member dangte pawh hian zawhna kan siam ka han beisei deuh a. Ka zawhna chu –

“Motor intlanchhawk hi kalpui zel chi a ni em?” tih a ni. Pu Speaker, ka lawm e.

**HON. SPEAKER** : *Zawhbelhna* - Pu Lalchhuanthanga, Aizawl South-II Bialtu.

**PU LALCHHUANTHANGA:** Ka zawhna, Starred Question 153 hi ka zawt hman dawnin ka hre lova; amaherawhchu, supplementary-ah hian zawt mai ila a tha awm e. Tin, zawhna pangngai nen pawh khan a in relevant riauin ka hria a.

“Mizoram chhungah Transport Bus engzat nge awm? Khawi route-ah te nge an tlan?” tih a ni e.

**HON. SPEAKER** : *Zawhbelhna* zawt turin Pu Lalmuanpuia Punte, Hrangturzo Bialtu ilo sawm ang.

**PU LALMUANPUIA PUNTE:** Pu Speaker, ka zawhbelhna chu –

- i) “District tharah hian DTO dah thuai tumna a awm em?” tih leh,
- ii) Tuna motor pun chak dan a rawn chhanna kha, Mizoram pum nge Aizawl khawpui chauh?
- iii) Mootor intlanchhawk chungchang hi sawi a tam em em mai a, a department-in chhut chianna an la neih vak loh thu kha a sawi bawk a. Awl tea chhut dan chu - ABC in dawtin motor number kan pe ta a, alphabet A-Z ah hian letter 26 a awm a. Tichuan, motor registration series pakhtah ringawt khan 9999 digit li a awm thei tihna a ni. Tichuan, 9996X26 = 2,59,974 a ni a. Amaherawhchu, ‘I’ hian number one a an deuh avang leh, ‘O’ in zero a an deuh avangin an pek kan a. Tichuan, 24 pek a lo ni ta a; 24 pek a lo nih chuan, MZ-01 ringawt pawh motor 2,39,976 tihna a lo ni ta a. ABC tel lo MZ-01 ringawt a la nih lai khan 9999 tho a awm a, chumi belh leh chuan 2,49,975 a lo ni ta a. Tichuan, tuna intlanchhawk danah hian nitin number ending pahnih - Monday-ah ending 1 leh 2, Tuesday-ah ending 3 leh 4, Wednesday-ah ending 5 leh 6, tikhan a chho ta zel a. Tichuan, nikhata pahnih zel an off khan motor 29,997 vel a lo ni ta tihna a ni. Chung zawng zawng chu an lo off ta thup a; chung zawng zawng chu Aizawl khawpui ah hian nikhatah han tlan belh dawn ta se engtinng e ni ang? Chu chu ka zawhbelhna a ni e.

**HON. SPEAKER** : *Zawhbelhna* - Aizawl West-I Bialtu, Pu TBC Lalvenchhunga ilo sawm ang.

**PU TBC. LALVENCHHUNGA:** Pu Speaker, ka lawm e. Transport Deptt. changtu minister hnena ka zawhbelhna chu -

- i) Lirthei intlanchhawkah hian keini Aizawl West-I bial te hi khawpui leh thingtlang inchawhpawlh kan nih rualin, a khawpui area pawh hi traffic jam awm lohna lai kan la ni ve rih a. NGO hrang hrang leh khawtlang hruaitute pawhin ngenna te kan lo thlen tawh a traffic lamah pawh. Hei hi vawiinah hian Aizawl West-I huam chung bikah khuan lirthei intlan chhawk hian min huam loh tir theih dan a awm em?
- ii) Rural Area kan nih tel avangin Auto-rickshow service kan neih Sairang – Sihmui-a mite transportation problem a awm ve avangin leh, khulai Company-peng petrol pump bul thleng khu tlan theihna dan min siamsak thei ang em; AMC huam chung tawiteah khuan? Ka lawm e.

**HON. SPEAKER** : A theih ang anga chhang turin Transport Deptt. changtu Minister Pu Vanlalhlana ilo sawm ang.

**PU VANLALHLANA, HON. MINISTER:** Pu Speaker, Pu Ginzalala zawhna - ‘Motor intlanchhawk hi kalpui zel chi a ni em?’ tih kha, Motor intlanchhawk hi Transport lam atanga initiate a ni lova, motor-inkalchhawk lo irhchhuahna kha chu, Co-ordination Committee on Traffic Management-ina a siam a ni a. Chuvangin, Co-ordination Committee on Traffic Management hian a ngaihtuah a tidanglam a duh anih chuan, a tidanglam theitu tur laia chu a ni awm e.

Pu Chhuana zawhna - MST Bus Service chungchang kha chu, tun dinhmunah chuan Mizoram chungah MST Bus hi kawng 9-ah service tir mek a ni a, Aizawl - Lunglei te, Aizawl - Khuangthing, Aizawl - Marpara, Aizawl - Mimbung, Aizawl - North Hlimen, Aizawl - Rajivnagar, Aizawl - Phuldungsei, Siaha – Chakhei te bakah, Lunglei Town Bus-ah pahnih MST Bus hi a service mek bawk a ni.

Tin, Pu Lalmuanpuia, MLA zawhawm tak zawhna - ‘DTO Office hawn tumna a awm em?’ tih kha - District-ah hian kan nei kim a. DTO Office hi tuna district thar pathum kan neih belhah hian department hotute’n theihtawpin tan an la a’ District thar pathum - Saitual, Hnahthial leh Khawzawl-ah hian DTO Office hi hawn tum a ni a, DP&AR leh Finance lamte pawhin clearance min pe tawh a. Amaherawhchu, MVI leh staff thenkhat kha lak tur a ni a, chutianga Recruitment Rules kan tihfel hnuah chuan heng district pathumah hian DTO Office hawn kan tum a ni.

Tin, Aizawl West-I Bialtu zahawm tak zawhna – ‘Intlanchhawk hi traffic jam awm lohna laiah chuan min phalsak thei lawm ni’ tih kha a ni a. Kha pawh kha nichina ka sawi ang khan, he intlanchhawk siam hi *Co-ordination Committee on Traffic Management* lampangin an hma anih avangin keiniin thui tak sawi theih kan nei lova. Amaherawhchu, a operation lai kha chu a dik hmel viauin ka hria a. Company-peng thlenga auto-rickshow khulaia service thinte an lo thlen ve kha chu, traffic jam awm lohna chinah chuan tangkai taka mipuite pawhin an chhawr theih tur niin alang a. Chuvangin, khang kha chu thil tihawm takah ka ngai e. Ka lawm e, Pu Speaker.

**HON. SPEAKER** : *Starred Question No. 143-ah kan kal ang a, zawhna zawt turin Tuichang bialtu zahawm tak Pu W. Chhuanawma ilo sawm ang.*

*Starred Question No. 143 - Ruihlo dona kawnga sawrkar hmalak dan chungchang.*

**PU W. CHHUANAWMA** : Pu Speaker, ka lawm e. Ka Starred Question No. 143 – Hon. Minister, Excise & Narcotics Deptt. chhan atan –  
“Ruihhlo dona kawngah hian sawrkarin eng chen nge hma a lak tawh? tih a ni e.

**HON. SPEAKER** : Chhang turin Excise & Narcotics changtu Minister Pu Lalnghinglova Hmar ilo sawm ang.

**PU LALNGHINGLOVA HMAR, HON. MINISTER:** Pu Speaker, ka chhanna chu hetiang hi a ni e -  
Ruihhlo dona Danpui kengkawhtu (Nodal Department), Excise & Narcotics Department thawktute chu fuih thar an ni. An hmanraw neih leh an thiamna/theihnate tangkai zawka hmang turin fuih an ni.

District tinah ruihhlo dotu bik tur Narcotic Cell tih changtlun bakah District thar pathum - Saitual, Khawzawl leh Hnahthial-ah te pawh Station din tura hma lak mek a ni.

Kohhran thalai hruaitute nen ruihhlo do ho dan tur sawiin inrawnkhawmna neih a ni. Hei hi 13<sup>th</sup> January khan a ni a, kan Chief Minister leh kan Social Welfare Minsiter ten min hmanpui a ni.

Central YMA Executive Committee nen ruihhlo do ho dan tur sawiin inkawmhona neih a ni, tih a ni a. 4<sup>th</sup> January khan Minister Officer Chamber-ah Central YMA OB-te nen kan inkawm a 15<sup>th</sup> February khan Central YMA Office-ah kan inkawm ho leh a ni.

Hnathawktu lak belh leh hmanruate thuan tha tura hma lak mek a ni.

Chak zawka ruihhlo do anih theihna turin Excise & Narcotics Deptt. hnathawkte transfer dan anga kalpui tura hma lak mek a ni a, hei hi kalpui tawh a ni nghe nghe a ni. ka lawm e, Pu Speaker.

**HON. SPEAKER** : *Zawhbelhna - Pu W. Chhuanawma, Tuichang Bialtu.*

**PU W. CHHUANAWMA** : Pu Speaker, ka lawm e. Kan hriat theuh angin kan ram hi ruihhloin a run nasa em em a, kohhran khawmpuiah meuh pawh ruihhlo do kum puante a lo ngai ta hial a ni. Chutiang chuan, kan bial Khawzawl pawh ruihhlovin min

run nasa em em a ni. Campaign lai khan thla thum ngawt mai Khawzawl khawpui chhung khi ka thutchilh a, in tin ka luhchhuah deuh vek a ni. Ka kala, an lo awm lova; ka kal nawn leh ta lo tih loh chu, khi khawpui chhung khi ka luhchhuah vek a. Chuta ka thil hmuh chuan ka rilru a ti hrehawm khawp mai; pasal sun an tam lutuk khi. Zu leh ruihhlo vangin fa tam tak la hring thei tur hmeithai an tam em em mai a, khi khian khi khawpui khi hliam na tak a tuar tir a ni. Pu Speaker, khi khawpui mawi leh ngaihawmtak khi chhan tlak a la awm a ni.

Tichuan, ka zawhbelhna chu - kan Excise Department hi khawngaih takin, station mai ni lo, department hi a rang thei ang berin min dahsak thei ang em? Nichin khan ka fiah chiah lova; Excise Department hnathawkte transfer kalpui tum hi ‘eng angin nge in kalpui dawn’ tih kha ka zawhbelhna pahnihna a ni e.

Tichuan, ka zawhbelhna pawimawh ber, ka ngaih pawimawh chu - Excise Department hi khawngaihtakin, ‘hmanhmawhtakin khitah khian min dahsak thei ang em?’ tih a ni e.

**HON. SPEAKER** : *Zawhbelhna - Pi Baryl Vanneihsangi, Aizawl South-III Bialtu.*

**PI BARYL VANNEIHSANGI:** Pu Speaker ka lawm e. Excise & Narcotics Department changtu Minister ka zawhbelhna hi tawitein sawifiah min phalsak la.

Hei, sawrkar hmasa te, hmasa leh te leh tun sawrkarah hian ruihhlo dona kawngah kan theihtawp kan chhuah tlang a, kan la chhuah zel dawn pawh niin a lang a. Tin, pawl hrang hrang, ‘*Foundation for Drug Free Mizoram*’ kan tih te, (a zawng zawng kan sawi seng lo ang a) chungte pawh chuan nasa takin hma an la mek zel a ni.

Hetih mek lai hian, Pu Speaker, ruihhlo avanga nunna chan te an pung zel a, ruihhlo ngaite pawh an pung zel a. Tin kan ramah ruihhlorawn tawhluttute man an ni a, man loh pawh hi tam tak an awmin ka ring; chung chu kan dinhmun hi a niin a lang a. Chuvang chuan, Minister zahawmtak ka zawhna chu, “Ruihhlo hi a hluar zual zel nge, a tlahniam hret em? Kan do kan ti a, theihtawp a sawrkar leh pawl hrang hrangina hma kan lak hian awmzia a nei em; a sawt tak tak em” tih hi ka zawhna a ni a. Kan dinhmun diktak hi hriatchian, mipuite leh he member-te hian kan phuin ka hria. Chuvang chuan, khawngaihinh fiah takin min hrilh thei se ka lawm hle ang.

**HON. SPEAKER** : *Zawhbelhna - Hachhek Bialtu, Member zahawm tak Pu Robert Romawia Royte ilo sawm ang.*

**PU ROBERT ROMAWIA ROYTE:** Pu Speaker, Excise & Narcotics Department Minister zahawm tak chhan atana ka zawhbelhna chu –

i) Hachhek bial chhung, Kanhmun khu tri-junction – Mizoram, Tripura leh Assam lam te inrina a ni a, bazar hmunpui te a ni a. Khulaiah khu ruihhlo check leh ruihhlo danna atan a pawimawh khawp mai a. Khulaia ruihhlo kan check tlat chuan Mizoram puma ruihhlo nasa taka rawn lut tur a tihhnam theihna pawh niin ka hria a. Excise Minister zahawm tak hian Hachhek bial chhunga Kanhmun khuaa Excise force te tichak turin ruahmanna a nei thei ang em? Nei tur pawhin ka han ngen nghal duh a.

ii) Chutiang tho chuan hei, ka bula thu Pu Lalrintluanga Sailo hian min rawn sawikep mai teh a ti a. West Phaileng leh Marpara te pawh a ni ang chu, Bangladesh leh Tripura te nen pawh an inri a. Helaiiah hian ramri area a ruihhlo lo lut veng tur hian West Phaileng leh a station pawimawh laiah hma min laksak thei ang em? Ka lawm e.

**HON. SPEAKER** : Aw le; a chhang turin Excise & Narcotics Department changtu Minister Pu Lalnghinglova Hmar ilo sawm ang.

**PU LALNGHINGLOVA HMAR, HON. MINISTER:** Pu Speaker, Khawzawl chungchang bik kha han sawi ta ila. Nichina sawi tawh ang khan Pu Speaker, Khawzawl mai ni lo, kan district hawn thar dang Saitual leh Hnahtial te khian Excise hmunpui kan neih theihna turin hmalak mek a ni a, sawrkar sum indaihlohna avangin kan duh angin kan che chak thei lova. Chuti chung chuan February thlaa kan meeting ah khan a hmunhma te pawh en thlithlai tan ila kan ti a. ‘Chutianga bul kan tan phawt loh chuan’ tiin tunah hian hmalak chhoh mek a ni a, a theih ang angin hma kan la chho dawn a ni.

Khawzawl bik hi kan han tlawh tum khan an harsatna te kan ngaithla a, ruihhlo avangin an buai hle a ni tih hi kan hria a ni. Chuvang chuan, Pu Speaker, Khawzawl chang ni lovin heng district thar dang pahnihte pawh huam telin sawrkarin sum a neih hunah a remchan angin hma kan la zel dawn a ni.

Nichin khan, ni e, transfer chungchang kha ka han sawi deuh zawk a. Transfer hi tunah hian kalpui mek a ni a, nimin, March Ni 4 khan tihchhuah a ni nghe nghe a; Excise hnathawktu mi 80 lai mai transfer an ni a. An bulah pawh kan sawi chu, “Minister-in a transfer lo che u a, Commissioner leh midang pawhin an transfer lo che u a; in danin a transfer che u a ni,” kan ti a ni. A chhan chu, ruihhlo a ni emaw, zu leh thil dang emaw pawh man tur chuan, kan man turte nen kan inhnaih viau tawha, hmun khata kan awm rei viau tawh hi a tha ber lovin kan hria a.

Tichuan, kan Excise Manual-a a inziah angin, a inziak sa ang khan transfer hi kan kalpui mai a ni a. Chutah chuan, Inspector hi district khatah kum 5 aia tam awm lo tura tih a ni a; sub-station khatah hian kum 2 aia tam awm lo tura tih a ni a; SI hi kum 3 chin a ni a. Amaherawhchu, a inziah danah tak chuan, ‘*for special reasons* ah kum 4 a awm thei ang’ tih a ni a. ASI leh a hnuailamte hi kum 5 aia rei hmun khata awm lo tura tih an ni a; chu aia rei an awm dawn a nih chuan, a dan ah pheih chuan, ‘*special cases for reasons*

*to be recorded in writing*' an ti kher a ni. An awm rei chhan te pawh ziaka tih tur a ni, Manual-a a inziah dan chuan.

Chutiang diak diak chuan kalpui theih vek a ni lo nanging, 'hmun ngaia kan awm rei lutuk hi a tha lo e' tiin zawi zawiin kan han insiksawi mek a ni a. Hei, ram rawng kan bawlpui kan Minister-te leh kan MLA-te pawh hian rawn sawipui duh te pawh an nei a. Amaherawhchu, Dan angin kan ti phawt dawn, tun tum chu; Minister-in mipakhat pawh a sawipui dawn lova. Chuvang chuan, a dan ang hian kalpui phawt ila, 'a remchang angin kan la insiksawi ang' kan ti a. A then kohhran hruaitu, a then YMA hruaitute leh khawtlang a mipawimawh te an ni a. Chutah chuan, kan lo chhanna chu - "An nihna hmasa ber chu Excise mi leh sa an ni phawt a. Chuvang chuan, an transfer-na hmunah pawh kohhran leh khawtlangah mitangkai tak an ni tho ang. Lo dawh phawt ula, a dan angin kan han ti phawt ang e," tiin transfer hi kan han kalpui a ni.

Hei hian Excise mi leh sa te kha 'kan ringhlel a, kan transfer e' tihna ni lovin, hmun khata kan awm rei lutuk hian kan thatho dan te, kan tan lakdan te, (nichina sawi ang khan) kan mi man turte nena kan inhmelhriat hnaih lutuk palh kha a awm ve thei a. Chuvang chuan, 'dan angin i kalpui phawt teh ang' tiin hma kan la a ni.

Tichuan, Pi Baryl Vanneihnsangi zawhna 'ruihhlo a hluar zel em; a tlahniam em' tih hi, teh a har khawp mai a. Nichin a sawi ang khanin CYMA lam te nen pawh hian kan thawkho tha a. Tunhnai maiah khan ruihhlo dotu ho bik, Kumpulan Committee ho office ah ka lenglut a. Aizawl dinhmun chu anni hian an hrechiang duh ang reng a, a thuphungin ka han zawt a. Chuta min chhanna chu - hawng khat hi, heroin no. 4 a ni ber a, tunlaia kan buaipui chu. Ruihhlo do beihpui kan han tih hma khan Aizawl ah hian ₹20,000/- bawr velin a lei theih a, tunah chuan ₹35,000/- bawr vel a ni tawh e an ti a. Bur tereuhte hi an phawrhchhuak a, 'tictac' an ti mai a, tictac khat hi ₹1000/- te, ₹1500/- te a ni thin a. Tunah chuan ₹3000/- lo chuan a awm tawh meuh lo e an ti a.

Chutiangin Codeine - khuh damdawi an ruih nasat te hi printed price, MRP angin ₹150/- bawr vela an hralh thin kha tunah chuan ₹500/- te a ni tawh an ti a. Chumi in a lantir chu, a vang hret chu niin a lang a. Pu Speaker, a tehna tak tak kha hriatthiam a har khawp mai a. Ka lo inbuatsaihnaa kan record hi ka han sawi hrim hrim ang a. - Kan man tam hian kan hlawhtling nge, kan hlawhtling lo tih pawh hi hriatthiam a har a. Man tur chu a la tam hle mai a, kan thawktute an hah hle a ni, tih House ah hian ka han sawilang nghal duh a.

Pu Speaker, i remtihna - 2024 ah rakzu litre 12,608, zu bilh lai 23,484, dawidim (yeast) kg 1000, 'a senchi' kan tih mai IMFL um puitling (750 ml) um 3,373, um chanve (375 ml) um 334, 'a quar' kan tih (180 ml) hi um 1,473 man tawh a ni a. Tin, kum 2024 chhunga Excise & Narcotics in kan man bik Heroin hi kg 15.083 a ni a; Ganja kg 238.63; khuh damdawi bur 1,764; Methamphetamine 'meth' kan tih mai hi kg 96.485,

beer (500 ml) hi um 3258 man a ni baw k a ni. Tichuan, Pu Speaker khata tang ringawt pawh khan leh, man a tam zia atang khan, ‘a la rem vak lo’ tih chu a lang chiang reng mai a.

Kan inmualpho pawh a ni ang a; kan ram dinhmun dik tak kha kan Member khan a hriat duh avangin kan han tarlang a ni a. Kha kha man a nih chuan, man loh a tam dawn a ni. Chutih rual chuan, mihring mana hi kumin chhungin mi 12101 an tling tawh a. Pu Speaker, ni khatah mi 20.18 man ang zel kan ni a. Kan thawktute hi an thawk rim ve hle a, chuti chung chuan, thawh ngai a tam a. Chuvang tak chuan, kohhran leh thalai tlawmngai pawlte phungbawmah kan sawm a. Tun hnaia zawh tak KTP General Conference-ah pawh khan ruihhlo do chungchanga hmalak tum a ni a. Tin, kohhran thalai pawl hrang hrangte nen pawh inkawm hona kan nei a, kan la nei leh zel dawn a; kan ram dinhmun hi a tha lo a ni. Anmahni Central KTP hruaitute bulah pawh ka sawi dan takah chuan, “Kohhran thalai zingah member in ngah ber; chuvang chuan, ruihhlo ti pawh an tam ber ang; lak nat chi pawh a ni lova, tan min lakpui rawh u,” ti tein ka ngen hial a ni. Kohhranin min puia, tlawmngai pawlin min puia, sawrkarin theihtawp a chhuah baw k chuan, kan dinhmun hi a ziaawm theih kan beisei a. Tunah erawh chuan kan dinhmun hi a la duhawm lo hle a ni tih chu zep rual a ni lova, he House-ah hian thudik sawi mai a tha a ni.

Tichuan, Pu Speaker, kan Member zahawm tak Pu Robert Romawia zawhna kha, a buaithlak khawp mai a, kan indaihloh dan te. Chutih rual chuan, Kanhmun-a an harsatna te hi sawrkar pawhin a hria a, theih ang angin tan kan lo la zui ang a. West Phaileng-ah te pawh Mamit lam ten tan an lak zui theih dan tur kan lo sawi pui ang a. A harsa lai bera chu, mihring kan indaihloh hi a ni a. Chutih rual chuan, hmun tina tlawmngai pawlte sawrkar tha tichak tur leh, ram tan ruihhlo do kawnga tan min lakpui turin kan sawm a. An nite nena tangrual hian hma kan sawn belh kan beisei a ni.

Tin, Pu Speaker, pakhat chiah ka sawizawm duh a chu - tunlai hianin Manipur buaina avang hian ruihhlo Manipur lama kal thin tam tak hi Mizoram kal tlangin a kal ta a; Manipur leh Tripura lam lut thla tur eng emaw zat Mizoram kaltlanga a kal avangin man pawh hi a tam a. Tualchhunga che vel hi chu tun hma ai khan a pung thut hran lova; tunlai tak phei chu ruihhlo do beihpui thlak mek a vang hian a tlem duak nghe nghe a ni tih hi official report ka dawn chu a ni a.

Engpawh nise, ruihhlo chungchangah hi chuan, zep thu a cheng lo; min run a, kan thihpui a, chhungkaw tam tak an tap a. chuvangin, tun aia nasa zawka hma kan lak theihna turin helam, i ding lama thute hi kan taw k lova, i vei lama thute, Kohhrante, khawtlangte, ram mipuite kan tanrual a ngai a ni. Ka lawm e.

**HON. SPEAKER** : Aw le, Starred Question No. 144 zawt turin, Thorang Bialtu, Member zahawm tak Pu R. Rohmingliana ilo sawm ang.



**Starred Question No. 144 -** *Zu zawrh tumna chungchang.*

**PU R. ROHMINGLIANA:** Pu Speaker, Excise & Narcotics Department changtu Minister zahawm tak chhana tan Starred Question No. 144 chu hei hi a ni –  
“Tun sawrkar hian zu zawrh tumna a nei em?” tih a ni.

**PU LALNGHINGLOVA HMAR, HON.MINISTER:** Pu Speaker, zawhna chhanna chu hetiang hi a ni e -  
“Tun dinhmunah Sawrkarin zu zawrh tumna a neih hriat a ni lo” tih a ni e.

**HON. SPEAKER** : *Zawhbelhna - zawhna neitu, Pu R. Rohmingliana ilo sawm ang.*

**PU R. ROHMINGLIANA:** Pu Speaker, ka zawhbelhna chu hei hi a ni e –  
“Mizoram hian Autonomuous Disctriect Council pathum kan nei a, heng District Council pathumte hian zu zawrh tumna lo nei ta thut se, Excise & Narcotics Department, Mizoram sawrkar hian thu neihna a va nei em? Eng ang chinin nge hma a va lak ang?”

**HON. SPEAKER** : *Zawhbelhna dang a awmlloh chuan, chhang turin a changtu Minister, Pu Lalnghinglova Hmar ilo sawm ang.*

**PU LALNGINGLOVA HMAR, HON. MINISTER:** Pu Speaker, a zawhna kha chhan sual a hlauhawm a; rem i ti a nih chuan, a ziakin kan lo chhang a nge.

**HON. SPEAKER** : *A tha mai em? (House-in tha a ti a.) Aw le, a lawmawm e. Starred Question No. 145-na zawt turin Hachhek Bialtu Member zahawm tak Pu Robert Romawia Royte i lo sawm ang.*

**Starred Question No. 145 -** *Aizawl Munipal Area chhunga Govt. Primary School leh Govt. Middle School te chungchang.*

**PU ROBERT ROMAWIA ROYTE:** Pu Speaker, School Education Minister zahawm tak chhan atana ka zawhna chu hei hi a ni e –  
“Aizawl Municipal Area chhungah Govt. Primary School leh Govt. Middle School engzat nge awm a, enrollment leh teachers engzat ve ve nge an neih?” tih a ni e.

**HON. SPEAKER** : *Chhang turin, School Education Department Minister, Dr. Vanlalhlana ilo sawm ang.*

**DR. VANLALTHLANA, HON. MINISTER:** Pu Speaker, ka lawm e. Pu Robert Romawia Royte Hachhek Bialtu zawhna chhanna chu –

Aizawl Municipal Area chhungah Govt. Primary School leh Govt. Middle school awm zat chu hetiang hi a ni -

- a) Govt. Primary School - 111, (b) Govt. Middle School - 76. Tin, enrollment leh teachers awm zat pawh hetiang hi a ni - Govt. Primary School enrollment - 7454, Zirtirtu – 636; Middle School-ah enrollment – 4011, zirtirtu - 634.

**HON. SPEAKER** : Zawhbelhna zawt turin, Pu RM Chakma, Tuichawng Bialtu Member zahawm tak ilo sawm ang.

**PU RASIK MOHAN CHAKMA:** Pu Speaker, ka zawhbelhna chu – Zirtirtu aikal hi an titawp tak tak thei ang em? A chhan a awm a; ka hria a. Kan area-ah pawh an awm nge awmlo zawh ngai lovin, an awm a ni. Chuvangin, titawp tak tak theih a ni ang em?

Tin, Kamalanagar Higher Secondary School-ah hian LDC te, Peon te an nei lova. Higher Secondary School meuh LDC leh Peon awm lo chu, engtia kal pui nge School Education Department hian a tum? An harsa khawp mai a, zirtirtu kha created post zawng zawng aiin tunah hian paruk laiin an tlem a, khangte kha dah let leh dan a awm em?

**HON. SPEAKER** : *Zawhbelhna* - Pu Lalramliana Papua, Lunglei South Bialtu.

**PU LALRAMLIANA PAPUIA:** Pu Speaker, ka lawm e. ka zawhbelhna chu hei hi a ni e. –

Inthlan hma, inthlan hnunng ber dawn hnaih khan ‘*political transfer*’ kan tih hi zirtirtuah an awm nual mai a. Lehlam pawl candidate tur anga lang deuh, thingpui an lo inpui, a then chu chawlh nan an lo hman zawk avang tea, inthel deuh tak lawng lawng te pawh a awm a ni. Hengte hi Minister hian ngun taka zir chiangin, hetiang kut inthlak te hi chu an post hmun ngaiha te hian an awm leh thei lawm ni?

**HON. SPEAKER** : *Zawhbelhna* - Mamit Bialtu zahawmtak, Pu H. Lalzirliana.

**PU H. LALZIRLIANA** : Pu Speaker, School Education Minister (Higher Technical Education Minister ni baw) ka zawhbelhna chu hei hi a ni –

Mamit Govt. College-ah hian Economics lecturer pahnih tun hnai Ni 29.2.2024 ah khan transfer an ni a. Hei hi thlaktu tur awm lova transfer a ni tih kan Minister hian a hriatpui em? Engtin nge hma min lakpui a tum?

**HON. SPEAKER** : A lawmawm e. Chhang turin School Education Minister zahawm tak, Dr. Vanlalhlana ilo sawm ang.

**DR. VANLALHLANA, HON. MINISTER:** Pu Speaker, ka han sawi hmasak duh chu, kan memberpui Pu H. Lalzirliana zawhna kha Higher & Technical Education Department lam chan a ni a. Kha kha chu duh leh kan department lamin min lo hriatpui se la.

**HON. SPEAKER** : Khawngaihin min lo hrethiam ula. *Question Hour* a zo a, kan minister hian a chhang laklawh viau mai a; kan chhan zawh tir law law mai dawn em ni ang? (*House-in chhan zawh tir a remti a.*) Aw le, chhang zo law law rawh le. Nakinah Demand sawi hunah rawn chhan ka lo tum ang e. Dr. K. Beichhua zawhna pawh nichin khan College lam a ni a. Kha pawh kha lo chhinchhiah tum se la a tha ang e.

**DR. VANLALHLANA, HON. MINISTER:** He House zahawm taka kan member-pui Pu RM Chakma, Tuichawng Bialtu in, ‘aikal kan ti tawp thei ang em?’ tih a lo zawhna kha, tihtawp chu kan tum a. Sawrkar hmasa lam te khan an lo la nasa lutuk a, an lo kalpui thuk tawh lutuk a; a inchingchivet kual tawh a, kan buai zo chu a ni maiin a hriat a. Tin, ‘aikal tihtawp’ han tih tawp hian, damlo, kartin inentir a tul avanga zin chhuah thut thut ngaite leh eng emaw natna benvawn neite an awm a, chungte chu kan hriatthiam mai loh chuan. ‘Thingtlang kilkhawrah va kal rawh’ inti i la chu, ‘sawlamah sawn i hun tawp va hman rawh’ intihna ang deuh a nih avangin, mihring mihrinna atanga ngaihtuahna kan sen deuh a ngai a. Amaherawh chu, kan theihtawp chuan tihtawp kan tum a.

Niminah kan House Leader zahawmtakin a rawn sawi KAI application te pawh School Education Department in a hman turin ICT Department-in an buaipui mek a. Kha application hman khan ‘zirtirtute an kal tak tak em, kal tak tak lo em’ tihte, anmahniin register-na phone number hmangin kan en dawn a. Chutiang chuan kan umzui a ni.

Tin, aikal official-a kan neih hi mi 532 an ni a, eng emaw zat hi chu an let leh tawh tih pawh kan hria a. Aikal lo late zingah a then chu lo sumdawng ta lawp lawpte pawh an awm a. Chutiang a nih avang chuan, ‘hengho hi chu an let tur a ni’ kan ti a, theih ang ang chuan kan invo ve a ni. Kan umzui zel dawn a, aikal chungchang hi; DP&AR lamah thehluh chhoh a ni a. An niin remchang an tih angin hma an lo la ang a; an niin, ‘hetiang hian hma lo la rawh u’ an tih angin hma kan la ve leh dawn a ni.

Tin, Kamalanagar Higher Secondary School chungchang kha, tunah hian Sawrkar hmasain zirna a tlukchhiat loh nan tia SEDP hnuaiia zirtirtu a lo lakte March thla thleng bak an thawh theih tawh dawn loh avangin ruahmanna kan siam belh a. Zirtirtu minimum requirement ah ringawt pawh 1415 a awm a. Chutiang chuan vacancy kan nei

a, minimum requirement nen, a awl awm nen kan endik a, Finance Department ah kan dil chho ang a. Buaipui tur a tam khawp mai a. He mi ah hian Finance Department lamin min lo phalsak a nih chuan kan lo hre zui ang che u; kan lo ngai pawimawh ang che u.

Tin, Zirtirtu bakah LDC leh Peon pawh kha kan lo hria ang a. Mahse, ngaihtuah tel ngai chu exam center kan ngaih pawimawh bik a ngai a; exam center bik hi an hah thin a; hna a tam a, school zawng zawngah hian Peon leh LDC kan dah vek thei lova. Theih ang angin kan lo en ang a, exam center an nih pheh chuan pek ngei kan lo tum ang.

Tin, Pu Lalramliana, Lunglei South bialtu zawhna - *political transfer* chungchang kha, lehkha arawn thleng hnem khawp mai a; khawthlang lam atang pheh chuan report a tam leh zual a. ‘Hetah min sawn thla a; khi tah min sawn chho leh a’ tihte kha a tam khawp mai a; inthlan dawn hnaihah an tawng thut thut a ni. Tunah hian ngaihtuahna kan seng a, exercise kan la mek a. Political transfer nia hriatte chu ngaih pawimawh hmasakah an awm dawn a ni. Ka lawm e.

**HON. SPEAKER** : Tikhan, *Zawhna & Chhanna* hun chu kan hmang zo ta a, business dangah kan kal ang a.

**FINANCIAL BUSINESS: GENERAL DISCUSSION:**

Tunah Financial Business ah kan kal ang a. Chief Minister zahawm tak Finance Department changtu ni bawkin February 27, 2024 a budget a pharh tak, “*The Annual Budget for the Year, 2024 – 2025*” kha general discussion kan neih chhunzawm leh ang a. General Discussion hi vawiin a zawh tur a ni tih kan hriat tlan tawh kha. Niminah khan Member zahawmtak tak 11 te’n an sawi a, tichuan, vawiinah kan sawi chhunzawm leh dawn a ni. Hun kha nimin lama kan inpek ang khan, Member pakhat tan minute 10 kan tih kha a tha kan ti mai em? (*House-in tha a ti a.*) Aw le, minute 10 kan inpe leh ang a, tu nge sawi hmasa ang le? Palak Bialtu zahawmtak Pu K. Hrahmo ilo sawm ang.

**PU K. HRAHMO** : Pu Speaker, ka lawm e. Budget Discussion chu nimin atangin a kal a. Nimin lama kan member-pui zahawm tak ten budget an hmuh dan an sawi chhuah atangte leh, theihtawp chhuaha budget bu te ka bih chian vena atanga ka thil hmuh chu, ‘kan va rethei tak em’, tih hi ka rilruah a awm a; ‘Sum leh paiah heti khawp hian kan lo pachhia a ni maw’ tih hi ka thinlungah a lian hle a. Hruaitu hmasa ten, ‘kutdawh hnam kan ni’ an tih te kha ka rilruah a lo lang a. Dehchhuah nei lo State, Central Sorkar a innghat tawpin tihian kum eng emaw zat kan lo kal tawh a, kan retheiin kan pachhe hle a ni tih chu a chiang tawkin ka hria. Chu mi tichiang leh zualtu pakhat chu, kan hrawn mek Sawrkar hian kumin hi Year of Consolidation-ah a puang a; kan economy hi tha se la chuan, hetiang hi puan a ngai lovang. Kan dinhmun a that loh avangin ‘year of consolidation’ tiin kan Sawrkar hian min puan khum ta mai a ni.

‘Year of consolidation’ tih hi saptawng a ni a, budget wording bik a ni a. Ka thiam ang tawkin han sawifiah ve chhin i la. A awmzia chu, chhungkua pakhat zingah buhfai no 5 chhum thin, tlaiah pawh no 5 chhum thinte hnenah, “kan pachhe tawh e, buhfai lak belh tur kan nei tawh lo e; kan tam tawh si a, kum kan chhuak lo palh ang e. Chuvang chuan zingah buhfai no 1 chhum i la, tlaiah pawh no 1 chhum i la, a buhhawp zawngin i hawp tawh mai teh ang u” tia rawtna a niin ka hria a. Pu Speaker, a ni em aw? A dik maiin ka hria. Chu chu kan dinhmun a ni.

Kan House Leader berin ‘buhhawp kan ei tlan a ngai tawh a nih hi’ a tih kha chuan, phur tak leh lawm takin kan ei tlang zel tur a ni mai a. Chu tih laia ka hlauhthawn em em pakhat chu, hetiang inrenchem taka kan kal lai hian kan hotute, khulam atanga kan ram tana eng emaw lakchhuah, dehchhuah, tharchhuah, an nei si lo a nih chuan, nakum lamah pawh *year of consolidation* kan kal leh a ngai ang a, a kum lehah pawh. Tichuan, year of consolidation-in kan kal zel ang a, kan term kum 5 hi a tawp mai ang tih a hlauhthawnawm a nih chu; chu chu kan dinhmun a ni a.

Pu Speaker, kan Finance Minister speech kha thiam ang tawkin ka zir ve a. Speech Sl. No. 41 – ‘*Devolution of Central Taxes and Duties*’ tihah khan chiang taka kan hmuh chu, India rama tax lak khawm zawng zawng belhkhawm hnuah 41% kha State tinah an insem a, 41% State tinin kan insem atang chuan keini hian .1 pawh tling lo 0.5% kan chang ve a ni. Ka sawi duh chu, Finance Commission of India-ina State tin hnenah sum a sem hi tax tlingkhawm zawng zawng atanga 41% chauh a ni a, chung aia tam zawk fe 49% chu central BJP kutah a awm a ni. Chu chu thuchiang, hnial rual loh a ni. State tinte hian an budget piah lamah an zuk thal chhuah tur, an zuk lak tur sum a ni a, State tin te hian an budget piah lamah central BJP-in a sum kawl mek chu lak chhuah tumin an zuk bei hlawm dawn a. Chuta ka rilrua lo lang chu, ‘keini hian engtin nge kan tih ve dawn? *Tualvungi ko thiam* hi ka va han mamawh dawn ve’ tih hi.

Pu Speaker, i veilama thute khan an sawrkar lai khan, “kein in Tualvungi chu kan zuk ko ang e, kan ko thiam a lawm” an ti a, NEDA zuk zawmin an zuk ko ta ngei a, mahse chakai koh danin an zuk ko nge, kan ram in a that phah chuang lo. Hetiang hi kan dinhmun dik tak a ni. Sawrkar tharah hian beiseina sang tak kan nei a, kan Tualvungi chu an zuk ko thiam turah ngai phawt mai ila, an lakah hian beiseina sang tak kan neih mek hi min hriatsak ka duh a ni.

He ram hi Pathian-in a hmangaih a, he ram hi mal a sawm dawn anih chuan, kan sawrkar hi kut leh keah a hman ngei hi ka ring tlat a ni. Amaherawh chu, hlauh an nei; a thlang lo ang; hlauh neih hi a tha lo. Mizoram hi ka ti thin, ‘Kristian ram’ kan inti a, hlauh hi kan ngah lutuk emaw ni chu aw ka ti a, a bik takin hmar lam hi in ni bik. Chhim lam chuan BJP kan hlau ve lo; Lal Isua’n “khawvel zawng zawngah kal ula, hnamtin hnenah chanchintha hril rawh u” a ti a ni. Chhak lamah Mosolman, Buddhist, Hindu; a laiah keini nuai 15 lek kristian kan awm a, kan chhehvela hnamdang awm, ringlo mite hnenah

chanchintha hrilh hi Lal Isua thupek a ni. Hengho hi hlau mai lovin, a ler atangin lut mai lova a chhunga luhchilha thiana kan insiam chuan, kan mission hi a nih dan turin a kal thei ang tih hi chhim lam chuan an hrechiang khawp mai a, an hlau ve lo. Hmar lam erawh chu, BJP hlau tawh lek thlarau hi a kawltir zawk che u nge, ka hre lova.

Pu Speaker, eng pawh chu nise, ka thu sawi ka titawp tawh ang a. Kan budget sum en hian, hei ai hian a pung thei tawh si lova, tuna awmsa atanga Finance Minister zahawm takina ‘tiang hian ni rawh se’ tia a rawn propose hi chu tihdanglam vak ngaihna a awm lo ang a. Pawm mai ila, tun tum chu; ‘pass-pui hram ang u’ tiin ka support thu ka rawn au chhuah pui ve a ni e. Ka lawm e.

**HON. SPEAKER** : A lawmawm e. Tunah chuan sawi turin Tuipui East Bialtu, Member zahawm tak Pu Ramthanmawia ilo sawm ang.

**PU RAMTHANMAWIA** : Pu Speaker, ka lawm e. Kumina kan budget tlangpui hi kan chai ve viau mai a, a chhan a awm a. Kan CM leh kan House Leader zahawm tak hian ama puala budget pharh tur hian kum tam fe, thanghnih lian zet a bei a, a nghak a. Chutianga beidawng loa chhel taka a lo hlawhtlinpuina, a vawikhatna budget a rawn pharh hi thinlung tak pawhin kan lawm a ni.

Pu Speaker, kumin budget-ah hian, kan ngaihthlak tak ang khan kum danga kan la hmuh ngai lem loh a awm nual mai a. Kan Health Minister zahawm takin a lo sawi tawh mitthi ruang dahna tur vaibelchhe 5 lo lang te hi a lawmawm em em a. Hei hi Pu Speaker, ka sawi duhna chhan chu, MLA fund atangin a tih theih miah lova, kum 5 chhunga mitthi ruang dah hi a za tel fe a ni. Motor chu lo awm bawh mahse, a tui man te a lo awm a, a driver hlawh te pek a ngai a, kum 5 chhung khan kan insengso hman viau a ni. He budget-a lo lang hi keini thingtlang lam bialtute tan chuan kan phurrit nasa takin min chhawk dawn a ni a, he budget-a a lo lang hi kan lawm tak zet zet a.

Tin, helaia a rawn sawi tel loh – ‘mitthi’ ni lo hi a awm tlat a ni. Doctor-te pawh an beidawn tawh, an chhungte pawh an beidawn tawhna, in lama phurh haw ngai hi an awm ve leh zauh thin a, a hautak em em a. Nurse te nen, oxygen te nen, ambulance te nen hire-a, an in thlen a ngai thin a ni. Chungte chu helaiah min ziah tel sak thei se. An tam lova, tam chu; mahse an awm thin a ni. “Kan pa, kan nu, kan fate hi kan inah ngei damin min thlen sak rawh” tih hi kum 5 chhung khan an awm ve nual tlat mai a, chu chu ka han sawi tel duh a. Hei hi min khunglen sak thei se a lawmawm hlein ka ring a.

Pu Speaker, thlai chi thlan bik 4 - sawhthing, hmarcha, hmunphiah, aieng te minimum support price hmanga loneitute hnen atanga leina tur budget-a dah a ni hi a lawmawm khawp mai a, kut hnathawktute ka lawmpui hle a, Sawrkar pawhin a takin hma la ngei se ka duh a ni. Pu Speaker, tuna hmunphiah issue ka ngaihtuah erawh hi chuan ngaih chu a tha lo deuh a. Budget tharah hi chuan ‘kan lei ang’ tia lei leh theihloh ang chi kha

awm lo turah ka ngai a. A pawimawh khawp mai, kan mipuite nghahfak, sawrkarna min pekna chhan zingah pawh hian a tel a ni.

Pu Speaker, ka sawi tak ang khan, tunah hian ‘kut-hnathawktute thlai thar sawrkarin a lei dawn’ tiin nasa takin an inpuahchah mek tih kan hria a, leisak ngei a ngai dawn a. Kan leisak thei lo a nih chuan an beidawng dawn a, an tan tah leh rumna kan thlen dawn a ni. Research base-a kal kan ni bawk a, agent thlan turah te pawh khan fimkhur tawh ila; lei leh mai mai thei loh tur ang chi. Kan vai company kan rin te kha, tunhnuah chuan rintlak deuh, la ngei tur ang chi te thlang thiam tawh ila a pawimawh dawnin ka hria a, ka han sawi tel bawk a ni.

Pu Speaker, kan House Leader-in a ngaihpawimawh em em, a sawi thin *6 basic needs* zinga mi Power siamchhuah sem darh kawnga mumal zawka kalpui theih nan budget-a crore 20.13 dah a ni hi a lawmawm rualin, duh ai chuan a beitham deuh em aw ka ti a. Power sem darhna hmarua hrang hrangte hi a hlui hlawm em em tawh mai a, kan bialah ngei pawh tunah hian kan buaina ber a ni a, Khawbung atanga Samthang lama power supply kan lakna hruipui hi ruah a sur hlek emaw, thli a tleh hlek emaw chuan a thi nghal zel a, a piahlam Vaphai te, Samthang te chuan electric power an nei lo nghal zel a ni Chuvangin, helaia budget-a lo lang hi a lawmawm ka ti a, kan mamawhte pawh hi min ngaihtuah dawn niah ka ngai a, ka lawm hle a.

Tin, Pu Speaker, budget-a lo lang PWD-ah khan kawngpui leh lei thalote siamthatna tur atan cheng crore 100 leh road fund hnuai cheng crore 40 kan dah pawh hi a lawmawm em em mai a, amaherawhchu, a beitham deuh em aw ka ti a. Tin, kawng chungchangah hian ka vei em em, a system kan thlak hleitheih loh chu - kawng chhia kan repair reng reng hian, a chhiat fe tawh hnuah, a khuar fe tawh hnuah hian department-in kan siam thin a ni. Tender te kan kova, anih loh pawhin departmental-in. Hei hi thlangra tia vel a khuar lai hian a siam theih lawm ni? A chhiat tirh hian department hian a siam thei lawm ni? Pawisa kan nei lo em ni? Tuna kan dah te hi a hman theih lawm ni? Sum leh pai a hek lo ang a, tha a hek dawn lova, mipuite kawng tha ah kan kal tir thei reng dawn. Helai taka hi, kan budget-a lo langah hian kan Minister pawhin min lo chhinchhiah sak sela, sum tlemtein kawng tha reng bawk sia, sum leh pai hautak lova he kan kawngpui kan maintain-na turah hian system thar, (*kalphung-thar* kan ti bawk a) kalphung tharin i kal teh ang u. Chu chu he House-ah hian Pu Speaker, nangmah kaltlangin ka ngen a ni.

Tin, Pu Speaker, kan budget hi ka han en hian kan, kan House Leader-in “tun kumkhat chhung hi chu hmasawna lam kan kalpui thei dawn lo a ni; sum inrenchem kumah kan hmang dawn a ni” a tih kha a takin a lo lang a, mipuite hnen atangin chhiah leh bill a theih ang anga tihsan kan tum dawn niin alang a. Hmannia kan pass tak stamp duty 1% atanga 3% a tihsanna tur te kan hmu a, vehicle tax tihpun tumna te alang bawkin kan

hria a. Hengah hian ‘engnge tihpun kan la tum; tui bill te hi kan tipung dawn nge’, tih te ka rilruah a lo lang a.

Tin, motor transport vehicle tax tihpun hi mipuite chuan kan tuar dawn chu a ni mai a. Bungraw phurhna man a lo sang ang a, motor chuan man a lo sang dawn bawk a, mipuite tana phurrit a lo thleng dawn; a tih loh theih loh a nih pawhin hei hi mipuite tana rit lutuk lova kan tihpun hi a thain ka hria a ni, Pu Speaker.

Tin, Pu Speaker, 2023-2024 BE-ah khan CSS sum hmuh beisei zat kha crore 2670.41 a ni a. Kumin BE-ah kan beisei zat chu crore 2559.30 a ni a; a tlemna hi crore 111.11 a ni.

CSS atanga sum kan hmuhte kan hmang tangkai em em thin tih kan hria a, department hrang hrangah. Kumin budget tharah hian kan dah tlem ta em em mai a, hei hi hmuh tam kan inbeisei tawh lo nge, 100% funding kan beisei zawk vang? Hei hi hriat a chakawm hle a. Tin, NLCPR te, NESIDS te, NEC te atang hian sum haichhuah kan tum lo nge? Hei pawh hi a dona tur SMS kan dah lo hian helai atangin beiseina kan nei sang lo nge, 100% funding chauh kan beisei dawn? Chungte chu rilruah a awm bawk a ni.

Aw le, Pu Speaker, Sawrkar policy ‘Ban-kaih policy’ atana crore 200 dah a ni hi a lawmawm khawp mai a. He policy hi thalai ten a taka an chhawr tangkaia, dinchhuah nana an hman ngei ka duhsak khawp mai a. Sawrkar thar, mipui-sorkar a nih ang ngeiin bana kaih tur thlan chungchangah pawh hian induhsak bikna leh inthliar bikna awm lo turah ngai ila. Pu Speaker, ka zo mai ang, min lo hrethiam lawk la; kan din khat hi.

Pu Speaker, Healthcare lam kha sawrkarin a ngaihpawimawh kha a ni thin a, tun budget-ah crore 20 dah a ni hi a lawmawm rualin, a bei tham deuh em aw ka ti a. Kum hmasa khan crore 60 dah a ni a. Tin, kan Health Minister zahawm takin a sawi tawh thin - mi zawng zawng huap zo tur Universal Health Coverage System, kum khatah chhungkaw khat tan ₹5 lakh thleng hman theihna *cashless system* kha budget-ah hian a lo lang lova, hei hi a nghahhlelh awm hle mai.

Kum danga la lang ngai lo Home, School Education leh Social Welfare hnuaiyah hmeichhiate tan bik - gender budget kan telh hi a lawmawm ka ti khawp mai a. Tun tumah phei chuan hmeichhia MLA zahawm tak tak pathum kan han nei a, anni tan hian Recess Room a hranpa hian ngaihtuah sak hi a tha khawpin ka hria a. Nakinah chuan tun aia tam pawh hi he House zahawm takah hian an la rawn thu lovang tih a sawi theih loh avangin, tuna kan lo inngaihtuah lawk te pawh a tha a.

Tin, ‘tar-pension’ kan tih mai NSAP Scheme hnuaiya Old Age Pension Mizoram state contribution cheng 100/- atanga cheng 1000/- a tihpun a ni tur hi a lawmawm takzet a. Kum upa, old age pension late tan lawmpuina tunah hian ka hlan a ni.



Pu Speaker, Anti-corruption measure chungchangah inthlan hma atanga mipuia kan inzawrhna pakhat - eirukna theih tawp chhuaha do a ni tur thu hian thla a timuang hle bawk. Tin, Mizoram sawrkar hnuaia hnathawh endiktu tur Mizoram State Project Monitoring Committee din a ni te hi a lawmawm a, tha taka hna thawk ngei turin kan lo beisei dawn a ni.

A tawp berah chuan Pu Speaker, budget tha hi hlawhtlinna leh hmasawna a nih rualin, anihna anga dik taka hman hi a pawimawh ber niin ka hria a. Kan zavaia lungawina tha budget pawh pharh ila. Eng anga tam budget pawh pharh ila, a hmanna lam a dik si loh chuan awmzia tak tak a awm dawn lova. Sum hi a tlem emaw, a tam emaw a hmanna hi dik sela, chu chu a pawimawh ber a, a tangkai bawk a, tin, a daihzai bawk a ni.

Aw le, kumina kan Budget Estimate 2024-25 crore ₹14412.12 hi tha tak leh dik taka hman a nih theih nan he sawrkar thar hi duhsakna ka hlan e. Pu Speaker, ka lawm e.

**HON. SPEAKER** : A lawmawm e. Tunah a sawi turin Lunglei South Bialtu zahawm tak Pu Lalramliana Papua ilo sawm ang.

**PU LALRAMLIANA PAPUA:** Pu Speaker, ka lawm e. Tun tum zet chu, vawikhat pawh budget la pharh chhin ngai lo te'n an han pharh ve ta chu a ni a, rilruah venthawn a na a, 'sawi nawi tur a tam hle ang' tih te kan lo hlauthawng a. Amaherawhchu, tum tam tak lo pharh tawhte pawhin fakna aw-ka leh a tha tihna tawng-ka tam tak ngaihthlak tur kan hria te khan rilru a tilawm a, thinlung a tihlim khawp mai a.

Tin, he kan budget han thlira keima mimalin ka lawmna leh ka rilrua ka lo notice hmasak chu - kan Finance changtuin budget a pharh takah hian Mizo mipuite'n kan rilru ti kal sualtu, hun kal tawh pawha kan hmachhawn fo thin - a thlawn a sum dawn leh sum sem tur ang chi ruahmanna a han awm lo ringawt pawh hi kei, a hma atanga ka lo vei leh ka lo enghelh thin a ni a. Hei hi a lawmawm ka ti em em mai a. Zoram mipuite pawhin a thlawna dawn changa, 'duhsak kan hlawh ang em' tia lo inkau reng thin te khan tun kan budget-ah chuan, *hand-holding policy* an lo chan a ngai dawn a ni tih kha lo hria se.

Tin, he budget hi a thawk, a ti tak tak leh theihna nei, tuimi te'n *hand-holding policy* hnuaiah chuan 'duhsak bik awm lovin hmasawnan an hmang dawn a ni' tih tilang chiangtu a nih avang hian, a lawmawm ka ti takzet a ni.

Tuna kan budget hi, a chhungril bih chiang lova a landan han enthuak hi chuan, kum hmasa lam budget aiin hmasawna hnathawh tur Capital Expenditure percentage te hi 'a tlahniam zawk e' tia sawi te pawh kha a awm thei dawnin a lang a, kan ngaihthlak tak chinah khan. Amaherawhchu, ngun taka zirchiana han en erawh chuan hmasawna

nasa zawk thlentur tur budget a nihna hi a zuk hmuh theihin ka hria a. Kan Finance changtu, kan CM zahawm takin a sawi tak ang khan, tun kumthar biakah chuan ‘*Year of consolidation*’ puan a nih angin State chhung atang chuan project lian tham kan khawih thei dawn lo ti a, huaisen taka budget speech-ah a rawn tarlang kha fakawm ka ti hle a ni. Capital Expenditure a lang thin State sum puk tur ruahmanna tam tak chu tih tlakhniam a ni a, crore 697.69 zetin tihhniam a ni a.

Chuvangin, tun tum kan budget-ah chuan bat tama changkan tum rih lovin, leiba titem zawnga inhrek phawt hi kan mamawhin, kan budget hian min kalpui dawn niin a lang a, chu chu kan dinhmun ngaihtuahin a tul bawk niin ka hria a ni. Chutih lai chuan hmasawna hnathawh tur sum ruahman Capital Expenditure hi ‘kum hmasa lam aiin a percentage a hniam e’ tia sawi a lo awm a nih pawhin, he kan hnathawhna tur atana kan ruahman budget a awm hi ka hmaa member pakhatin a sawi ang khan, dik leh fir taka hman a nih chuan, a hma aia tam zawk hmasawna hnathawhna atan a hman theih tih erawh kan hriat tlan a tha hlein ka hria a. Neinung tak, sum hmang thiam lo nih ai chuan, sum neihchhun ang angte pawh mamawhna zawnah renchem taka hman hi mimal chhungkua leh kan ram pawh hian kan dinhmunin kan mamawh ber chu ni zawkin a lang a ni.

*Entirnan:* hun hmasa lam pangah te, a chang chuan kan hna thenkhat nuai 20 - 30 vel a thawh zawh mai theih tur nuai 80 vela thawh ngai tura ruahmanna lo awm ang thin te kan hmu thin a, sum thehral a tam ting a ni mai a. He budget chhung atang hi chuan hetang hi awm lo turah ngai ila, kan sum neih leh ruahmante hi fir tak leh renchen taka kan hman chuan, tam deuh neia thiam lo leh inren lo taka hnathawh ai chuan, nasa takin hmasawna hnathawh pawh hi a lang thei turah kei ka beisei a ni.

Tin, Revenue Expenditure lam kan en chuan, kum kal meka kan hmuh dan aiin tunah hian a san loh theih lohna chhan te pawh hi ngun taka thlirtute chuan kan hmu vekin ka ring a. Sawrkarah chuan kan mamawh chiang sa ngawih ngawih thil tam tak Revenue Expenditure a lang tur - salary (thawktu hlawh) te hun hmasa lamah te kan mamawh sa a ni tih hriatring pawha mamawh tawh han dah ni lemlo te kha a awm thin a ni; a hnuah Supplementary Demand lampangah pek leh tawh ngaite kan hmu thin a. Tun tumah erawh chuan, kan hruiute hian kan mamawh chiang sa nia an hriat chu kan mamawh zat angte pawh he budget ah te hian a nihna ang taka budget tihlan an duh avangin, ruahmannaah hian an bilh tel sa niin ka hria a. Chuvang chuan, kan dinhmun dik tak rawn pholang-tu budget a nih avangin, Revenue Expenditure pawh hi a sang lo thei lo a ni, tih hi tlema a ngaihna hre deuh chuan an zuk zirchianin an hrethiam mainn ka ring bawh a ni.

Tin, keima mimal pawhina ka vei em em thin pakhat, he budget-a min tilawmtu lo lang sawi ka duh bawh chu - kum upate chungchang, a sawitu apiangin kan sawi lang a, kan lawm tlang niin ka hria a. Tun budget-ah hian ruahman tel zingah hian ‘tar-pension’ kan tih mai thin NSAP hnuai kum upate’n sum an dawn thin, State ina cheng 100/- a tum

sak atanga cheng 1000/- a a han pung tur hi, ‘a dawngtu turte ai hian ka lawm zawk ang em aw’ tih hi keimahah chuan ka inngaihtuah a ni.

Kan Mizo society-ah hian kum upate kan ngaihsak an ngai tak meuh tawh niin ka hria a, kan tawng tuallengah leh kan thusawi tam takah hian ‘*thalaite khawvel - computer age a ni*’ tih hi kan sawi thin a. Amaherawhchu, tun dinhmun min thlen tirtu kan kum upa zawk mual liam tep tawhte hi kan ngaihsak tawk lo hian ka hre thin a ni. Kum 2015 bawr vel khan niin ka hria a, khawtlang hruatui dinhmuna kan din ve laiin ‘*Year of Senior Citizen* puan a ngai a ni’ ka ti a, tum khat chu kan puang ve tawp mai a ni. Chumi kum chuan, “thalaite pawh inthik suh u, upate hi ngaihsak bik an ngai tawh a ni; kan ngaihsakna kan tih lan thar a ngai a ni” tiin, theihtawpin duhsakna hna kawng ngaihtuahpui an ni a, chutiang chuan rilruah ka lo veipui ve em em thin te a ni a. Thingtlang thenkhatah phei chuan hetiang ‘tar-pension’ kan tih ang te te te hi an chhungkuain eng emaw tangkaipuina atan an nghahhleleh leh an nghahfak tak tak te a lo ni ve a, kum tawpa tlema an lo khek khawl krismas dawna an lak te hi a hlu em em thin a ni. Chuvangin, he budget-a lo lang, an tana chhenfakawm leh zual tura State-in a sum a tihpunsak te hi, ‘ka lawmpui takzet a ni’ tih kha ka han sawi uar duh deuh bawk a ni.

Tin, he budget chungchanga ka sawi leh duh pakhat chu - kan ram ina a mamawh em em hmalakna tura ruahman kan hmuh te hi a ni a. Kan ramah chuan rural economy tihhmasawn leh, thalai a ngaihna hria, sawrkar zem zen pha ve si lote ngaihpawimawh hmasak an nih loh chuan, ‘Mizoram hian hmasawna tluantling, ‘development tluantling hi a thleng ngai lovang’ tih hi ka lo hmuh ve thin dan a ni a. Thingtlang bial nei kan ni a, kan zinnaah te pawh an hrethiam lo lek lek thin a. Ka sawi dan thin chu, – “thingtlangina in mamawh hmasawna leh khawpui hmasawna tur mamawh hi a inang lo. Rural economy, chhung tinin ei bar zawna kawnga hma insawnpui theih tur hmasawna in mamawh hmasa a ni. Volleyball court changkang tak te, tennis court te, futsal ground te, grass mual tih ang chite in mamawh a, in it ve thei. Amaherawhchu, in mamawh bulpui zawk chu, in ei bar zawna dawm kangtu tur hmasawna in mamawh a ni” tih hi ka zirtir dan thin a ni. Chuvang chuan, kan budget kan han thlir hian, kha lam hawi hmuh tur chiang taka lo lang, hand-holding policy hnuaiah te leh Agriculture Market Assurance Fund hnuaiah te sum ruahmansak an ni te hi ka lawmpui em em a. Kut-hnathawka eizawngtute leh lo neitute hi ngaihsak an hlawh loh chuan, Aizawl-in nasa takin hma a sawn ang a, Lunglei leh District khawpui dangte pawh hma an sawn ang a, thingtlang khaw 800 chuangah hian an rural economy kan dawmkan loh chuan, Zoram hmasawna tak tak a thleng dawn chuang lo a ni, tih hi chiang taka kan hriat a nih avangin, he budget-a an thal ve theih tur sum ruahmansak an ni te leh an mahni enkawla ngaihtuahu tur board, Minister hova din a ni te hi lawmawm ka ti takzet a ni. Tin a tawp lama ka sawi duh chu - kan Governor-in min fuihna, ‘*thutlukna harsa deuh pawh huaisen taka kan siam ngam a tul dawn*’ tia Governor Address a a rawn tarlan te he budget-ah kan zawm chho zel a ni tih rawn lang hi a lawmawm ka ti bawk a. Revenue

thahnem zawk kan neih theihna tur atana budget duan a ni a, stamp duty leh registration bill te kan han pass chho te kha lawmawm ka ti takzet a ni.

Chuvangin, budget hi a nihna tur ang chin atan chauha sum ruahman a ni, tih hi sawrkar-hnathawkte leh mipuite pawh hian hria se a thain ka hria a. Duhthusama hnathawhna tur sum ruahmanna a ni lova, ‘sum dinhmun harsa chung chung hmasawna hnathawh a tul si avanga sum ruahman a ni’ tih min hriatpui a thain ka hria a. Renchem tak leh dik taka hman a tul dawn a, mit khap lek lova vilvengtu - mitmei zuitu tur pawh dah a ni dawn tih kan hmu a. Development hna kalpui kawngah hian official lam pawhin tham then tur a awm dawn lo a ni tih hi he budget ah hian min hriatsak sa se a tha hlein ka hria a ni.

A tawpna atana ka sawi duh chu, Pu Speaker, he budget ah hian tun kan dinhmuna kan ngaihthah hauh loh tur nia ka hriat - inrenchen taka hmalak te, corruption leh a lo thlawna sum there tam lutuk khuahkhirhna te, thalaite a ngaihna hria an tana rahbi tuk sak te leh thingtlang kuthnathawktute tana a tak taka ngaihven tumna te; tin, ‘weaker section’ kan tih nunau leh kum upate tana hamthatna ngaihtuahpui kawngah te he budget hian fun kim taka ruahmanna a siam avangin, a lawmawm ka ti a. Phur taka kalpui phawt mai hi a nghahhlelawm ka ti hle a ni. Ka lawm e.

**HON. SPEAKER** : A dawta sawi turin, Pi Baryl Vanneihsangi, Aizawl South-III Bialtu zahawm tak ilo sawm ang.

**PI BARYL VANNEIHSANGI:** Pu Speaker, ka lawm e.

Kan ram neihchhunin hma a sawn zel theih nan thlirna hrang hrang atangin ram leh mipuite chanvo tur kan sawiin kan ngaihtuahho mek a ni a. Heng hun pawimawh ah hian kan thinsung hian ramri kham lo se, kan pawl rawng leh nihna ten kan ngaihtuahna hruai kawi lo sela, fim tak leh lai taka rawng kan bawlsak mipuite hmangaihna nen ro kan rela, hei hi a pawimawh hre thar leh theuh turin member zahawm tak takte ka’n sawm hmasa a ni.

Kan budget guiding principle han ti mai ila, a tir berah khan paragraph hmasabera rawn langah hian, point hnih leka han comment ka han duha. Pakhatnaah chuan, ‘Inclusive development’ chungchang hi a ni a, 11<sup>th</sup> Five Years Plan, kum 2007 atanga 2012 chhunga kan neih takah khan ‘Inclusive growth’ hi thupuih an lo hmang tawha. Hetih lai hian keini state-ah chuan kumin budget hi *Inclusive development* a awm theihna tura a tak taka hmalakna leh ngaihpawimawha kan neih hmasakna ber niin a lang a. Hemi tichiangtu chu ‘Gender budget’, kan sawi tak hi a ni a, hei hi a vawikhatna atan budget-ah kan hmu a. Hei hian Sawrkar tih tak tak zia leh kan hnathawh dan turte, a tak ram a thlen dan tur zia te khawvel hmuhah min phochhuah sak niin ka hria a. Chuvang chuan khalai kha sawi lo theilovah ka ngai a.

Tin, a point 2-naah chuan, (Sap tawng a tam deuh hlek a, min lo hrethiam ula) ‘realistic’ kan tih te, ‘transparency’ kan tih te, ‘financial management’ leh ‘accountability’ kan tih chungchang hi han sawi ka duh a.

Budget vawi tam tak pharh a lo ni tawh thina kan ramah hian. Mahse, fiscal target chi hrang hrangte tihhlawhtlin a awm mumal thin lova. An lo sawi tawh angin, ‘lan mawi tumna avanga budget estimate siam a ni thei mai em’ tih te pawh a lo ri ngun tawh hle a nih kha. Chuvang chuan a kum leha budget pharh a nih hunah nasa takin budget revise estimate hmanga siamthat a ngai thin a. Sum hman tawh, a thara Supplementary Demands for Grants hmanga pass ngai tam tham tak a awm leh ngei thin a ni. Hei hi ‘responsible government’ kan tih mai, inngahna tlak sawrkar, rintlak-sawrkar awm dan tur niin kei chuan ka hre lova. Chuvang chuan hei, kuminah pawh hian nikum lam budget-a pharh tawh, sum indaihlohna, ‘Supplementary Demands for Grants crore 3294.16 zet kan nei leh ta a ni’ tih kha kan hmuin kan ngaithla vek a. Heng hi chhan tam tak chu a awm ngei ang tih ka ring a. Chumi karah chuan, a chhan lian ber chu - nikum lam budget estimate a nih laia ‘*a tak ram ngaihtuahna*’ kan ti dawn nge ni, a realistic thinking-a kha a awm tawh loh vang a ni thei em, tih te pawh a ni a. Engpawh chu ni sela, estimate dik zawk, langtlang zawk te, hetiang nei tura chhawpchuah a ni a, ngaihtuahna sen a ni te leh, huaisenna lantir a ni te hi thil lawmawm takah ka ngai a ni.

Pu Speaker, leiba chungchang hi tawitein han sawi lawk ka duh a. Kan leiba chungchanga *outstanding liabilities* – ‘leiba tlingkhawm’ kan tih tam lutuk hi Sawrkar tan mualphona leh financial management-a hlawhchhamna entirtu a ni a. Leiba neihloh thak phei chu thil awmthei pawh a nilo ang. Amaherawhchu, Sorkar thaina a tum tur chu kan sum dehchhuah, kan GSDP atanga chhutin kan leiba hi a tlahniam tur a ni tih nichin lamah pawh kan ngaithla tawh a. Chu chu keipawhin a ka stand, ka point nghet tak a ni a.

Tin, *Fiscal Responsibility & Budget Management Act 2006* amendment 2020-ina road map a siam danah hian kan leiba a zat tur (han ti mai ila, a awlsam zawngin) a tarlan hi sawi ka duh a. (Number a tam deuh hlek a, kum a tam bawk a; min lo hrethiam ula). 2020-2021 - 33.1%, 2022-2022 - 32.6%, 2022-2023 - 33.3%, 2023-2024 - 33.1%, 2024-2025 - 32.8% tein a tarlang a ni. Hei hi Sawrkar kum kal taah te khan, tuna budget speech-a kan hmuh angin 37.84% kha kan leiba ratio a ni a. Tin, nikum chauh pawh ni lo, Ministry hmasaah te pawh kan lo chhiar a, kan lo hmuh ang khan, he road map tihhlawhtlin hi a ni ngai lovin ka hria a. Amaherawhchu, tun tum budget-ah chuan Pu Speaker, i phalnain - budget speech point 6-na kan hmuh angin, nichina Act ka sawi tak, ‘FRBM’ tiin (a tawi zawngin) ka lam mai ang a; target aia hniam daih 29.22% ni tura beiseina a lo ni ta hial hi thil lawmawm tak a ni a. Tih tak takna nena kan

phurrit tihnam zel tura hma kan laka, a tak ram kan thlenchhoh zel hi a nghahhlelhwam takzet zet a ni.

Tin, Pu Speaker, Sawrkar tha chuan uluk takin sum a hmang ang a, mipui phurrit tipung lutuk lova sum hmuh dan a ngaihtuah tur niin ka ngai a. Keimahn bil sum dehchhuah hi 29.22% zeta a pun chuan, (budget speech-a kan hmuh ang khan) crore 2434.81 zet a lo ni dawn tihna a ni a. Hei hi kan total revenue receipt atanga chhutin 19.66% lai a ni dawn a ni.

Pu Speaker, i phalnain - budget speech point 4-naah hian kan Sawrkarin chhiah tam zawk hmu tura hmalakna leh a rahchhuah tur tax revenue punna tur hi Chiang takin a hmu a, a hria a. Hetiang zela kan kal chuan kan Sawrkar hian kan ram mamawh tam tak kan thawkchhuak thei thuai dawn niin a lang a. Hei hian a nghawng tur chu, hmasawna hnathawhna tur sum tam zawk source hrang hrang atanga kan neih theihna kawng zau zawk a rawn hawng dawn a, kawng a rawn zau tial tial dawn tihna a ni a.

Tin, thawhchhuah kawnga Sawrkar hmalakna rah chu, Pu Speaker, i phalnain - point 5-naah khan Chiang takin a lo lang nghal bawka. Revenue surplus crore 564.95 nei thei tura beiseina kan han nei te hi thil lawmawm tak niin ka hria.

Tin, Pu Speaker, ram pum anga tan lak ngaihna lai pakhat, he budget pharhna thusawiah hian hmalakna tur zingah a rawn tel hi ka lawm hle a. Pu Speaker, i phalnain, point 34-naah khan kan hmu a - *Zirna siamthat* chungchang a ni a. 'Quality education system nei tura hmalak tur' tih a ni a. Helai hian education tana sum dahzat, a pung hi 26% niin, Higher & Technical tan hian 32.03% a ni a. Zirna hi investment a ni tih kan Chiang tlang turah ka ngai a. Naupang leh thalai zawk ten kan ram budget an lo hman ve theihna, an lo enjoy ve theihna a nih avangin, ngaihpawimawh hi a awm hlein ka hriaa. Tin, zirna atana sum leh pai kan sen hi kan hnena lo let leh tur leh nakin zelah pawh kan budget tipunga tichhahtu tur, a tha zawnga tipungtu tur te pawh a la ni dawn, hei hi chu. Kan ram ruhrel tak tak, a *backbone* a nih avangin he hmalak tumna hi tha ka ti takzet zet a ni.

Tin, Pu Speaker, Health chungchang kan sawi a, a zawng zawng hi sawi vek ka tum lova. Amaherawhchu, CSR fund atang pawhin hmanni deuh lawk, February ni 8 khan hmalakna a awm a; kan Health Minister-in hma a han la a. Kan ramah hian lung thalo zai ngai tam tak an awm a. Amaherawhchu, zaina tur nei lo, inenkawl na tur neilo te an awm a, chungte tan chuan *Free Medical Camp* te buatsaih a ni a. Tin, zai tur mi 300 inentirah khan, 100 chuang thlan an ni a. Tunah pawh hian zai tura hmalak mek niin, an inthawnchhuak tawh hlawmin ka hria a. Chutiang te chu, mi-harsa zawktena a tak ram an lo enjoy theihna leh an lo chhawr theihna budget kan han nei te hi a lawmawm hlein ka hria a. Khalai hian comment tur tam tak a awm thei awm e; amaherawhchu, ka duhtawk dawn hnai ang a.

Pu Speaker, an sawi thin a, “*A sawi hi a awl a, a taka tih hi a har a ni*” tih te pawh kan ngaithla. Mahse, vawiina he House zahawm taka thu te hi a awlsam china rorel tur kan ni lova. Harsa deuh mahsela, huphurhawm deuhin lo khirh deuh thin mahse, kan thiamna leh theihna hi kan tumna leh inpekna nena a tankawp chuan, “*Tumna a awm chuan, kawng a awm a ni*” tih hi kan zawm tlangin, luang takin he Sawrkar hi chu kawngah chuan a kal ngeiin ka ring a. Kan budget speech ngaihna tak hi a taka chantir turin leh mipuite tan hmasawmna, malsawmna thlen tura dik tak leh langtlang taka hman zel a nih theihna turin ka thlawpna leh ka duhsakna ka hlan nghal a ni e. Pu Speaker, ka lawm e.

**HON. SPEAKER** : A lawmawm e. Tunah sawi turin Lunglei North Bialtu, Member zahawm tak Pu V. Malsawmtluanga ilo sawm ang.

**PU V. MALSAWMTLUANGA:** Pu Speaker, ka lawm e.

A hmasain 9<sup>th</sup> Mizoram Legislative Assembly Budget, 2024- 2025 sawi ve thei tura he House zahawm taka min hlangkaitu Pathian leh Lunglei North mipuite chungah vawiinni hian lawmthu ka sawi nawn leh duh a ni.

Tin, Pu speaker, hetiang ‘budget tha chungchuan’ kan ti dawn nge, tha em em mai, langtlang baw si, Mizoram dinhmun dik tak hmuh theihna, ‘tui let hnuah hetiang budget tha hi a awm leh tawh dawn chuan em ni aw,’ ka ti nghe nghe a ni. Budget min pharhsaktu kan Leader, kan CM (kan Finance Minister ni baw) ka lawmpui hle a. Hun rei tak atangin vawiinni Mizoram tana a vision te tihlawhtling ve thei turin tha thlah lovin, tlawm a hunah a tlawm a, huaisen a hunah huaisen taka ke penin vawiinni a thleng ta a; hetiang budget a pharh vawikhatna sawi ve thei tura ka awm pawh hi ka inchhuang em em a. A bik takin, ‘kan House Leader ka lawmpui hle a ni’ tih ka sawinawn duh a.

Tin, budget hi uluk taka chhiara thlir chuan, mithiam tute emaw ziah mai a ni lo; uluk taka ama irawm chhuak ngeia ziah a ni’ tih a chiang a ni. Hmun hrang hrangah ama tawngkam ngei hmuh te kan nei a, hei hian he budget hi a tihlu hlein ka hria a ni.

Pu Speaker, hei kan inbuatsaih ve nual a, kan senior-te kan han zawt a, ‘*budget discussion-ah chuan lei leh van a leng e*’ an ti a. Amaherawhchu, minute 10 chauh kha kan nei si a, ka inbuatsaihna zawng zawng erawh chu ka rawn dinchhuahpui vek lo ang a.

Amaherawhchu, kan han sawi duh chu, he budget chungchangah hian a thuhma ang reng deuhin - Baptist Higher Secondary School, Serkawn, ka pian leh murna ngeiah ka kal a. Kan school khan school magazine kan nei thin a ni, Annual Magazine. Chu chu a hming kan inphuah siak thin a, khang te kha ka rilruah a rawn lang a. He kan budget

kan House Leader, (kan CM ni bawk) in a rawn pharh hi a hming phuah dawn ila, ‘engnge ka phuah ang aw’ tiin ka ngaihtuah a. Chuta ka thinlunga rawn lang hmasa ber chu – ‘*Sekibuhchhuak-budget*’ tih hi a ni ve tlat mai a ni. Chu chu, he House zahawm takah hian vawiinah hian kan sawi lang ve duh hrim hrim a ni.

Tin, nichin khan ka hma lamah kha, Lunglei South Bialtu, MLA duhawm tak Pu Lalramliana Papuaia khan a lo sawi tawh a. He budget-a mipuite lawmna em ema chu – ‘*sem policy*’ a lang ve tawh lo hi a ni. Kan hria ang a, unit level thleng a ni a. Hetah *group level* a lo awm leh a, party-ah *block* a lo awm a. Tin, chu chang a ni lova, kawng hrang hrangin *district level* te, *General Headquarter* thlengin. Khami piah lamah *MLA* te pawh a ni a. Hun hmasa lama sawrkar kan lo hrawn tawhah te mipuiten tlawm an ngai em em thin a ni. A sema sem dawng tur chuan tlaktlum te a lo ngai a. Hetiang ang a bo tura hi vawiinniah hian mipui aiawhin, he House zahawm takah hian lawmthu kan han sawi leh bawk a ni.

Tin, Pu Speaker, i vei lama thu te’n hun hmasa lamah khan ‘D-A-H he policy a theih loh a ni’ tiin an lo tlangaupui thin tawh a. Mahse, hei vawiinniah chuan hand-holding policy-ah crore 200 chuang dah kan hmu tlat mai. A ropui hlein ka hria a, alo theih teh meuh mai. Tin, chu chang a ni lova, hemi piah lamah hian Central scheme te, State-a scheme awm sa hrang hrangte nen tangkawp tur a la ni leh zel a.

Tin, chumi piah lamah agriculture market assurance fund-ah budget RE-ah crore 110 lai mai dah a ni bawk hi, kut-hnathawktute tan chuan a va han hlu dawn em! Tin, Pu Speaker, agriculture chungchangah hian ka han sawilan duh chu - hei kan Agriculture leh Cooperative Minister, a ngaihna hriain society mumal taka Zoram pumin kan char theih turin *Multipurpose Cooperative Society* ruahman na te an nei a. Tin, chu chang a ni lova, PACS (Primary Agriculture Credit Society) kalpui a ni tur te hi mipui tan a lawmawm hlein ka hria a. A bik takin tlema bank in a la dai loh khua (village) hrang hrangah te he PACS hi a tangkai dawn hlein ka hria a. Mipuite tana thil tangkai tak tur he sawrkarin a chhawpchuak te hi a lawmawm hlein ka hria a ni.

Tin, Pu Speaker, thalai ka nihna zawnah thalai huang deuh (ti mai teh ang) Sports lampang han sawi ve leh ta ila. Hun hmasa lam a sawi kai loh theih lova, rilruin a vei a. Kan hriat angin kan sawrkar hmasaah khan Sports Minister bawh chak tak mai kha kan nei a. 2021-2022, khamiah ringawt pawh khan PMJVKY-ah ₹12,287.86 lakh sports facilities ringawt atan khan Mizoram sawrkar hian a lo hailut tawh a ni. Chuta kan han sawi tum zawka chu, vawiinniah kan han hawi vel a, kan bengari tam ta bera chu - field tling lo; “tlemin a standard size a tling lo deuh a ni; a chuti khati chu a ni; anih tur ang a ni lo” tih a ri tam em em mai a. Chu chuan a tih chian em ema chu – ‘sum awmze neilo ah a lokal ral tam hle a ni’ tih te pawh a langin ka hria a. Chu chu, vawiinniah hian ka han sawi lang ve duh hrim hrim a. Vawiinniah chuan Zoram thalaite nghahfak, Sports Minister - tawn hriat ngah tak, a ngaihna hria, mi viak tha tak mai kan nei a. Skill



development lampang sawrkarin a ngaihpawimawh te pawh kal chhohpui a tum viau mai a. A bik takin, kan Sports Minister hi kan han sawilan duh chu - zingkar atangin mahni in lum chhuahsanin, ‘thalaite tan’ tiin hmun tin kil tin a fangkual a, sports facilities hrang hrang kan neihte, ruahmanna awm mekte a tlawh a. He session-ah ngei pawh hian chaw ei hman lova a rawn kal a tam a ni. Chutiang Sports Minister kan nei te hi a lawmawm hlein ka hria a. Tin, Lunglei lamah, skill development kawngah ‘*Khelo India*’ kaltlangin table tennis coaching centre kan nei tur te pawh hi a lawmawm hlein ka hria a.

Tin, Pu Speaker, ka hma lama member zahawm tak tak, duhawm tak tak ten an lo sawi tawh a; *gender* budget hi kei pawh ka lawm hle a ni. Hei, crore 74.27 chuang School Education Department-ah te, Social Welfare Department-ah te, dah a ni a. Hetianga intluk-tlanna kalpui a ni tura pawh hi a lawmawm hlein ka hre bawh a ni.

Tin, MLA kan nih hma atang leh kan campaign lai bakah vawiinni, MLA kan nih hnu thleng pawha phone call ka dawn tam ber te zinga mi chu – *healthcare bill tang chungchang* hi a ni. ‘Engtikah nge kan bill a chhuah dawn’ tiin, nutling-patling an rum a, an tap a ni. Tin, chu chang a ni lova, ‘kawangaih takin kan bill te hi min lo nawr sak ve thei em’ tih tein phone call ka dawng tam hle a ni.

Kan budget hi uluk takin han thlir ila, healthcare bill ba rulhna atana crore 40 lai mai dah a ni te hi, henga harsatna tawh mek lungngai tam takte chu an eng a va thawl dawn em! A lawmawm hlein ka hria. Chu chang ala ni lova; ruang phurhna budget-ah crore 5 chuang dah a ni hi a lawmawm hlein ka hria. A bik takin kan Minister leh Social Welfare Department Minister te chungah pawh an hmalakna avangin lawmthu ka sawi nawn leh bawh a ni.

Tin, Pu Speaker, electric bill te pawh tihpun a ni dawn lova, chumi piah lamah solar hmang tura hmalak chhoh mek a ni a. Tin, kan Minister pawh kan sawrkar tukah Central lampangah a theih ang anga fund zawngin ke a pen a, chutiang chuan tunah hian chak taka hmalak mek a ni a. Ka hriat soal loh chuan, Lunglei lamah te pawh solar park ruahmanna a awm chho dawn ni te pawhin ka hria a ni. Tin, chu chang a ni lo va, Pu Speaker. Consolidation year-ah kan han inpuang a, chutihlai mek chuan ka han sawi kual tel duha chu – thawk khat deuh lai khan i vei lama thute khan, “ZPM-sawrkar chuan chhim lam a ngai pawimawh lo” tih kha a ni a. Amaherawhchu, budget-ah chiang takin chhim lampang a lo ngaihpawimawh hle tih a lang a, Lunglei ringawt pawh HPC fund crore 2-in a pung dawn a. Tin, LMC-ah ringawt pawh crore 602.97 chuang dah a ni a. Chu chang a ni lova, kan sawrkar tukah hmalakna - tui lama Lunglei kan harsatna kawngah hmalakna hrang hrang a awm a, chung zingah chuan - Upgradation of Greater Lunglei supply scheme crore 55.94 chuang first priority ah state sawrkar hian min dah sak bawh a; NESID atanga sum hmuh beisei a ni.

Chu chang a ni lova, kan PWD Minister pawh, a hmunah ngei hnathawkte a rawn vil nghal a, a rawn tlawh nghal a. Chutiang zelin Engineering College building tawl mai tur te pawh kan Higher & Technical Minister-in min rawn tlawh sak nghal bawk a ni. He budget hi Pathian-in Lunglei tana a remruat niah ka ngai a, chhimlam a hawi hle mai; Lunglei ringawt pawh khati kha a ni a. ADC lampang te, saw lam council lampang te phei chu sawilang lo ta ila. Chu chang a ni lova, *Consolidation Year* a ni chung pawha capital outlay lai hi Pu Speaker, ka han thai lang ve leh lawk ang e.

Kum kal lai mekah hian BE ah crore 1696.68 dah a ni a, chuta tanga a punna chu crore 1953.75 a ni. Tichuan, a vaia a punna chu crore 257.07, 15.1% lai a ni. Inrenchem kan kalpui chung pawhin, chutiang chuan sawrkarin zoram hmasawna ruhrel tha zawk a kalpui theihna turin a la dah a ni. Chu chang a la ni lova; kan sawrkar chuan development rualkhai takin a kal a duh a, chumi kawngah chuan hun hmasa lama kan lo hriat tawh thin ‘opposition bial tlemin a ro deuh bik em’ tih thin te pawh kha, he budget atang hian han thlir ta ila, a danglam dawn hle a ni, a tha zawngin. MLA Fundah ringawt pawh crore 60 atangin crore 80 ah tihpun a ni nghe nghe a ni. Chu chu, *consolidation year* puan lai pawhin chutiang chu a ni a. He budget hi kei chuan ‘a tha tawp a ni’ ka ti lo thei lo a ni. Pu Speaker, sawi tur tam tak a awm a, a tawp lam ka hnaih dawn ang e.

Corruption dona chungchanga CBI-ah general consent a pek te pawh hi a tha hle ka ti a. Tin, Mizoram State Project Monitoring Committee te, chumi piah lamah ruihhlo dona kawngah a takin budget-ah crore 50 dah piah lamah, sawrkar lak luh niah kan CM meuh pawh hemi kawngah hian a takin hma a la dawn a ni tih lantirna atan te pawh a ni a nge; *Tawngtai Bethel Camping Centre* te a zu tlawh nghe nghe a ni. Hei hian sum mai ni lo, a takin he sawrkar hian ruihhlo a do dawn a ni tih ka han sawi lang duh a.

Tichuan, a tawp ber tak takah, Pu Speaker, ‘tar-pension’ lai hi ka sawi duh a. Tun kan han MLA tirh khan kan bialah chuan kum tin krismas dawna tih thin a ni a, ‘mawzalum, kawrlum, tuilum-ip te i rawn sem ve dawn em’ te an ti a, ka rilru a khawih hle mai a. Chuta ka chhanna chu – “keini kan policy ah chuan, hrawk bawk chin chunglam ni lovin, a takin tar leh upate hi kan hmangaih tak tak dawn a, an hmakhua kan ngai dawn a ni. Chuvang chuan, tar pension Mizoram sawrkarin cheng 100/-a a lo do let thin chu, cheng 1000/- in kan tipung dawn a ni” kan ti a. Chu chu a taka hmuh tur vawiin niah a lo awm te hi a lawmawm hlein ka hria a ni, Pu Speaker.

Aw le, hetiang budget tha discuss-naa sawi ve thei tura ka awm hi ka lawm hle a, he budget hi a tha ka ti a, ‘I pawmpui ngei ang u’ tiin Pu Speaker, hun tawp ka han khar ang e.

Tichuan, ka la rei tawh hle naa, thil pakhat – hei, ka bul, ka chheh vela thute hian, “*Pu Chairman* kha an ti fo mai a. Ka han zawt chiang a, kan House Leader khan a remti tho

a; kan fiamthu thawh vena a ni, *Pu chairman* kan tih kha” an ti a. Kha kha ka han sawilang ve a ni e. Ka lawm e.

**HON. SPEAKER** : A lawmawm e. Aw le, Tuichawng Bialtu, Member zahawm tak Pu RM Chakma ilo sawm ang.

**PU RASIK MOHAN CHAKMA:** Pu Speaker, ka lawm e. Tun hi budget general discussion a ni a. India Parliamentary System hi a tha ve riau mai a; General Discussion ah chuan duh duh sawi theih, mahni duhthu a sam theihin ka hria a. Khawiah pawh Parliament ah te, State ah te, Assembly ah te pawh kan practice dan a ni a. Chuvangin, budget lam sawi loh pawh a pawl lo turah ngai ila; budget nen relate em em kher lo pawhin.

Pu Speaker, tun tum budget hi thil thar pahnih-pathum lai mai kan hmu a, a zawng zawng chu ka sawi lo ang a. Gender budget kan neih vawikhatna niin ka hria a, kan Assembly hi a tha ka ti em em a ni. Society ah mi duhsak bik leh ngaihsak bik ngai kan women te, children te an awm a. Chuvangin, an chanvo tur a hriat theih kha a tha em em a. Gender budget a lan danah chuan, a tam ber chu centralist sponsored scheme a ni deuh maiin ka hria a; on-going a ni a, thil thar lutuk chu ni lovin ka hria a. Mahse, a hrana gender budget statement awm hi a lawmawm hrim hrim a. Hei hi kan hman dawn chuan, tun aia a target group tena an chanvo an hriat turin awareness te, mipui educate theih dan te hi awm bawk sela, a chhan sawi tur pawh ka hria a. Tin, a guideline te Mizo tawng ringawta duh tawk mai lovin Chakma tawng tea lehlin dan te awm sela, Mara tawng te pawhin. A chhan chu, state language a ni a, kan thiam tur a ni a; mahse, kan la thiam lo miao a. Khang te kha kan chhawr theih lohin an awm palh ang tih ka hlau avangin, hetiang hian awm theih dan awm se duhthusam a ni.

Tin, hemi thil thar min hmuh tira ka beisei dan chuan, Performance Budget pawh hi ti ve ta se, ka ti a. Hmanni lawkah sorkar i veilama mite hian sorkar vanga mahni infak hreh deuhna an rilrua a awm vang nge, ka ti deuh a. Engpawh ni sela, nakum atang chuan performance budget pawh hi awm ve ngei turah beisei ila. A chhan chu, budget kan pass a, thil zawng zawng kan achievement kan hriat tak tak theih loh te pawh performance budget a awm chuan kan hre thei turah ngai ila, helai member thute hian Pu Speaker; chu chu ka suggestion a ni e.

Tin, Mizoram hi central sorkar pawh hian min phut ve thin a. District Planning Development Board kan la nei thei lo hi engnge a chhan niang aw, ka ti a. A chhan chu, hetiang district level thil hi state atang khan a hriat chian theih tak tak loh; District Level Planning and Development Board a awm loh chuan duplicacy hi a awm thei a ni. Department tam tak anmahni duh duhin an proposed a, tin, central sorkarin area bik scheme programme a nei thin a. Khatah khan duplicacy te hmasawn dan kha a theih tak tak loh a ni. Ka hriat chian em em chu, nikum hmasa lawkah khan Parva-3 ah

primary school district council atang khan kan sa a, a hnuah DC lam atang khan backward block ground atangin pawisa a awm leh a, kha sum kha a uiawm ta em em a ni. Kha kha NEC scheme anih avang khan hmun danga divert a theih si lova, project kha an hlau si a. *Entirnan*: Khaw pakhatang khan primary school pahnih an sa ta ringawt a ni, ka tihna a nih chu.

Vawikhat chu Parva ah bawk Health Sub-center an sa a, YMA te khan ‘contractor khan a sa tha lo’ tiin, min phone a ni. Pu Speaker, kan CMO khan “khatiang Health Sub-Centre kan sak ka hre lo” a ti ta daih mai a, District Planning & Development Board awm se chuan an inhre tawn dawn a, DC lam atang khan work order chhuah kha a concerned department-in a hre tlat lo mai kha a pawl em em a ni. Chuvangin, Central sorkarin min phut bawk a, District Planning & Development Board hi siam theih dan a awm lawm ni, senso tur vak pawh a awmin ka hre lova? Office-ah officer tlem chu a ngai ang a, staff lak belh pawh a ngaih ka ring lova. Khatiang zawng khan kal theih dan awm se, thil tam tak, a duplicacy te kan pumpelh thei dawn a ni. Hei sorkar thar, *kalphung-thar* a ni bawk a, thahnemngaihna atangin proposal ka han siam ve a ni.

Tin, Pu Speaker, central sorkarin development gap nasa lutuk awm hi a vei em em a, Mizoram pawh special category State-ah specific deuhin min enkawl a ni a, khatiang State dang pawh an awm a. Tin, he State chungah pawh hian development gap a awm a ni. Central sorkarin party lam tel lovin, tu party pawh sorkar sela, kha kha a ngai pawimawh a, a specific programme hi an siam thin a ni. *Entirnan*: tunhma RSBY te, BRGF te, Backward Region Grant te, Minority MSGP te, tunah PMJVK kan tih te, Aspirational District te sorkarin khatiang taka a ngaihpawimawh lai khan, state chhungah hian area specific approach-a development gap awm hi tih ziaawm dan awm se a lawmawm khawp ang a. A chhan chu, Mizoram, state te takte ah pawh hian development gap a awm nasa a ni.

Tin, tunah hian Mizoram, (India ram hmun dangah te pawh a ni tho a) khawpuia pmlut hi an tam em em mai a, khawpui an ti congest a. Khatiang policy kha tun atangin nei ila, thingtlang mite, khawpuia amenities an hmuh ang kha thingtlangah pawh provide theih dan awm sela chuan, khawpuia pem an chak em em lo ang. Tunhma khan central sorkarah pawh khan a scheme hial an launch a ni a, “Providing of Urban Amenities in Rural Areas” tiin. Tunah pawh hei hi a la awm maithei a, ka hre lova. Kum 2004-2005 bawr velah khan sorkarin kha scheme kha engchen nge a kalpui ka hre lova. (Aw, a awm tawh lo maw?) Khatiang hawi zawngin state ah pawh hian policy adopt dan a awm thei em, tih hi ka ngenna ni sela.

Tin, Pu Speaker, road maintenance chungchang hi nichina ka hmaa sawite pawh khan an vei nasa a, kan maintain that tak tak hi ka ring lova. Chuvangin, a sawia sawi mai ni lovin NREGS ah hian sum, PWD road-a *Annual Jungle Clearance* te hi thingtlanga awmte hian PWD ringawta innghat lovin, sum indaihlohnaah khan NREGS pawisa te

hi hman tangkai dan a awm ang em aw, ka ti a. Budget siam dawn khan department pahnih khan sawi ho sela. Khangte kha a technical vak lova, jungle clearance hi; a khua amite khan an ti mai dawn a. Tuna an tih hi a tangkai/tangkai lo ka tihna ni lovin, tangkai lehzualin heng hi kan hmang thei dawnin ka hria a ni.

Tin, Pu Speaker, road maintenance hi a hautak a, kawng thar kan mamawh bawk si a, (*Warning bell a ri a..*) maintenance a tan private suggestion a awm thei em, tih hi kan sorkar hian ngaihtuah sela a tha awm mang e aw, ka ti a. Mi ramah pawh toll gate an siam a, tunlaih chuan mipui chuan a service kan duh a ni; chutiang em emin na kan ti miah lovang. Kawng hi tha taka maintain theih ni se chuan an phunchiar pawh ka ring lo. Maintenance/service hi kan mamawh; engmah sawi lova hreawm taka zina motor a chhiat zung zung ai chuan a tha zawk daih a ni. Kawng hi tha sela tih kha.

Tin, Pu Speaker, in hriat angin Mizoram-ah minority te kan awm a, kan tradition leh culture te vawnhima, preserve leh promote kan duh a ni. Central sawrkar pawh hian he scheme hi a la nei a; festival kan hmanna ah khan Tribal Affairs-ah pawh scheme a awm a, cultural ministry ah pawh a awm a ni. Khangte kha kan sorkar hian proposal kan siam hunah min ngaipawimawh saka, state sum hmang miah lo pawhin khangte kha kan tithei a ni. Mahse state sorkar puina lo chuan a tih tak tak theih loh a. A project kan siam ang a, kan sum dil te state-a officer ten min bawhzui sak chuan. Tripura ah khuan kum tinin Biju festival kan Chakma ten an hmang thin a, helai Mizoram-ah hian kan awt em em thin a ni. Chuvangin, khangte kha min hriatpui sela.

Tin, language chungchangah khan, a mak khawp mai a. 2011 census ah khan Chakma population 96,000+ a ni a, tun thlengin Chakma language hi state-recognition a la ni lova. Linguistic Minority Commission Report ah khan 'Bengali speaker' tia ziah vek a ni a, a mak lutuk; a ridiculous lutuk; a awmlo lutuk. Khang te kha a ni a, Chakma Speaker kan awm na na na. Khang te kha state sorkar thuneihnaa awm a ni a, min recognize theih dan awm sela. 'Chakma Speaker an awm a ni' tih kha a ni mai a.

Tin, tunlai issue, broom-stick chungchang hi sawichhuah hlek ka duh a. Pu Speaker, hei, hi tunlai Mizoram-a burning issue a ni. A chingtute'n an tharchhuah an hralh thei lo (**Hon. Speaker:** Minute thumin a pel ta e. I tawp thei tawh mai em?) Aw le, ka sawi zo tep e. Nagaland ah chuan, ka hriat dan chuan sorkarin an sawi ang chiah khan hmunphiah kg khatah 100/- tiin a puang a, farmers ten an hralh thei chuan a tha a; an hralh theih loh chuan sorkarin lei sak in a auction leh mai thin a ni. Chuvangin, tunah crore 110 kan nei a, mipuite khawngaih avangin khata tang khan a lei sak mai a. Tunah chuan vairam atanga hmunphiah leitute chuan tlawm thei ang bera lei an tum dawn a ni. Mahse, sawrkarin 100/- in lei sak ta sela, khami hnu ah auction mai sela, hlawk takin. Nagaland ah pawh mipuite tawrh tir ai chuan, tlawmah la lovin tanpui theih dan awm sela tih hi ka ngenna a ni.

Tin, a tawp ber atan chuan, Pu Speaker, District Council pathum kan awm a, (a figure nen ka sawi lo ang a,) pawisa allot dan, an relbawl dan, administrative structure kan inang vek a. Mahse, pawisa allot dan disparity hi a sang lutuk a ni; a intam hleih lutuk. Chuvangin, kha disparity kha tihlem dan awm sela ka ti khawp mai. District Council theuh theuh, in relbawl dan structure inang theuh theuh; a hmu tamte ka thikna a ni lova, Lai leh Mara kha, mahse, a hniam leh lutuk awm kha eng vang nge enchian ni se. Anmahni kha tih tlem ni se ka tihna a ni lova, disparity awm thin kha tih tlem dan a awm em tih kha, sawlai mipuite ngenna leh duh dan ka han sawi a ni. Chu chu tawk mai sela.

A budget tlangpui chu a tha a, thil thar a awm a. Mahse, a taka chang ngei turin i veilama thute pawh khan thinlung thianghlim takin kan pui dawn a, constructive zawngin kal hram kan tum a. Tin, rem leh rem lova tute emaw tihmingchhiat leh innek zawng, khatiang attitude kha paih theuh ila, kum eng emaw zat hnuah khan helai i veilama thute pawh khan lawmthu sawina motion pawh sorkar sumah khan pulut thei ngei turin, khatiang boruak siam thei turin ka ngen ni rawh se. Ka lawm e.

**HON. SPEAKER** : Tunah chuan, Lawngtlai West Bialtu Member zahawm tak Pu C. Ngunlian Chunga ilo sawm ang.

**PU C. NGUNLIANCHUNGA:** Pu Speaker, ka lawm e. Ka hritlang deuh hlek a, ka aw tlemin a chhang deuh a, min hrethiam dawn nia.

Aw le, vawiih Budget Session tun sorkar thara a hmasa ber kan han nei thei hi a lawmawm ka ti a. A pakhatnaa ka sawi duh chu, helaiah Pathian leh kan bial mipuite avangin ka lo thu ve tawh thin a. Sorkar hmasa lama ka lo sawi tam ve ber chu - Revenue Expenditure leh Capital Expenditure, a tak ni lo, kum tawpa Supplementary Demand a tihdik leh ngai fo thin hi a tha lo a ni tih hi ka lo sawi ve thin a; vawiih budget kan han hmuh theih chinah hian a lawmawm ka ti a. Hei, Revenue Expenditure atan 82.97% leh Capital Expenditure-ah 17.03% a kal dawn a, hei hi chu ‘a dik deuh awm mang e’ tiin kan phak tawkin kan han en ve a, a lehkhabu te. Nikum lamah kan pawisa hman tak, helai pawha kan hnung kara kan han passed tak *Supplementary Demand for Grant* kha han en ta ila, pheh tin deuhthawah khan salary indaih lo pekbelhna kha hmuh tur a awm a ni. Chu chu budget siam lai pawh khan kan sawi chu – “Revenue Expenditure hi mipui bum nan in titem a, Capital Expenditure hi in dah a, a tawpah helai pawisa hi Supplementary Demand-ah in rawn ti leh dawn tho si a” kan ti kha a ni a. Vawiih kan House Leader zahawm tak, kan Chief Minister ni bawh pawh hi a tanna a ni thin a. Vawiih a zawng zawng chu a kim hauh lovang tih chu ka ring a. Amaherawhchu, hetiang nihna anga lang ngam budget kan han hmu hi a lawmawm ka ti a.

Chutihruah chuan, kan budget hi a thu en chuan a tha khawp mai a, a tak ram erawh hi kan thlen zo vek ang em tih erawh chu, rilruah ngaihtuahna a awm a. Pu Speaker, kan Finance Minister speech No. 7-ah hian, Pu Speaker, i phalnaiin ka han chhiar ang a -

Reserve Bank of India (RBI) hian State sorkarte chu Reserve Fund pahnih a vawn sak a, chungte chu -Consolidated Sinking Fund leh Guaranteed Redemption Fund te a ni a. Kha kha tihsual palh nge ni, khalai kha ka hriatthiam loh lai pakhat ka zawh duh chu - Fund investment atanga interest nena tlingkhawmte chu state sorkar contingencies liability rulhna atan hman tur a ni ber a, kum 2023 leh 2024 chhunga CSF atana sum kan invest tawh te chu crore 19.44 niin, crore 12.96 invest belh leh tum a ni bawk a. Hemi nen hian kum kal mekah a vaiin crore 32.40 invest a ni dawn a ni. Tichuan February 2024 thlenga he fund hnuaiia sum tlingkhawm tur chu crore 374.66 tih daih kha, kha laia kan invest kha crore 32.40 kha a ni si a. Kha kha a interest nge ni? Khalai kha ka hrethiam lo tlat mai a.

Tin, a pahnihnaah, GRF erawh chu state sorkarin a hnuaiia institution-te tan loan guarantee a pek theihna tur leh, tluchhe mai tur awmte tlanhhuah nana hman atan ruahman a ni. February, 2024 thlenga GRF hnuaiia principal a invest tawh zat chu crore 64 ni tawhin, tun financial year chhung hian he fund atang hian crore 24.62 chu withdraw a lo ni tawh a, crore 2.70 kumin chhung vek hian invest tawh a ni bawk. Tin, crore 10.80 invest belh leh tum niin, chuti chuan kum 2023-2024 tawpa balance kan neih tur chu crore 45 a ni ang a ti a; kha kha engtin nge? Keima chhut ve dan chuan, crore 52.88 ni tura belhkhawm a ni a, crore 45 chauh a nih dan kha nakinah min react se ka duh a.

Tin, Serial No. 12 - SASCI, sorkar hmasaah khan crore 694 pek a ni a, crore 463 released a ni a, chuta tang chuan implementing agencies te hnenah crore 200 pek a ni. Tichuan, crore 263 a la awm a, kha kha engtia tih tur nge ni ang aw ka ti a.

Tin 13-naah, hei kan sorkar, wawiina mi hian sorkar hmasa a rawn sawilang deuh pawh niin a lang a, pension retirement benefit te pawh crore 283.13 lai Treasury-ah a la awm thu te kan hmu a. Hengte pawh hi an nghakhlel em em mai a, pek theih dan te hi a awm nge awm lo; heti zat zat la tang mai te hi?

Tin, ‘*kalphung-thar; mipui sorkar*’ tih point 14-naa lo lang, heta lawmawm ka tih chu, ‘kan hmelma kumhlun *hlemhletna* hi theihtawpa do turin kan inbuatsaih’ a ti a, a lawmawm ka ti, hei hi. Wawiina kan ram ina kan thanmawh-bawk ber leh hma kan sawn hlei theih lohna chhan chu, he ramah hian hlemhletna a zalen lutuk hian kan ram min ti hmasawn thei lo a ni. Chutianga ‘hmelma kumhlun’ han tih tawp tuma ziaka han dah pawh hi a ropui ve hrim hrimin ka hria; kan Chief Minister (Finance Minister ni bawk) hi a huai ve bawkin ka hria a. Hei hi a taka do ni ngei se ka duh a ni, keipawhin. Chumi tur chuan ka support khawp mai tih ka han sawi duh a.

Tin, 19-naah khan “Resource Mobilization Committee’ din a ni a, hma a la dawn a. Chuta hma a lak tur zingah chuan machinery hman tlak tawh lo tih ral disinvestment leh thawktute dinhmun zirchianta a ni ang” a ti a, helai point pawh hi a pawimawh ka ti

a. Ka lo tih ve thin chu, sorkar machinery a bikin motor hluite, khawl hlui la tha tak tak tih riral loha dah tawihral mai a ni thin hi ka veina a rei ve tawh khawp mai a, keipawh. Hengte hi man man zawk a ni lem lo a nih pawhin, auction-a tlem a zawng tete a lo luhkhawm khan Mizo tawng upa-ah ‘*tuimal far te te in tuipui lian a siam*’ a tih ang deuhin, khatiang khan kil tin atanga hluihlawna, bawlhhlawh bawma paih mai ni lo deuha heng tih ral dan te; a tlan tlak tawh lo deuha kan ngai a nih pawhin, sorkarin hmantlak tawh lo deuha a ngai a nih pawhin, mimal tute emaw chuan hmanraw tangkai takah la hman theih a ni a. Tichuan, a leitute tan pawh kha kha thil hlu tak a lo ni thei a ni.

Tin, chutiang chuan ‘a thawktute dinhmun zirchian a ni ang’ a ti a, hei hi a pawimawh ka ti. Vawiin nia kan sorkar kalphung hi a manganthlak ka ti a, kan Secretariat – MINECO ah khuan Secretary pakhatin department pakhat a han enkawl te khu a manganthlak ka ti, kei chu. An hlawh ni se, a tam em em mai a, Secretary pakhatin department 3 te emaw han enkawl sela, department lian em em pawh ni lo; chutiang chuan tul lem lo hi kan ngah khawp mai zel a. Khatiang te huaisen takin kan sorkar hian hma han la tak tak se ka duh a. Hemi kawngah hian ka support khawp mai a.

Tin, 20-naah khan CBI koh luh hi a tha ka ti. Chutih rualin CBI ko lut lo hian keimahni in Lok Ayukta Chief Minister thleng pawh a hrem thei tur kan nei a. Vawiin ni a kan House Leader hian (**Hon. Speaker** : Khawngaihlin. Kan chawhma hun a tawp a; hei, a sawi laklawh viau mai a, kan sawi zawh tir law law mai dawn em ni?. (*House-in sawi zawh tir law law a remti a*) Hemi chungchangah pawh hian Lok Ayukta pawh hi tichak ila, keimahni ina kan kut a awm midangin ‘*Nahaia chu ni se a lo thei mai ang a*’ ti lovin, keimahni kutah Lok Ayukta a awm a. Lok Ayukta hi thuam chak ila, tichuan hlemhletna leh khatiang kan hmelma kumhlun kha a tul chuan, a dik lo chu tang mai se, hrem ngai chu hrem mai ila, ngaihdam theih chin an awm a nih leh ngaihdam mai ni se. CBI koh luh ka support rualin, keimahni ina kan kuta awm mi kuta central a mi pawh kher ngai lo hian keimahni hian han ti ila, ‘kan tih theih a ni a lawm maw le’ tih hi ka han sawi duh a.

Lok Ayukta chungchang pawh ziah lan a ni a, non-development expenditure (b)-ah khan department hrang hrang enkawl turte a ni a. Chumi zingah chuan 1-ah khan Lok Ayukta kha a tel ve a ni. Chuti ni loin Lok Ayukta thuamchakna atan hian budget head hranah pawh hian sum dah ila, kan Lok Ayukta-te hi chak takin ‘Chief Minister pawh man ngam, man thei kan nei a ni’ tih hi helai House-ah pawh hian sawi rik thin a ni. Amaherawh chu, a taka function erawh chu hmuh tur a awm lem lo a ni. Chumi avang chuan, hei hi tichak ila, thuam chak ila, nasa takin hma min lak sak thei dawn a ni.

Tin, lawmawm ka tih, lawmthu sawi tur point-27-na, Social Welfare ah khan, keini hi thingtlang lam bialtu kan ni a, mitthi ruang phurh hi a manganthlak khawp mai a. Eng emaw chang pheih chuan pakhat a va dah karah a dang an lo thi leh a; motor nei reng si



khan motor dang hman a lo ngai a. Keimahni motor MLA fund-a kan han lei ve te kawl thin mah ila, a tui thunna te a lo ngai a. Chutiang reng renga thingtlang bialtute kan manganna hetiang sut kian a han ni tur te hi a lawmawm ka ti a.

Tin, tar-pension ₹100/- belh thin ₹1000/- a han kai chho tur te, ‘tar ho’ kan han tih hi an mak ve khawp mai; ₹200/- an hlawh pawh hi an lak theih loh hian an mang hi a ang a ni. ₹100 - 200 te an va lak ve pawh khan an lawm em em mai a. Vawiin niah upate hetiang duhsakna kan han nei hi a lawmawm a. Hemi old-age pension ah pawh hian chi hrang hrang a awm a, khangte pawh kha enzui hlawm ni ta se a tha ka ti a.

Tin, healthcare chungchangah sorkar hmasaah khan crore 50 dah leh, revenue atangin crore 10 a ni a, crore 50 dah a ni. Chutih mek lai chuan crore 35 chauh kha he speech atang hian a lang a, released a ni a. crore 25 kha engati nge kan pek loh? Heti khawpa kan mipui mirethei zawkte healthcare scheme hnuaia in registered tawh, bill nghakhlel em em te kha kan budget a awm crore 60 atangin crore 35 kan pe a, crore 25 kha engatinge kan lo pek loh tih, kha vawiinah pawh hian Pu Speaker, kan House Leader hian a chhang thei kher lo maithei a, a chhan chu a hun hma thil a nih avangin. A manganthlak ka ti a; khatiang khan budget-a kan neih tawh hi chu, hei kum tawp tur a ni a, pawisa a thleng tur ang ang a thleng vek tawh, helai kan healthcare ah.

Tin, he sorkar hian healthcare tha zawk ruahman kan tum a, chutih lain crore 20 kan han dah a, SEDP hman loh atang khan kan ngaithla tawh a, crore 40 kha a awm bawk a, nikuma an hman ban crore 25 a lo awm bawk a. He sorkar thar hian leiba a han rulh hian healthcare-ah hian chhungkaw tam tak he thil a inngat a, thenkhat phei chu ‘healthcare-ah kan bill dawn tho a, pawisa kan hmuh hunah kan pe ang che u’ tiin thenawmte ta te, midang ta te pukin an awm a ni a. Chuvang chuan, tun kan sorkar hian tha tak hi chu kan kalpui thei rih deuh lo ang a, kan sum dah danah hian tih kha Pu Speaker ka hmuh ve dan a ni a.

Tin, a tawp ber atan chuan, lawmthu sawi a pawimawh hlein ka hria a. Autonomous District Council chungchang hi han sawi vak ka chak viau a, mahse hun kha a tlem tawh si a. ADC in setup dan saw kan hriatchianpui a ngai. India Constitution 6<sup>th</sup> Schedule hnuaia piang an nih lai saw kan hriat sak a ngai ka ti a. Speech-ah pawh kan hmu a, kan sum pek danah pawh hian heti hian ziak a ni a, “Grant in aid general angin pek a ni ang” a ti a, “Object head-ah grant hnuaiah dah a ni ang” a ti a. Tun hma kha chuan grant in aid salary leh non-salary-a then a ni a, kum hmasa te, hmasa leh lamah te pawh salary-ah chuan zawi zawiin increment-te kan lo hmu a, a lo pung ve zel a. Non-salary ah erawh chuan nuai 1360 pek an ni thin a, kha kha non-salary a ni. Chu chuan office maintenance, vehicle, OE khangah khan hman ve a ni a. Vawiin nia hetiang head khata Grant-in-aid General anga kan pe tawp lai hi a fuh dawn em maw ni ka ti a. Sawlaih engtin nge miin an lo then tak ang, kan pawisa pek dan kha. Hetiang a kan pek hian sawlamah khan tun hma chuan ka sawi tak ang khan ‘Grant-in-aid salary tan; non-salary

tan' tia kal thin a ni a, tunah chuan salary leh non-salary tih kha a lang ta lo tlat lai hi; sawlaiah sawn an lo then sawm ta mai dawn tihna em ni? Anmahniin budget sectoral allocation kha an lo insiam ve mai dawn tihna a ang ta a.

Chutih rual chuan, District Council-a hruaitu ambitious, deuh mahni hmasial deuh an awm chuan, a non-salary lam dah lo khan a salary-ah nam lut vekin 'hna kan la thei a lawm; post kan create thei a lawm' tih zawng khan kal ta se, kan sum hmuhna khalai kha ramri a kham si loh chuan a felhleh deuh ang em aw ka ti a. Tun sorkar tharin district council-ten thuneihna an neih ve, an House-a hlawh an in pun, anmahni pay and allowances chungchanga dan an neih ve te sorkar hmasa khan nasa takin an nawr ve thin a, an tichhuak zo lova. Sorkar thar lo piangin district council-te helai pawha helama kan hotupa waviin nia kan House Leader zahawm tak a thut lai pawha, "district council-te hi an nih tur angin keini chuan direct finance a nih pawhin, kan recommend ang" a tih kha waviinah a takin a tilangin ka hria a, a lawmawm ka ti. Chutih rual chuan, waviinah he House kaltlanga ka sawi duh chu, district council-te pawhin sum leh pai kan hmuhte pawh hi dik takin, langtlangin, mite hriat theih tur leh mite hmuh theih tura kan hman hi kan bat a ni ve a ni, tih hi kan hriat pawh ka duh a ni.

Pu Speaker, he budget waviina kan pharh kan House Leader, kan Finance Minister hi political platform-ah budget pawh la pharh ve ngai lo an ti a, a pharh vawikhatna a ni a. Eng emaw pawr lai deuhte chu sawi dawn ila sawi turte chu a awm ngei ang a. Amaherawhchu, a tha chungchuang lutuk ang deuha han sawi kha chu, a chungchuang lutuk bik em aw? A tha thawkhat a, he budget hi. La awm ngailote pawh a awm a, a lawmawm viau e. Pu Speaker, ka lawm e.

**HON. SPEAKER** : A lawmawm e. Tikhan kan chawl leh ang a, chawhnu dar 2:00 PM-ah kan thukhawm leh dawn nia.

*(Recess)*

## **2:00 PM**

**HON. SPEAKER** : "The Annual Budget for the Year, 2024-2025" chungchang kan Finance Minister leh kan Chief Minister ni bawkin a present chungchanga discussion kan neih kal mek kha a ni a. Tunge han sawi leh ang le? Aw, Tuirial Bialtu, Member zahawm tak Pu K. Laldawngliana i lo sawm ang.

**PU K. LALDAWNGLIANA:** Pu Speaker, ka lawm e. Kan hriat angin, ZPM Sawrkar, mipui sawrkar tharah a vawikhatna atan Finance Minister Pu Lalduhoma, kan Chief Minister ni bawk chuan Budget 2024-2025 chu a han pharh ta a ni a. Mithiam tak tak tan pawh budget hi thil awlai a ni lova. Policy leh principle awm bawk mahse, budget hian document tam tak ken tel a neih avangin, inzirna hun leh inbuatsaihna hun nei tam bik lo chungang regular budget pharh a ni ta hi a lawmawm hle in ka hria a ni.

Pu Speaker, kan hriat angin, MNF Party chu sawrkar khalh ngiltu tur, Opposition kan ni a. Tul lovah sawrkar chirhtheha, thudik hrula dik famkim si lo hmanga inbeih vak vak hi kan tih turah kan ngai lo a. Chuvangin, fak a tulnaah faka, sawisel a tulnaah sawisel hi kan tih tur a ni a. Tun kan budget kan en hian sawrkar leiba projection hi GSDP atanga tehin tlakhniam lam a pan zel a, hei hi thil lawmawm tak niin ka hria.

Pu Speaker, i phalnain, Annual Financial Statement kan en chuan kumin 2023-2024 RE leiba chu GSDP atanga teh a 32.29% ah a tla thla dawn ta tih kan hmu a. Kum thar leiba tur chu 29.22% of GDP ah a tla thla dawn tih kan hmu a ni. A lawmawm hle a ni. Pu Speaker, tun budget a lo lang, mipuite tan a lawmawm deuh deuh te tarlan ka duh te chu Indira Gandhi National Old Age Pension Scheme hnuaiah state contribution mipakhatah ₹100/- atanga ₹1000/- a tihpun te, Health Care sum indaihloh phuhrukna atana ₹20 crore dah te, mitthi ruang phurhna, miharsa zualte tan ₹5 crore dah te. Power Generation leh Supply mumal zawk a kalpui theihna atan ₹20.13 crore dah te. Ramchhung inkalpawhna, kawngpui leh lei dawh thatloh te thawmthatna atan ₹100 crore dah a ni te leh kawng chhia siamthatna turin Road Fund Board ah ₹40 crore dah te. Hand-holding Policy - Ban-kaih Policy kut-hnathawktute hmasawna tur atana ₹200 crore dah te, zu leh ruihhlo dona leh naupang hruaisualte siamthatna, ruihhlo ngaite enkawlina tur ₹50 lakh dah te, eirukna dona turin CBI in an chhui tura phalna pek te a taka hmalak ni se. A tuar tur chuan tuar mai se, tih kha ka han belh tel ve duh bawk a ni.

Tin, Gender Budget, Central duhdan a hmeichhe chawikanna tur awm tawh sa tun tum a rawn pharh te pawh hi a tha khawp mai. Agriculture Marketing Assurance Fund Management Board din te leh Mizoram State Project Monitoring Committee din te hi a lawmawmin a tha ka ti tak zet zet a ni.

Pu Speaker, budget sum hmuhna lam hi ka han thlir thin a, a tlem hle mai a. Amaherawhchu, inrenchem zawngin kan kalpui dawn a. Hei hi a nihna ang taka hmana tih a tul hle a ni. Mahse hei hi a tawkin ka hre lo a, lakluhna lam uar deuh hi a tul hlein ka hria a. Hei, tax hrang hrang, chhiah hi ram mipuite hian kan mawhphurhna, kan pek tur a ni tih hi kan hriat thar a ngai hlein ka hria a. Kan ram ze mila chhiah chungchang pawh hi ngaihtuah deuh a tha hlein ka hria a. A bikin, hei tun tumah stamp duty ah 1% atangin 3% ah huaisen takin, sang takin kan han tipung te pawh hi a tha viau a, amaherawhchu, hei hi tawk lovin ka hria a. Chuvang chuan, a dangte pawh hi uluk taka kan ngaihtuah chhunzawm zel atan hian a tha hlein ka hria a ni.

Intodelhna lo hi chuan a huaisen theih tak tak loh a. Thil tha pawh hi hre mah ila, kan ti tak tak thei chuang lo a ni. Borrowing lampangah hian sum leh pai hi kan puk hian awmze awma tangkai zawk, ram mipuite tan a hmasawna atana hman tur a nih hi chuan, borrowing lak tam pawh hi a pawl lo hle a ni. Tin, leiba tihlem chungchang pawh hi kan sawi fo thin a. Hei hi, Public Debt ah hian pawisa ba kan ngah

avang hian, a nihna takah chuan Central Sawrkar hian chance tha deuh mai min pe a. SASCI, kum sawmnga hnuah a pung awm lovin pawisa puk tur min pe a. Hei hi Public Debt ah hian a transfer theih a ni tih hi kan hriat atan ka han sawilang tel ve duh hrim hrim bawk a ni.

Thawkrim leh thawkhahte tana dah crore ₹110 crore kha a hman theih ta lo nge ka hre lo a, hmunphiah leinan hian a hman theih ngang lo em ni aw, ka ti a. Kut-hnathawktute mangang au aw hi, kan zingah an lo kal nasa hle mai a. Hei hi a Board khan kan la ngaihtuah Chiang lo ti mahse hman theih a nih chuan, hei hi a theih hram chuan hman theih ni se a van tha e aw. Hei hi kan mamawh a ni. Pu Speaker, sawrkar hmasa hunlai khan Mizoram sawrkar chu GSDP atanga leiba ngah ber kan nih thu sawi a tam hle mai a. Tun i dinglama thu ta te pawh i veilam a an thutlai khan an sawi ber kha niin ka hria a. Amaherawhchu, leiba te, budget figure hrang hrangte hi projection a ni a. Kan GSDP ngei pawh hi projection figure a nih avangin, hetiang thil hi a nihna tak nen a danglam fo thin reng a ni.

Annual Financial Statement kan en chuan kan Gross Fiscal Deficit chu, 2023-2024 ah khan 3.47% of GSDP actual a ni a, deficit sang takah kan awm lo a ni tih a tarlang a ni. Pu Speaker, i phalnain, RBI Study of Budget, December 2023 a tihchhuah chuan, hei ka rawn print a, tah hian Chiang takin a inziak a - Mizoram sawrkar leiba chu 2024 March ending angin 36.2% of GSDP a ni a. GSDP atanga leiba tam lamah Mizoram chu 18-na a ni a. Mizoram State aia leiba ngah 10 an awm tihna a nih chu. A figure dik kan hmu chho zelah hian, Mizoram State chu leiba ngah ber ang a kan lo sawi thin kha a dik tawk lo niin a lang a ni.

Ka sawi duh ber chu - Pu Speaker, RBI statement pawh ni se, kan figure te hi a dik famkim vek tihna a ni lo a. Leiba ngah ber ang a min lo tarlan pawh a lo dikloh zia statement tharah an tarlang mai a ni a. Chuvangin, a percentage-a kan la fo hi GSDP figure dik tawk loh avangin thil dik ber a ni bik lo a. Sawrkar kal ta emaw, sawrkar kal mek emaw chirhthehnan leh mawilo taka insawina chi niin ka hre lo a ni. Chuvangin, kan leiba a tam emaw, a tlem emaw, GSDP figure atanga leiba ngah ber kan ni emaw, 18-na kan ni emaw pawh ni se, kan sum neih ang ang te mipuite hnena thleng tura rah tha chhuah tura kan hman hi a pawimawh ber a. Keini Legislator-te hi chu a number emaw, a percentage emawa buai buai tur kan ni lo a. Kan sum hmuhte kan hmanthat leh thatloh hi budget pass-tu tur kan nih miao avangin, kan ngaihpawimawh a ngai hle a ni.

Chuvang chuan, keini chuan sawrkar sum te tha taka hman a nih leh nihloh hi kan enzui ang a, kan budget pass tur hi 'mipui tan hman a ni em' tih hi kan thlir zui reng tur a ni dawn lawm ni? Pu Speaker, sawrkar hmasaah khan Aizawl traffic jam te tihreh dan tur pawh kawng hrang hrangin ngaihtuah kha a ni a. Kawng chhawng siam te, leiverh te siam a nih theihnan hma an la a. Kan Chief Minister chhuak ta Pu Zoramthanga phei kha chuan leiverh chungchang te kha a buaipui nasain, a hlawhtlin theihnan theihtawp

a chhuah a nih kha. Social media-ah te pheih chuan a hlawhtlinna beisei ngam lovin, fiamthu thawhnan te pawh hman a nih kha.

Amaherawhchu, tun budget speech ah hian, sawrkar laipui hnuaiah Ministry of Road Transport & Highways chuan Aizawl by-pass leiverh siamna tur crore 1313.28 a rawn sanction thu tarlan a ni hi a lawmawm hle a ni. Sawrkar hmasa hmalak hlawhtlinna kan hmu ta hi lawmawm ka ti a, theihtawp lo chhuaha lo buaipuitute pawh an fakawm hle a ni. Pu Speaker, kan induhthawh luatah tun sorkar engmah ti lo leh hmasawna thawk lo ang maia kan inpuh thin hi a tha lovin ka hria a ni. Sorkar hmasa pawhin theihtawp a chhuah a, tun sorkar pawhin theih tawp a chhuah ngei ka beisei a ni.

A tawp ber atan chuan, Pu Speaker, budget hi engzata tam emaw, a tlem emaw pawh ni se, a hmanna pui bera hi public interest ni se a thain ka hria a. Kan budget hi duhthusam a ni kher lo vang a, thawhchhuah lam a tlem viau avangin. Tin, central sorkar sumah a innghat thui viau si a. Chuvangin, kum 2024-2025 budget crore 14412.12 chu a tha e. Tha taka hmang turin duhsakna ka hlan e. Pu Speaker, ka lawm e.

**HON. SPEAKER** : A lawmawm e. Tuichang Bialtu, Member zahawm tak, Pu W. Chhuawnawma ilo sawm ang.

**PU W. CHHUANAWMA** : Pu Speaker, ka lawm e. Kan Chief Minister zahawmtak, Finance Minister ni bawh budget speech hi kum dang zawng aiin mipuite hian an ngaihvenin ka hria a. He budget buatsaih a nih laia a ngaih pawimawh ber chu, Zoram-mipuite tana ei leh bar zawna kawng tlo leh nghet zawk buatsaih hi a ni a. Chumi tihlawhtling tur chuan, langtlang leh rintlak taka sum leh pai enkawl hi ngaih pawimawh hmasak tur a nih zia te leh, heng sumte hian mipuite a thleng ngei a ni tih finfiah kha a tum tlat a ni tih te an han hriat hian, sorkar tharah hian mipuite hian rinna an innghat hi tifuh an inti hle niin a hriat a ni.

Kan hriat theuh angin kum 2024-2025 budget pumpui chu crore 14412.12 a ni a, heta tang hian central sorkar atanga kan hmuh tum zat kha crore 12386.49 vel a ni a. Chu chu, za zelah 85 vel bawr a lo ni a, a vai deuh thaw a nih chu. Rilru a kal thui hle a, hei hian kan state intodelh loh zia a tichiang hlein ka hria; tan lakna tur a tam hle mai. Chona lian tak hmachhawnah inngai vek ila, tih tak zeta kan beih chuan he sorkar hian achievement hriat reng tlat ropui tak, kan Chief Minister kaihhruaina hnuaiah kan hmu ngei ang tih ka ring tlat a ni. Pu Speaker chuta tana a tihlawhtlin nana hmalak tawhte leh hmalak dante han sawi ve ka duh a, point hrang hrang sawitu tam tak khan an sawi a, tar-pension atana dah tih angreng te, hand holding policy tih te; amaherawhchu, khang ho zawng zawng kha ka hawl kim ve hman dawn lova, ngaih pawimawh bik riau ka nei a, chung erawh chu han sawi ve ka duh a.

Pakhatna atan chuan, *Year of consolidation* hi. Thawhchhuah nei lo, nei tlem, lei ban ngah si tan chuan inrenchem hi tih makmawh a ni awm e. Chuta tan chuan kum 2024-2025 hi sum leh pai inrenchem kum - year of consolidation atan hman tum a nih thu kan hmu a ni. Hetah hian fiscal deficit tihhniam leh theih tawpa kan leiba sang lutuk tihhniam hi kan tum ber a ni dawn a. Chuvangin, kum 2024-2025 a sum puk tur, kan public debt chu crore 697.69 zetin a tihhniam dawn a ni. Chumia tan chuan a bul tan nan kan sum hman te thlirin, tul baka kan hmanna nia hriat te tihtawp leh tihhniam kawngah hma a lak tur thu kan hmu a.

Pu Speaker, a bul tan nan kan sum hmanna te thlirin ‘*tul baka kan hmanna nia hriat te tihtawp leh tihhniam*’ tih hian thil pakhat ka rilruah a rawn lang a. Chu chu, he sorkar thar a lo pian khan, “sorkar inthlak vang main car thar lei ve loh tur; sorkar hmasa hman hlui hi kan hmang mai tur a ni, kan chhawm mai tur a ni,” tiin a rel a. Pu Speaker, kan Home Minister zahawmtak tawngkam han hawh lawk ila, “Second 20 chhungin vaibelchhia eng emaw zat kan hum hman,” a ti a ni.

Tichuan, a dawt lehah chuan, hei, Resource Mobilization Committee te, kan Chief Minister chair-na hnuaiah din a ni a. Kan sum hman tihhniam kawng dap te, sorkar revenue tihpun dan tur ngaihtuah te leh, sorkar bungrua chi hrang hrang hluihlawn tawh ang chi suma chan tir tum ang te a tak taka thawk turin hengte hi a tangkai dawn a, suma chan tir theih ang chi te; heng din a ni te hi a lawmawm em em a ni.

Tichuan, anti-corruption measures chungchang te hi han sawi leh ka duh a ni. Kan Chief Minister-in uluk taka a pharh tak kan budget hi a hlawhtlinna leh hlawhchhamna, a kaikuang chu, ‘corruption hi a ni e’ ti ila, thu kan uar a ni kher awm lo e. Chumi a nih avang chuan eirukna do hi sorkarna kan chan hma atangin mipuite hnenah kan inzawrhna leh tih hlawhtlin ngei kan tum zinga mi a ni a. Chuvangin, mipuite pawh ka chah duh chu, he ram hmelma kumhlun chu *hlemhletna* hi a ni a. Chu kan hmelma chimawm tak, kan ram tiretheitu hi do hneh tur chuan sorkar chakna ringawt chu a tawh lo ang a. Duh taka Chief Minister atana in thlantlin hi ral-hmatawngah a tang ang a, sorkar-hnathawktute leh mipui zawng zawngin a hnung kan zui ang a. Tichuan, Pathian zarah kan hmelma kum hlun chu tihtlawmin a awm ngei tawh ang tih ka ring tlat a ni.

He hnathawk tur hian Mizoram State Project Monitoring Committee (MSPMC) chu kan Chief Minister chairman-na hnuaiah din a ni a. chuta tana hmanraw pawimawh ber chhui ngaite chhui chhuak tu tur atan, ACB hi a tha tak tak lo tihna ni hauh lovin, kan Chief Minister-in amah ngei pawh lipse vek theitu tur CBI a ko lut ta rup mai tih kan hria a ni. Hei phei hi chu tui let hnuaiah a vawikhat awmna a ni a. Chuvangin, eiru lo tur tan lo chuan thil tih chi pawh a ni awm lo e.

Tichuan, ka sawi leh duh chu, *hand-holding policy* kan tih te hi a tha em em a. He policy kaihhnawih department-te chu an scheme leh proposal a zirin sorkarin a tul angin sum a pe dawn a. Kum 2024-2025 hi inrenchemna kum atana hman a ni chung chung pawh

hianin, he policy tih hlawhtlin nana cheng crore 200 lai mai dah a la ni thei cheu hi a lawmawmin, *year of consolidation* kan hmang chung pawha heti zat dah a han ni te, agriculture market assurance fund hnuaiyah crore 110 a lo dah tawh te hi a lawmawm hle a ni. Tin, mipui sum hi a dik taka hmana, sorkar project te, programme te leh policy te hlawhtling taka kalpui hi a tum a ni a. Hemi atan hian kan sorkar chuan committee pahnih a din a, chungte chu - Mizoram Project Monitoring Committee leh Mizoram State Policy Coordination Committee te an ni. Hengte hi a tha hle a ni.

Tin, khawsak harsa zualte tan a thlawna mitthi ruang thingtlang khawlama phurhna atan crore 5 ruahman a ni te hi a lawmawm em em a. Thingtlang lam bialtute kan ni a, phur a rit khawp mai. Ka bialah hian tunah hian vanduaithlak takin ruang 14 kan thawn chho tawh a ni. Chuvangin, heng zawng zawng hi a chhawk zangkhaina tur sorkarin a rawn duang a, budget-ah a lang hi lawmawm ka ti a. Amaherawhchu, mipui rilru lam hi a rethei thin a. Hetah hianin a awm ngawih ngawih leh mahni intodelh thei ang chi kha chu guideline fel takin a rawn siam a rinawm a ni.

Tin, healthcare lamah indaihloh phuhrukna atan tun kum lamah ₹ 20 crore dah a ni hi a lawmawm em em a. Tin, heng bill ba te rullh nana ₹40 crore, 2023-24 Revised Estimate a dah a ni te hi a lawmawm ka ti bawk a ni.

Tichuan, Pu Speaker, mipui vantlang himna ngaih pawimawh bik a nih tur thu te kan hmu a. Tin, tar chawmna tur ₹100/- atanga ₹1,000/- a tihpunna tur budget-a dah a ni te hi a lawmawm hle mai.

Pu Speaker, hun hi dik taka hman ka han tum ang e. Khang kha ka sawi theih tawk ni se la. He Budget hi a tha ka tiin a lawmawm ka ti a, lawmthu ka rawn sawi e.

**HON. SPEAKER** : A lawmawm e. Hun a hmang dik hle mai. Hrangturzo Bialtu, Member zahawm tak Pu Lalmuanpuia Punte ilo sawm ang.

**PU LALMUANPUIA PUNTE:** Pu Speaker, ka lawm e. Sawi tawh zawng zawngin budget hi tha an tih thawkhat thu an sawi vek a. Pu Speaker, i vei lama mite pawhin tha an ti thawkhat tih chu a hriat vek mai a. An sawi tak ang khan, budget hi keimahni puala kan pharh vawikhatna a ni ve a. Heti chung hian tunhmaa kan Leader-in rei tak a lo aupui – *‘thlathar leina tur te budget-ah a dah theih a ni’* a tih, *‘a theih loh a ni’* an lo tihsak thin kha, a CM atanga ni reilote chungin keimahni budget pawh ni lo, sorkar hmasain an hman bang atangin a rawn siam nghal a, chutiang chuan kan kal a ni a. Kan CM in *‘100 days programme’* a han siam te hi, sorkar hmasa ten an la tih ngai loh a ni a, a lawmawm ka ti khawp mai a, eng emaw zat chu tihhlawhtlin a ni tawh a. Hei bakah hian kan sum dinhmun chhiat zia hriaa, *‘year of consolidation’* a han ti ngam te hi a ropuiin, a huaisen thlak ngawt mai.

Tin, ‘Minimum Support Price’ hi tunhma atanga an lo sawi lawk tawh thlai chi li tih bikah lei tur a lo ni ta a. Amaherawhchu, tun tuma lo thar sa hi chu, a nihna takah chuan sorkar tharin budget a la pass loh avangin, la hman theih loh a ni a. Amaherawh chu, kan CM-in a vei em avangin sorkar hlui budget atangin a lei dan tur a han duang a, pawisa pawh a dah hrang a. Amaherawhchu, a leitu tura rawn insawi vai farm ho kha, Pu Laldenga’n, “*Vai thusawi sawi chhawn hi chu dawt sawi a awl e*” a ti a. Vai hi chu an insawi rinawm vak a, ha bal rin ang deuh a ni a, a pial leh phet thin a. Chuvang chuan, rin angin thil an ti thei ta lova, a pawl khawp mai a.

Pu Speaker, i vei lama mite pawh khan tunhmaa an ngaihtuah ngai reng reng loh, pawl an han ti thar ta em em a, a lawmawm ka ti khawp mai. Khatiang pawl tihna thinlung kha nei chhonzawm zel se la, kum 2028 ah pawh khatiang khan rawn inzuar ve tawh turin ka sawm a ni. Chuvang chuan, nakum atang hi chuan keimahni budget siam pangngai atangin kan han ti ang a, kuminah kum tluana inbuatsaihna hun kan nei thei ang a; nakumah chuan khatiang a tihsual awm tawh lo turah ngai ilangin a tha ang e. Nakumah chuan lei thei tawh ngei turah inngai ilangin.

Tin, ‘Resource Mobilization Committee’ a han siam te hi a tha khawp mai. A hma khan department ang deuhin a ding hman a, an hnathawh tak hriat a ni lova, kuminah chuan hna tak tak an thawk turah ngai ila. Hei hi a lawmawm tak zet a, anti-corruption measures tur atana an rawn duan hi a tha khawp mai. Project Monitoring Committee an han duan te hian contractor hna duhdah, a hun taka hna thawk tha thei meuh si lo; revise an dil a, an revise zel a, a tir atanga revise tum te, sa emaw tih tura hna thawkte an awm a. Chuvang chuan, khatiang venna, ‘a hun takah an zo dawn em’ tih endiktu tur Project Monitoring Committee, amah CM ho ngeia din a ni te hi a tha tak zet a.

Chubakah CBI koh luh te, nichina midangin an sawi angin, ACB an tha lo a ni lo, amaherawh chu, Mizo leh Mizo chu kan Chief Minister hlui Pu Lalthanhawla’n, “Mizo chu insawipui hnam kan ni” a tih ang deuhin, a then kan sunday sikul kalpuite an lo ni a, a then kan ni te pasal te an lo ni a, khatiang khan kan inkungkaih put mai a. Mizo leh Mizo hi chu han intih vak hi kan harsat avangin, sunday sikul kaipui nei miah lo, chhungte nei miah lovin min rawn chhui nalh mai hi a tha dawn hlein a lang a. Hlauh neih loh hi chuan that tak tak a har a ni. A dik tak chuan, camping-a piangthar tam tak pawh hi vanrama an kal chak aiin hremhmun kal hlauh vang a ni deuh ziah zawk. Chuvang chuan, hlauh kan neih hian mihring hian thilsual kan ti ngam lo a ni. Chuvang chuan, hetiangha ha hriam, hlauhawm kan ko lut dawn hi a tha riauin ka hria a.

Tin, Biometric attendance te hi *punctuality and time management* piah lamah aikal ven nan hian a tha ber mai dawnin ka hria a. Tu kutzia mah a inang si lova, a inhmeh sak theih dawn loh tawp mai a. Hei hi a bik takin aikal tamna bik Health Department leh Education Department ah hian hmang vat ila, aikal chu kan veng sa a ni mai. Chuvang chuan, hengte hi a tha hlein ka hria.



Boundary Committee te hi, sorkar hmasaah kha chuan a ngawi vung vung a, buai a awm ve leh an phili vak a, Boundary Committee a rawn din a, kei pawh kan party aiawhin ka tel a. Boruak a muan tak hnu kha chuan meeting pawh kan nei ngai mang meuh ta lo a ni. Sorkar tharah erawh hi chuan buai hmachhawn thei reng kan ni tih inhriain Boundary Committee te kan din a, meeting pawh vawikhat neih tawh a ni a, a tha hlein ka hria.

Tin, ruihhlo dona turin theihtawp chhuah a tum a, nichinah Minister-in a rawn sawi tawh a. Tunlai kan chheh vel ram buaiah kan ram paltlang lo tur a rawn paltlang a, kan rama chambang leh an hman tur hi chu a pung hluai chuang lo tih te a rawn sawi a, a lawmawm tak zet a ni. Mizoram hi a mak khawp mai a. Tunhma atanga sumdawwna route kal ngai lo, Manipur-a kal thin hi, Manipur buai hma pawhin helamah hian a rawn kal sa ve reng reng; kuhva leh eng eng emawte a rawn kal nasa tawh a. Chu chu kan ram chinah vek chuan loh kaltlangte hi a ni thin a. Amaherawh chu, chu ti chung chungin ruihhlo dona kawnga nasa taka hmalakna tur kawng kan han chhawp te hi a tha hlein ka hria a ni.

Tin, *hand-holding* hi kan sawi nasain, kan sawipui ber a ni a. Mahni inthiamna nei, engkim ti thei tawka inngai, amaherawh chu, sum capital khatiang *run*-na tur nei lote khaichhuahna tur atana hmalakna tur chhawpchuah a ni te hi a lawmawm khawpin ka hria a ni.

Tin, ruang phurhna tur budget-a pawisa dah a ni phei hi chu a lawmawm hlein ka hria. MLA reilote kan han ni ve a, Aizawl atangin ruang hi 10 bawr vel hi chu kan thawn chho tawh a ni. Pu Speaker, he laia ka member-puite pawh hian an lawmthu an sawi vek a, amaherawh chu, helaiah hian Mizo mipui rilru, kan moral lo tlakhniam tawh zia hi a lang a. He tah hi chuan kan YMA leh Kohhran te hian hei hi mipui zirtir ila ka duh khawp mai. Khawsak tha ve tak, khawlaia motor hung ve thei chin pawh hian MLA phurhtir vek an tum ringawt mai hi; mahni chhungte ruang midang kuta dah ringawt mai rilru hi chu a fuh lo a ni. Budget-a sorkarin ruang phurhna senso tur a rawn dah hi a lawmawm ka ti hle a ni.

Kum 2005 ah Greenwood ah ka nu a thi a, chhungte an lo kalkhawm a, “MLA kan hrilh dawn em ni?” an rawn ti a; “MLA pun kan ngai lo, ka nu ruang chu kan hawn thei” ka ti a ni. Kan phurh liam dawn hnaiah MLA a lo thleng a, “Engatinge min hrilh loh; chutiang khatiang” te a rawn ti a, a rawn vui luam a ni. Kan party worker thenkhatte pawn intithe deuhin damlote hi kan inhrilh a. Pathian zarah kei ka vannei a, ka bial Hrangturzoah damlo inhrilh tih ang te hi an nei ve lo; bial dangah hi chuan MLA tan leh a din tumte tana kan loh theih loha inti bengvarin kan inhrilh a, heng te hi sim a tha khawp mai. Hrangturzo bialin hetiang hi an ching ve miah lo, an thih hnuah kan hre ve chauh thin a ni. Hrangturzo khi Mizoramah chuan a inti-mizo bik deuh, Mizo tawng pawh a dik bera inngai ve deuh region khi a ni a; hetiang hi Mizoram mipuite hian

inzirtir nan hmang ila, a bik takin Kohhran leh YMA-in helamah hian tan la se a tha khawp mai. A Mizo lo a ni, damlo inkan beisei deuh a, candidate beisei leh MLA te kan han hrilh chung mai thin te hi chu; Hrangturzo bial te hi entawn ila a tha viauin ka hria.

Tin, ‘electric bill tihsan loh’ tih kha kan sawi dan hi a dik tawk lo deuh thin a. An hman tam chuan a bill chu a pung ang; a rate zawk a ni. Electric tariff rate tihpun loh kan tum te hi a tha hlein ka hria. Kum 5 chhunga kumtin han tihpun ang chi te. JERC-in hearing a ko fo a, kan party aiawh hian ka kal thin a, party-a ka awm hma pawhin mimal hian ka kal fo thin a ni. Kumtin ringawt maia tariff tihsan te hi a fair lo hle. Chuti chungin kan chawi sa kha khulam company lamah bill te an lo ba leh teuh a, mipuiin bill kan pe thin si. Tunah chuan khatiang kha a awm tawh lo turah ngai ila.

Pu Speaker, ka zo tep. Old-age pension te hi - tunah hian pension an lo thi a, an ai tur pawh indah khah hleihtheih loh tein a awm a, hei hi khawi lai dik lo ber nge, kan Minister hian min lo hriatsak se la. A thi ai pawh an indah khat hleitheih tawh lo. Tunah old-age pension atan cheng 1000/- theuh kan han dah thei te hi a tha hlein ka hria a, ram tan hmasawna a tling a. Kum-upate hi duat ngai an ni; thenkhat pheih chu an kawppui ten an dampui tawh loh, an fate nen inkawm meuh tawh si lo, in lama khawhar taka awm te an ni a, chhungtea inngat liau liau te an ni a, pawisa an lo hmu ve tur te hi an lawmpuiawm em emin ka hria a ni.

‘Chhimlam ngaihsak loh; chuti khati’ an tih an tih rual hian, tuna budget-ah hian ADC 3-te hnenah crore 607.09 pek tum a ni te hian, kan sorkarin chhim lam a ngaihsak tur zia a lang Chiang hlein ka hria. Mara student hostel, Delhi ami pawh a contract ringawt mai pawh sorkar hmasaah khan an lo inchuh a ni a, kan sorkar ve leh kan Chief Minister-in MADC kuta a hlan vat thei te kha a lawmawm tak zet a ni. Hetiang taka mipui huap sorkar kan nihna hi a lan chhoh zel theihna turin he budget hi lungruak taka kan pass theih chuan a lawmawm ngawt ang. Pu Speaker, ka lawm e.

**HON. SPEAKER** : A lawmawm e. Siaha Bialtu Member zahawm tak Dr. K. Beichhua i lo sawm ang.

**DR. K. BEICHHUA** : Pu Speaker, ka lawm e. Vawiiinah Budget General Discussion kan nei a. Kan hriat angin State budget reng reng hi hmuh tura Chiang sa a awm hran lo a, rin dan leh kum kal tawh atanga teh a ni fo thin a ni. Chuti chuan 2024-2025 Budget Estimate a pumpui han thlir thuak thuak chuan tha thawkhat viauin a lang a ni. Pu Speaker, thusawitute’n kan lo sawi uar em em - tar pension NSAP-ah khan old-age pension kha cheng 1000/-a tihpun a ni a, ‘Indira Gandhi Old-Age Pension Scheme’ tih a ni. Stamp duty-ah khan ‘widow’ kan ngai pawimawh viau a, Indira Gandhi Widow Pension hi engatinge kan tihpun ve loh le? Chu chu a pakhatna ni se.

Pahnihnaah chuan, disabled pension te pawh hi tipun ve awm; tihpun a ni lo a, helai hi engnge ni a chhan, tih kha kan Minister hian min hrilhfiah thei se a tha hlein ka hria a. Gender budget pawh hi central scheme deuh vek a ni a, tunah a hranpaa kan siam hi a lawmawm ka ti a, a hranpa pawh hian siam lo ila, a ngai hi a kal reng tur tho a ni. Kalphung thar a ni a, a hranpa a an rawn dah te pawh hi a lawmawm viau e.

Hei, kum 2024-2025 budget tur hi a pumpuiin voted-ah crore 13,176.85 a ni a, charge-ah chuan crore 1235.27 lo ni bawk a. Tichuan, kumin BE pumpui chu crore 14,412.12 a ni a, kum 2023-2024 aia a tamna hi 0.49% a ni; a intamhleih lutuk lem lo a ni. Kum a kal ang a, kan hriat theuh angin thil lo thlenga zirin revised estimate te pawh a la rawn kal thei bakah supplementary demand te pawh 2025-2026 budget pharh hunah a rawn lang turah ngai ta ila. State own tax atang hian 2024-2025 chhungin cheng crore 1312.42 hmuh beisei a ni a. Kum kal meka crore 1084.30 atang hian 21%-a pung tura ngaih a ni. State own non-tax revenue hmuh kan beisei pawh hi 25% a pung tura hmuh a ni bawk a, a lawmawm khawpin ka hria a ni, Pu Speaker. Tin, Devolution of Central Taxes and Duties atang pawh hian 10.44%-a pung tura beisei a ni bawk a ni a, a tha thawkhat viauin a lang.

Finance Commission grants kha kan en chuan Post-Devolution Revenue Deficit erawh kan dawng tlem zel dawnin a lang a. Kuminah hian crore 586.00 chauh kan dawng dawn a ni. Local Body grants erawh 5.56%-a pung tura beisei a ni bawk a, hei pawh hi a tha thawkhatin a lang a. State Disaster Risk Management fund 1910 pawh hi tlemin kan dah sang deuh hlek bawk a, hei pawh hi atha thawkhat a. CSS hi kum kal lai mek aiin 4.15%-in kan beisei hniam tlat mai a, ngaihtuahna thui tak min siam sak a ni. Externally Aided Project (EAP) kumina kan hmuh let tawh zat chu cheng vaibelchhe 49.17 a ni. 2024-2025 hi vaibelchhe 90 a ni bawk a.

Pu Speaker, ka hriatthiam tak loh, kan Finance Minister hian min hrilhfiah se ka tih chu, revenue expenditure-ah khan Finance Minister budget speech-ah Revenue Expenditure for 2024-2025 estimate kha crore 11,957.04 a ni a, sl. no. 51-ah khan. Statement under the Mizoram Fiscal Responsibility and Budget Management Act, 2006-ah khan total revenue expenditure 2024-2025 BE kha crore 11821.54 a ti leh si a, a inkalh tlat mai a ni. Explanatory Memorandum on Budget 2024-2025 kha en leh ta ila, crore 1,19,514.01 a ti leh bawk si a, a inanglo vek a ni, Pu Speaker, a bu thumah khan. Hei hi Finance Minister hian min hrilhfiah atan ka rawn sawi duh bawk a.

Tin, Budget Speech, page 53, page 15 of 18 ah khan, Capital Expenditure kha crore 2455.08 a ni a, allocated amount kha crore 3141.19 a ni. Explanatory memorandum-ah khan, kha bawk kha crore 2,23,187.53 tiin page 17-ah khan a rawn ziak leh si a, page 19-ah crore 22,320.59 tih a ni leh bawk si a, a inang lo nuaih mai a ni. Pu Speaker, helai hi ka hrethiam chiah lova, kan minister zahawm takin hei hi min hrilhfiah se ka duh bawk a.

Tin, tax chungchangah khan State Own Tax Revenue-ah khan Vehicle tax hi 2023 - 2024 ah chuan lakh ₹4255.53 atangin lakh ₹5000-ah a pung chho ta a, hei hi eng anga ruahman nge a nih? Motor vehicle pungchho zel tur hisapa tih nge ni ang a, chhiah tihpun tumna te kan nei em, tih lai kha rilruah a awm a. Khang te pawh kha min hrilhfiyah thei se, a pawimawh ka ti a.

Tin, Revenue Account chhunga Grant-in-aid leh contribution hnuaiyah Grant for centrally aided scheme ami election re-imburement ah hian engmah dah a ni lova. A hnuaiyah transfer/grant to states ah hian 'election re-imburement' tih a awm leh si a, hetah hian lakh ₹102.21 hmuh tura dah leh a ni. Hei hi central assistance chhunga election re-imburement nen hian double entry a awm a ni lo maw, tih hi ka zawhna a ni bawh a.

Page no. 5 of Annual Financial Report/Annual Financial Statement-ah khan hmuh theihin a awm ang. Grant-in-Aid CSS atanga kan hmuh tur hi a hniam tak viauna chhan hi engnge ni ang aw, tih ngaihtuahna te min siam sak a; Post Devolution Revenue Deficit Grant tlakhniam vang te pawh chu a ni ve thei bawh ang a. Chutiang anih loh pawhin, kum kal mekah lakh ₹5,15,849.21 a nih laiin, 2024-25 ah lakh ₹3,85,275.10 a ni dawn a ni. Hengah hian engatinge ni, nikum lam atang khan CSS kan hmuh tura beisei hi a hniam deuh dawrh tih hi min ngaihtuah tir a; nge, central lamah khuan kan inthlahrung deuh, tih ngaihtuahna min siam tir a. 'Inthlahrung lo ang u' tih hi Pu Speaker, waviinniah hian ka rawn sawi tel duh a ni.

Aw le, Pu Speaker, a tlangpuiin sorkar thar a din atangin thla hnih erh-awrh a ni a, vawikhat budget pharhnaah chuan a tha thawkhat viau chuan ka hria a; tin, thil thar tam tak te pawh hmuh tur a awm a. Chu lo ah chuan sorkar hian tum tha tak a nei a, zoram mipuite tana ei leh bar zawhna kawng tlo leh rintlak, a taka hmalak a tumna hi ropui ka ti a. Hengah hian keini BJP Legislature chuan thil tha ah chuan 100% in kan support ang a, 150% pawhin kan support ang. Thil tha lovah erawh chuan kan do bur dawn a ni. Tin, sorkar hi tha taka kal tur leh heng ruahmanna rawn siamte hi tha taka mipuite hlawkpui tham lawih tura hma la turin duhsakna ka hlan e. Ka lawm e.

**HON. SPEAKER** : A lawmawm e. Tunah chuan Tawi Bialtu, Minister zahawm tak Prof. Lalnilawma ilo sawm ang.

**PROF. LALNILAWMA, HON. MINISTER:** Pu Speaker, sawi rei loh ka tum ang a; hetiang dinhmuna kan han ding hi a nuam ve riau a nia. Pu Speaker, phone ka dawng a, nimin piah khan ka bial atangin; 'LSC hming thlak ka dilna kha min lo bawhzui sak teh a' a ti a, 'khawng maw ni ka bawhzui ang aw' ka ti a. Kar hmasa khan phone call ka dawng bawh a, chutah chuan 'ka nu damdawiinah an rawn phur thla a, Civil Hospital-ah khan min lo hmuak thei em?' a rawn ti a, a nuam ve ang reng riau;

session lai pawh ni se va hmuak hman ila chu a tha ka ti khawp a. Amaherawhchu, kan dinhmun khang kha a nia, Pu Speaker, kan bial mipuite min beiseina a sang riau a ni.

Pu Speaker, kan budget punna atang khan ka han sawi tan ang a. Crore ₹202.18, a percent zawng chuan 1.42% a pung a ni a. Thil man te han chhuta, kum khata a punna inflation rate te han chhut dawn chuan, ‘a va pung tlem awm ve’ tih theih tak a ni a. Amaherawhchu, hei hian kan budget a realistic zia a rawn ti langin ka hria. Tichuan, kan House Leader, kan Chief Minister ni bawkin a budget speech-a a rawn tarlan, ‘KALPHUNG-THAR, MIPUI-SAWRKAR’ tih capital-bold letter-a a rawn ziak ngam kha ropui ka ti a. thil thar a ni a hei hi, Mipui ah pawh kan inzawrhna a ni a, mipuite pawn min vote-na chhan pakhat kha a ni. A huaisen thlak hlein ka hria a, budget-a kan policy lian keu kuau a han ziah kha. amaherawhchu, ‘*kalphung thar, mipui sorkar*’ kan ti a, kan han kal dawn a, system invuah nghet deuh mai hi a awm a; chungte chu kan han su chho dawn a ni a, chona a nasa hle mai. A tah tawlin kan insiam tha zel turah te ngai ila.

Ka hmaa sawite khan an sawilan vek tawh ‘Year of Consolidation’ tih laia hi a huaisen thlak bawkin ka hria. Budget Speech-ah chuan a mawihnai zawn chang te pawh a awm a, a ngaihnam chi zawn chang te pawh a awm a. Amaherawhchu, ‘Year of Consolidation’ kan tih taka hi a ngaihnam hran lem lo a ni. Inrenchem ngai, insum ngai tam tak a awm a. Pu Speaker, i remtihain budget speech-a inziak hi tawite han quote lawk ka duh a - ‘*In consonance with our commitment, public debt for 2024-25 is estimated to ₹4,697.69 crore*’ a ti a. Hetia *Year of Consideration* kan puana, inrenchem taka hma kan lak chuan, ‘kum khatah crore 697.69 kan hum thei dawn a ni’ tih te a ni a, a lawmawm khawp mai. Chutih rualin project tha deuh deuh, itawm deuh deuh pawh kan nei thin; amaherawhchu, state sum sen ngai project kha thawh a nih chuan state-ah khan leiba a in chhekkhawh thei tho ta a, chung project tha deuh deuh pawh chu ‘kan ti lo ang’ ti ngam thak khawpin kan Budget Speech-ah khan telh a ni a, a huaisen thlak khawpin ka hria.

Tichuan, ‘Resource Mobilization Committee’ kan han ti a, khangah khan a hnuai inziak thenkhatah chuan, Pu Speaker, ‘Generation of Revenue’ kan ti ta a. Keimahniin kan lakluh ve theihna tur, kan state-in a lakluh ve theih tur te, khang kha ‘hmalak a ni ang’ tih a ni ta a. Kar hmasa lawk khan Stamp Bill kha kan pass a ni; khatiang khan kan kal chho zel ang a. Hetah hia Pu Speaker, i phalnain ka source pakhat, hemi GST rawn luh dan hi tawite in han tarlan ka duh a. Northeast State 7 (8 zawk a nih chu, Sikkim telin) chung GST kan lak dan, a lo luh dan February, 2024 leh February 2023 a a lo luh dan khaikhinnaah khan Mizoram hi kan lo hniam ber mai. Nagaland kha -5% in a tlahniam a, Manipur hi -13% in an tlahniam a, Mizoram hi -14% in kan tlahniam a ni. Manipur te chu ram a buai a, GST an la tha lo a, tlahniam a nih pawhin a hriatthiam awm ka ti a. Mizoram, a ralmuang ber, India rama State ralmuang ber kan nih laia kan

GST -14% a a tlahniam hi, tunah chuan Taxation Minister tha tak kan nei a, hei te pawh hi a pung chho zel turah ngai ta ila, a tha ang e.

Pu Speaker, 'Anti-Corruption Measures' kan han tih te pawh hi a huaisenthlak hlein ka hria; hengte hi thutlukna han siama tan chuan thil hlauhawm tak chu a ni tho. Amaherawhchu, inthlan lai, campaign laia kan au hla te a ni a, kan intiamna te a ni a; hetiang kan han ti ngam te hi a lawmawm ka ti a.

Tichuan *Hand-holding Policy* hi han luh ve zawk ka duh Pu Speaker, *Bana-kaih policy* hi. Nimina House Member zahawm tak pakhatin a sawiah khan, 'hei te chu engnge a danglam vakna; NLUP te, SEDP te nen a inang reng lawm ni' a rawn ti a. Kan *Bana-kaih policy* chu khatiang lo deuh, 'hei ai hian a tha ang a' ka ti deuh a. *Entirnan*: Crore 200 dah a ni ta a ni; khami piah lamah khan he *hand-holding* hi kalpui thei deptt. hi kan awm teuh dawn; hei hi chu a hminga kan va dahthat kha a ni ta a, hemi piah lamah hian Horticulture Deptt. ah pawh hand-holding kan kalpui thei, RD Deptt. ah pawh, MzSRLM hnuaiah pawh tam tak kan kalpui thei ta a ni. Khatiang khan deptt. hrang hrangah pawh a kal ang a. *Entirnan*: food processing te lo nei ta ila, chutah chuan entrepreneur khan food processing industry kha lo din ta se tute nge hlawkna tel ang? Kan farmers ten an thlai-tharte, a market zawn buai ngai lovin kha entrepreneur nen khan an inzawm ang a, entrepreneur leh farmers khan hlawkna an tel phawt. Tichuan, kha industry ah khan thalai hna neilo tam tak kan chhawr thei; a hlawk bawk. Tichuan, consumer - a mipuiten man man zawk leh quality tha zawk eitur-intur kan lo neih kha a hlawkna kan tel a ni. Chutih rualin sorkarah pawh GST a rawn lut leh tho ang a, a hlawkna tel tur hi kan tam mai a ni.

Tar pension tihpun chungchang kha tawitein ka tarlang ve duh zawk a. Pu Speaker, campaign laia kan au hla a ni a, kan sawi chang pheii chuan, ka mitthlaah hian mipui kutbeng hi ala lang. Common platform ah kan han sawilanga mipui kut an beng luai luai a, 'kan tih theih leh si loh chuan aw' ka ti deuh rilru a ni. Amaherawhchu, vawiinah a takin Budget Speech ah hian kan hmu tawh, ₹1000/- a tihpun kha, a takin kan hmu mek a ni.

Pu Speaker, ruang phurhna hi han tarlan veleh zawk ka duh bawk a. Campaign lai te kha chuan ruang phurh kha kan inchuh laih laih a nih kha maw le. Tunah hi chuan phurritah te pawh a kal lek lek tawh a. Amaherawhchu, campaign lai tea kan gpay tawh te kha, 'kha chu kan mi leh sa te an ni a' kan lo ti leh mai ang an ti a; khatiang khan kan inkian tawn a ni. Ruang phurh hi a tura ngaih tawh a nih avangin, MLA te leh a bialtu minister-te thleng pawha kan mawhphurhnaa kan lak tawh a ni a. Amaherawhchu, kan budget-ah hian hei hi tarlan an ni leh hi a ropui ka ti a. Chutih ruala kan inngen duh chu Pu Speaker, - kan senior-te an awm a, term hmasa khan MLA fund atangin ruang phurhna tur motor kha eng emaw zatin an lei niin kan hria a; kan scheme tharah te hian khang motor te kha rawn dah thei se a va tha awm em; orkar tan phurrit min chhawkan

sak dawn a ni a; ‘i tang ho teh ang u’ tih kha kan ngen ni se. Pu Speaker, a motor kha mahni pawisaa lei kan ni chuang hleinem maw le. MLA fund tho a nih chuan, ‘sorkar tan, mipui tan i thawh ve teh ang u’ tih kha ka ngenna ni se.

Tichuan, kan budget hi Pu Speaker, a huphurhawm zawnga thlir chuan a huphurhawm a, amaherawhchu a phurawmna lai hi ka hmu tam zawk a, a phurawm khawp mai. Kan senior Pu C. Ngunlianchunga khan “a tak ram kan thleng zo meuh ang em le?” a rawn ti deuh a, han chhan lawk ka duh a. “Hunin a la hril ang chu maw le” tih kha. Theihtawp kan chhuah ho ang a, i dinglama thute chauh hian kan chhuah tur a ni lo; kan vaiin kan chhuah ho ang a, a tak ram te chu Pathian zarah kan thleng thei dawn lawm ni, kan tan ho chuan, tih kha Pu Speaker, ka sawi theih a ni e. Ka lawm e.

**HON. SPEAKER** : A lawmawm e. Sawi turin Pu TBC Lalvenchhunga, Aizawl West-I Bialtu, Member zahawm tak ilo sawm ang.

**PU TBC LALVENCHHUNGA:** Pu Speaker, ka lawm e. Vawiin nia Demand for Grants - Budget General Discussion kan han nei thei hi a lawmawm ka ti a. Vawiin nia sawi tawhte, nimin lama sawi tawhte atangin he budget hi ‘a tha’ tih lam kan ngaithla nasa em em a. Budget pung hi tha kher a lo ni lo turah kan ngai deuh a, 100 zela cheng 1 vel ang chauha budget pung thei kan present a, chuti chung pawha ding leh vei lama thutena ‘budget tha tak a ni’ kan ti thei hi vawikhatmah budget la pharh ve ngai lo, kan Finance Minister kutthla a langin ka hria a. Chung zingah chuan tawite te, a tlangpui an sawi tawh avangin kei chuan a nawlpui ang khan ka rawn thlur tawh lo ang a. An sawi tawh a, ruang phurh te, tar pension te, hand-holding te, thlai thar leina tur te, CBI General Consent han pek te, heng zawng zawng atana hmalakna hrang hrang kan hmu te hi, a tak takah a harsat thu te pawh kan sawi thin a, ‘budget realistic’ kan ti a, a tak awm ang thei ber tura tuam mawi a ang hle pawhin a lang a; a har a ni, budget hi. A kum a lo tawp a, an revise a, a kum lehah actual a rawn chhuak a, ni lo tak tak te pawhin a rawn chhuak thin a.

Kan budget a pumpui thlir chuan a pung tlem bawk si a, chuti chung chuan road connectivity-ah kawng tha kan neih theihna tura crore 20 chuang (kum danga dah belh ai tam) kan han dah belh theih ringawt mai te. Daihzai taka sum hi semzai a nih chuan, Power Sector-ah vawiinniah ‘kum 5 chhungin a tariff kan tipung lovang’ kan han ti a, khawi atangin nge an tiha hi, mipui hian *langtlang-sorkar* ah beiseina an nei hlein ka hria a. Kha, power tariff piah lamah khan ‘commercial loss’ kan tih mai, kum tin maia a leina piah lam atanga mipui hnen thleng zo lo loss tam lutuk te, a production bakah power generation piah lamah kan infrastructural development atana crore 20 chuang dah hran an ni thei te hi a lawmawm ka ti a. ‘Sum hi a hmanna tura hman chuan, daihzai zawkin a lo sem theih a ni’ tih tilang chiangtu ber niin ka hria a.

Kan Finance Minister budget speech ah hian kan thlir chuan thil tam tak lang a awm nghal a, chu chu, ‘kalphung thar’ kan tih kha a ni a. Hetah hian he *kalphung-thar*

sorkarin a sum dinhmun a lo chhawm chhoh tawh te a rawn tilang nasa a, member-te hnen atang pawhin Pu Speaker, kan ngaithla tawh a. Tunhmaa crore 7000-8000 vel budget kan neih laia 'Post Devolution Revenue Deficit Grant' kan tih mai central transfer crore 2000 chuang te kan la hmuh theih lai kha eng emaw zawng tak chuan a ngaihawm ka ti a. Vawiiiniah chuan crore sing chuang fe budget earmark kan neih theih tawh hnuah pawh deficit grant atana kan sum hmuha chu crore 1000 chuang awrh a ni a, nakkumah phei chuan crore 500 chuang awrhah a tla thla tawh dawn a. Chutiang dinhmun ni chung karah chuan, vawiiin nia budget rawn pharhah hian thil lawmawm deuh chu - kan own revenue, keimahni sum leh pai thawhchhuah ve chhiah atang leh chhiah loh atang pawhin sorkarin effort a pe tih a lang a. Tunah hian kan total Revenue Receipt atanga 19.66% lai mai Revenue Receipt-te kan han nei thei dawn ni te pawhin a lang a. Total Consolidated Fund- atanga kan sum hmuh tur zawng zawng atang pawha 16% lai mai a tling phak ringawt pawh hi, *kalphung-thar* zinga mi niin ka hria a. Mahni intodelh tumin ke kan pen tan tih pawh a lang chiang hlein ka hria.

Kan budget kalphung tam tak siam danglamnaah te, hengah hian a ruangamah a rawn lang chho tan a, lang tlang zawk, chipchiar zawk te, budget head te pawh felfai zawk a rawn lang ta te pawh kan han hmu thei a. Heng zingah hian Mizoram 2<sup>nd</sup> Finance Commission-ina recommendation a lo pawm tawh, sorkar kal tain a lo pawm tawhte zinga lawmawm tih deuh mai pakhat han sawi tel ka duh chu - Lawngtlai West Bialtu, Member Pu C. Ngunlianchungah sawi ang deuh khan Pu Speaker, sawlai ADC bial pathum te tana kan sum dahah pawh 2<sup>nd</sup> Mizoram Finance Commission chuan 42% lai mai vertical devolution atan a han earmark a, kha kha thil thar niin tun budget-ah hian a hmasa bera tan tihlan a ni a. Chuti chung chungah kan thlir chuan 42% atanga 90% kha ADC pathum te chanpual kha a han ni leh a. Chung 90% chu kan chhut chhuah chuan, kan chhiah tling khawm atang chuan crore 400 chuang awrh a ni a. Chutichuan, an indaih lohna vaibelchhe za chuang fe kha deficit grant angin state consolidated fund atanga la pekchhuah belh a han ni leh a. Khatah khan, nikum aiin ADC pathum te inrelbawlna hi crore 100 chuangin, budget estimate hi a pung lawi a, chu chuan a realistic zia pawh a tilangin ka hria a.

Tin, thuneihna zau tak a pe ni te pawhin a lang a, khangah khan sawi tur tam tak a awmin ka hria a. He kalphung thar sorkarah hian kan member puitena an rawn sawi tawh ang zawng zawngah khan budget kalphung thar kan hmu niin ka hria a. Kum han tawp sela, sum chu a enkawl dan, a rawn luh dan kan tih rualin, a hman leh dan thlengin *year of consolidation* hi a takin a lang dawn em, tih hi mipuiin kan thlir thap tawh dawn a.

Hetianga huai tak maia '*balance budget*' ti mai ang, hman ban leh chuan tur pawh awm lo, lut leh chhuak intluk thawthangin kum bul kan tan dawn a, sum leh pai, kan treasury atanga negative crore 300 chuangah bul tan tur kan ni chungah hetiang tak maia kan budget



pung chuang si lova, daihzai zawka kan Finance Minister tan te pawh hian flagship programme atana hei aia tam han dah te pawh hi a chakawm vein ka ring.

2019 kuma crore 700 chuang crore 10,000 awrh ah kan dah hrang lawih thei te kha chu a tam a ni. Chief Minister ni bawk, (Finance Minister ni bawk) teina an lo enkawl thina kha vawiin niah chutiang pawh chu ti lovin, mahni tan ti tawh lovin, ram tan awmze neiin a concern department-te hnenah leh a concern subjects-ah hmasawmna tur kan neih theihna tur atana lang tlang tak maia semzai sa a han ni hi he Sorkar kalphung thar tur leh Finance Minister-ina sum leh pai enkawl a tum dan hi a langin ka hria.

Sawi tur tam tak karah ‘*Bana-kaih policy*’ te an rawn sawi tawh a, khang atana kan sum dah te, entrepreneurs-te tan te, thalai hna nei lote tan te, eizawng tur atan te leh khang zawng zawng atana tam lua ni lo mah sela, a hman tlangkaina tur atan kan hman chuan, awmze nei zawkin kan sum leh pai dehchhuah kawngah pawh kumin budget hian min han puih ngei a rinawm bawk a.

Ka hun hman zawh loh ka duh em avangin thil pahnih han request ka han duh a, Pu Speaker. Vawiin nia min lo thlirtute, vawiin nia helaia mipui aiawha thute hianin member thenkhatte thusawi kan hriat tawh ang khan, dan zam tura mipui aiawha thlante hianin hma kan hruai ngam chuan, leh, vei lama thute pawna min promise ang a, he Sorkar hi kan vilpui tlat chuan kal dik lo theiloin a awm ang a. Mahniin ti tawh loa, he ram mipuite tana kan ngaihtuahna kan sen chuan ‘he budget hi a tawk’ tih hi kei chuan ka chiang a.

Bultanna atan, a leh pekah pawh hian hei aia tha leh ngaihzawnawm zawk te pawh hi a la rawn chhuah leh ka beisei a. Chumi follow-up na tur atana pawimawh em em mai chu - heng budget zawng zawng kan inngahna hi mipuiten kan lo thlir tawh a, kan lo beisei ve tawh thin a. Chunga kan lo thlira chu ‘Dan’ a ni. Dan hnuai thil a kal hian a awlsam a, a lang tlang a, a rintlak a, a inngah ngam thin a.

Chung a nih avang chuan, heng kan budget-a pawh hi FRBM - Fiscal Responsibility and Budget Management Act hnuai siam leh duan vek a nih avang chuan, hmabak pakhat kan la neiin ka hria a. He budget session a zawh rual hian, heng pass a lo nih hunah pawh he budget enkawl zuitu tur Public Expenditure Review Committee tih hi khel lova FRBM-in a phut a ni a. Chu Committee-a chuan sum lut leh chhuak hi thla ruk danah vil zuiin, House-ah Committee report-te pawh a rawn la theh luh ka beisei a.

Sorkar hi lang tlang sela, mipui lang tlang bawk ila, inring ngam tawn bawk ila; chutiang ni tur chuan budget lang tlang vawiinniah hian pharh niin ka hria a. Chuvangin, kumina budget General Discussion-ah hian mipuite’n a topic malin kan la khel hunah pawh a rawn lang chiang chho tawlh tawlh ang a, rintlak a nih zia an hriat theihna tur atan leh

kan Opposition-te pawhin lungrual taka min pass puia, a ven zuipui hna pawh min thawhpui chhonzawm turin ka han sawm bawk a ni e. Pu Speaker, ka lawm e.

**HON. SPEAKER** : A lawmawm e. Hun a hmang dik hle mai. Tunah chuan Aizawl East-II Bialtu, Minister zahawm tak Pu B. Lalchhanzova, ilo sawm ang.

**PU B. LALCHHANZOVA, HON. MINISTER:** Pu Speaker, ka lawm e. Minister kan ni a, han din pawh a inthlahrunawm viau a. Amaherawhchu, House kan vawikhat luhna a ni a, budget discussion dangah te chuan kan ding zui lo maithei a. He kan ram tana thil pawimawh tak House Leader, kan Chief Minister-ina a vawikhat budget pharhnaa sawi ve han nih kha a tul hlein ka hria a, ka han ding a ni.

Pu Speaker, he budget hi a ropui hlein ka hria a. Nimin lamah te kan sawi tawh a, nimin lama sawitu thenkhat i veilama mite khan, “he budget hi eng nge maw a danglam viauna le? Thil danglam vak pawh a awm viau em maw ni le?” te kha an han ti a. A danglamna ropui tak nia ka hriat chu - budget vawikhat pawh la pharh ve lo, “Pathianin siam turin a ruat lo”, ti a beihna tawk nasa em em mai khan he Assembly House zahawm takah hian budget a han pharh ta mai chu a ni a. Hei hi kan ram political history-ah thil chhinchhiahtlak tak a ni a.

Tin, Pu Speaker, ka ngaihtuahna pakhat pawh a lo lut fo a. Nimin lam khan phai lam mikhual, vai pakhat nen kan inkawm a, “in party hi kan hre ngai si lova, engtin nge in sorkar mai le?” min ti a; “Tumruhna leh ram hmangaihna avanga kan beih hram hramna leh kan tih tlatna rah a ni e”, ka ti a. Chuvang chuan, he budget, vawiinnia kan sawi ho taka hi tlawm duhlohna, ram tana thil tha tih tuma an beih tlatna avanga budget lo chhuak a ni a, a ropui hlein ka hria.

Pu Speaker, nikum February Ni 13, 2023 khan Chief Minister kalchhuak ta, Pu Zoramthanga khan he House-ah hian tuna budget kal mek, financial year thar ni lo hi a pharh a. Tuna budget kan sawiho mek hi vawiinnia kan House Leader Pu Lalduhoma'n February ni 27 khan he House-ah hian a pharh a ni a. Hei hi kan ram tan mellung pawimawh tak ni turah ka ngai a. Tin, he budget hi ka ngaihtuah a, inthlan hma pawha kan lo aupui ve, vawiinnia min lo thlirtu mipuite pawhina min hriatpui atana ka duh chu - he budget chungah hian kan Sorkar rual ruala, “₹50,000/- engtikah nge min pek dawn; ₹1,00,000/- engtikah nge min pek dawn; ₹3,00,000/- engtikah nge min pek dawn; in ₹2,00,000/- ..”, tih ang kha a awm miah lo mai a. Chutiang chuan, vote zawnga intiam lova budget kan han tuakchhuak hi a ropui hlein ka hria a. Inthlanna a vote duh vanga in tiam vak vaka, ‘chu chu kan pe ang che u’, han tih ang chi, khatiang ni lova budget pharh an ni ta hi a ropui hlein ka hria a ni.

Kan House Leader in budget a pharh hi, ti hian ka han pharh a, ka zir ka zir a nizan pawhin; central sorkarah fund te chu kan dil nasa dawn a, kan nu leh pa te an ni a.

Amaherawhchu, he House Member-te leh Zoram mipuite pawh hian, ram khat - state khat kan ni a, Central sorkara inngah thuk lutukna *dependency* sang lutuk maia hi kan tihhiam ngam hi a tul hlein ka hria. State kan nihna anga India sorkar constitution hnuiaia kan chanvo te chu kan zu haichhuakin kan zu verh pawh tur te chu a ni teh meuh mai a. Amaherawhchu, Central-ah khuan sum a tam khawp a, *belte phai thei lo* tih ang maia mipuite kan tiam vak vak thin hi he budget-ah hian khatiang lam kha kan kalsan hlein ka hria a. Kan ram a ni a, ‘kan ram dinchhuahna tur hian kan thawk tur a ni; kan thawkrim tur a ni; kan bei tur a ni’ tih hawi zawng budget kan hmu hi a ropui hlein ka hria a ni.

Tuna ka thusawi behchhan tho, kan revenue deficit grant te pawh a tlahniam chho mek tih kan hria, tun kal mekah hian crore ₹1079 a ni a. Kum thar 2025-26 ah phei chuan crore ₹586 he revenue deficit grant-ah hian kan hmu dawn a ni. A enga pawh chu ni rawh se, hlau chungin i hmachhawn lovang u; kan thei ve a ni. Kan tangrual ang a, ‘kan thei ang’ tia hetiang ang chi pawh hi kan lo hmuah thiam hi a tul hle mai a.

Pu Speaker, thil lawmawm dang kan sawilan leh duh chu - State Own Tax Revenue 22.29% a pung chho tur te hi kei hriat nuam ka ti a, a hlimawm ka ti a. crore ₹2434.81 hemi budget speech a kan hmuh dan chuan kan State Revenue lak ve tur, kan sum thawhchhuah ve tura hi khatiang ang zawnga kal chho tur kha a ni. Ka lo ngaihtuah danah phei chuan, kan budget pumpui atanga 30% tal te hi kan State thawhchhuah ve te hi ni se a va nuam dawn em! Khuavel kan chhing ve ngeiin ka ring, khatia kan tih chuan. Tute emaw chawmhlawm nih reng ringawt mai hi, heng hi kan inzirtir dan tur hi ni lovin ka hria a. Chuvangin, he budget hi ropui ka ti hle a ni.

Tin, *hand-holding* hi han sawilan ve hlek ka duh a. Nimin lamah te pawh i veilama mite khan, “hand-holding-ah crore 200/- chauh hi a va tlem ve, SEDP-ah kha chuan..” ti ang te pawha rawn sawi a awm a. A bul ka tan a, ka sawi ang deuh kha a ni a. Vawiinni a kan budget pharh hi State pawisa kan hmuh hrang hrang bawm khata khungkhawm tumna budget a ni lova. SEDP te nena ngaihpaawl tur kha a ni lo a ni tih lai hi House member zahawm tak te leh Zoram mipuite hian kan hriat a tulin ka hria a. SEDP te khan mipui min ti confuse em em mai a; ‘family oriented’ an ti, a kawnglaih te pawh SEDP a ni zo vek a, Damdawi in sak leh thildang zawng zawng kha SEDP kha a ni ta vek mai si a. Amaherawhchu, he budget-ah hi chuan kha kha a awm ve lo a ni. Hand-holding - thlaithar leina crore 200 anih chuan crore 200 a ni mai. Khatiang deuh khan mipuite tana hriatfiah awlsam chi in he budget hi pharh a ni.

Tin, Pu speaker, kan lo au ve thin tawh han sawichhuah nawn duh ka nei a. Kan budget te hi keini MLA ni ve tan pawh hian han sawi mai te, sawi sual te, engkim mai hi a cho awm loh riau mai a. Amaherawhchu, “budget hi hriatthiam awlsam zawngin kan kalpui ang” tih te pawhin kan lo au tawh thin a. Vawiinniah heng te pawh hi a mipui nawlpui

ten an chhiar ve phak anih chuan, hriatthiam awlsam an tih ka ring a, hetiang budget kan han duang chhuak hi a lawmawm hle a ni.

Pu Speaker, an sawi fo tawh a, kan member-puite pawhin; gender budgeting chungchang hi han sawilan ve hrim hrim ka duh a. ‘Gender budgeting’ tih kan budget-a zia a rawn awm hrim hrim hi mellung pawimawh tak a ni. Australia in 1984 khan ‘gender budgeting’ tih hi an rawn introduce a, India ramah 2004 - 2005-ah khan kan adopt ve a, Central Ministry budget-ah 2005 - 2006 khan bul tan a ni a. Tichuan, a hmasa ber atan Karnataka sorkarin 2007-2008 khan *gender budgeting* hi an budget-ah tuna kan tih ang hian bul an lo tan tawh a ni. Pu Speaker, he thil ka han sawilan duh kherna chhan hi a awm a. ‘Gender budgeting’ kan tih hian *equality* (intluktlanna) ni lovin, *equity* zawk a ni a. Chumi awmzia chu - a chak lo zawk hmeichhia dawmkan ngaite hian ngaihsakna - special care an dawng tur a ni. Kan House member thenkhatte pawh in he Assembly chhungah hian ‘hmeichhe inthiarna hran kan mamawh a ni’ an tih ang chi te kha gender budgeting a ni. Tin, city bus emaw, town bus emaw ah te hmeichhe thutna bik kan han siam sak ang chi te hi, khatiang kha gender budgeting a ni a. An chanvo, duhsakna kawng hrang hranga protection te an chan theihna tura buatsaihna kha a ni.

A tawp berah chuan Pu Speaker, Mizoram Education Reform Policy hi han sawilan ka duh a, budget speech-a a rawn lang hi ka lawm em em mai a. I hovin Delhi-a kan training pawh khan a tawp bera kan resource person khan, “India ram hi kawng hrang hrangin hmasawn kan mamawh a ni. Farmers welfare ah te, kawngpui tha te, healthcare tha tea kan la hnufual chhan chu, *education reform* kan mamawh lutuk a ni. India ram in kan mamawh hmasa bera chu, *education* a ni; a dawtah, *education*; a pathumna ah pawh *education* a ni” a ti ang khan Pu Speaker, he sorkar hian education siamthat (reform) a hi kan State hmalak zelna atan a pawimawh zia a rawn tarlang hi ka lawm a. He budget pharh tak hi a thlawpawm hlein ka hria a ni. Ka lawm e.

**HON. SPEAKER** : Aw le, sawi leh turin Hachhek Bialtu zahawm tak Pu Robert Romawia Royte ilo sawm ang.

**PU ROBERT ROMAWIA ROYTE:** Pu Speaker, ka lawm e. Vawiin chawhnu lamah kan Chief Minister (Finance Minister ni bawk) budget hmasa ber kan sawiho tur hi a lawmawm hlein ka hria a, a hmasain kan House Leader, Chief Minister zahawm tak Pu Lalduhoma budget pharh theia Pathian-in a hruai avang leh, hun rei tawh tak atanga a lo thlir ve te pawh niin ka hria a; a taka he dinhmun changa budget tha tak mai a pharh avangin ka congratulate duh a. Vawiinah hian a sawi pawh a phurawmin ka hria a. Mahse hun a tam lova, sawi tur a tam a, a point zawnga han sawi te pawh kan tum ve ang a.

*Pakhatna*-a ka sawi duh chu - vawiina kan House Leader ni mekin term hmasa lam (a hma daih, kan la tel ve hma pawh a ni mai thei a) a lo sawi fo tawh thin Supplementary Demand for Grants chungchang hi tawitein ka sawi duh a. Kan hriatdan hi a inang lo em aw ka ti a; hemi Supplementary Demand chungchang hi member ten sawi a awm zauh zauh a. *Supplementary Demand for Grants* hi kumin kum kal laia department hrang hrang tena sum an neih belh Assembly session-a kan vote ngai leh, a vote loh chi pawh heta pharh ngai chi *Charge Account* te ang, pholan ngai chi kha a ni a. ‘Sawi vak ngai a ni lo’ tih te pawh kha a awm a. Mahse budget document zinga mi, *Supplementary Demand* hi a nih ve avang leh, kan Finance Minister-in a pharhte zinga mi anih avangin, State dangah leh tunah pawh kan sawiho hi kan tih tur tak te pawh a ni a. Mi tam takin Supplementary Demand kan sawilang a, a lawmawm hle pawhin ka hria a. Supplementary Demand hi keimah mimal pawhin a hminga Minister of State ka nih ve tirha Officers meeting kan neih hmasaah pawh, “hei le, kan budget neih chu heti te mai hi a ni a, hlawh kan inpe thei awrh chauh a ni a. Sports & Youth Services a ni emaw, ICT Deptt. a ni emaw, Tourism Deptt. a ni emaw, Supplementary Demand tam tak session leh a budget pharh huna pharh thei turin tan ila ang u aw,” tiin ka officers te ka sawipui a. Supplementary Demand tam tak pharh thei tuna minister-te zingah an awm hi lawmawm hlein ka hria a ni.

A negative zawng lek leka Supplementary Demand state sorkar sum awm sa han inleh burh kual vel kan sawisel lai hi chu ka hrethiam tho mai a. Khami piah lamah khan department tam tak budget hi ka han thlir thuak thuak a, Supplementary Demand tam zawk nei tura an tan loh chuan, mipui beisei leh ZPM sorkar anga kan lo inzawrh thinna ang chi pawh hi, kan tlin zawh loh a hlauhawm a. Chuvang chuan, supplementary demand tam zawk kan Chief Minister zahawm tak hian budget session lelah chuan helaia Finance atanga Planning-a suan kual mai mai emaw, planning atanga lak let leha, Agriculture-a han pek kual vela figure ngai kual tlut tlut ni lo, *Supplementary Demand tha chi* kha minrawn hlui hnawh thei tur te pawhin beisei ila; chutiang tur chuan duhsakna te pawh ka hlan duh a ni.

Hei, kan en theuhin ka ring a Pu Speaker, ka han en thuak thuak a. Home Deptt. ah hian supplementary demand ah cheng nuaih 5,000 a rawn lang a. Chutih mek lai chuan kan Home Minister zahawm tak khan, (nui chungin ka han sawi ang a, ka fiamthu deuh te pawh ni ta sela, kan muk em mai a) ‘cheng nga pawh sorkar kal ta khan min hnutchhiah lo a ni’ a tih kha, fiamthu ni deuh chuan ka hre tho a, a tih lai khan supplementary demand kaltlang hian kan Home Minister hmasa zahawm tak Pu Lalchamliaa khan cheng nuai 5,000 lai mai, (cheng khatmah la hman heu loh niin a lang a) a lo hnutchhiah a, chutiang lo pawh chu tam tak a awmin ka ring a. Single nodal account-ah tunah hian sum 50% a awm turah ngai ila. Khatiing khan he supplementary demand hman hian kan sorkar hmasate chet thatna te pawh hi a lang a; heng te hi tun budget speech ah te hian emaw han tarlan ni sela, a va tha awm em ve aw, tih te hi rilruah a awm a.

Tin, Agriculture ah hian, supplementary demand ah cheng nuai 11,000/- a awm a, hei hi a kal kual nasa khawp mai a. Planning-ah a kal phawt a, (supplementary demand kha in en chuan cheng nuai 30,000/- zinga mi kha a ni a) tichuan, a let leh a, Finance-ah, Finance atangin Agriculture ah, tunah hian supplementary demand bawkah pawisa ngai kha a lut leh a; tunah chuan a awm hlen tawh turah te pawh ngai ila, kan sorkar tharina thutlukna a siam a ni a. Hei hi, ‘Hmunphiah leina tur a awm reng si a...’, han tih lai vel boruak kha niin a lang a.

Tin, Healthcare ah te pawh crore 40 (nuai 4000) hi Finance Deptt. lamah a lang a, kan hmuh ang khan. A chhan chu, Mizoram Healthcare Society hi Finance ina kutken a nih vanga Finance ah budget hi dah a nih hmel a. Hei pawh hi Planning Deptt. te pawh kha a va thleng zuai zuai tawh a, chuta tang chuan lak let leh a ni a, chuta tangin Finance ah pek leh a ni a. Tikhan, a figure ngai pawh hi supplementary demand ah hian (‘a chhe chi’ tih ang zawnga han sawi chuan) a kual a kual a ni, tih kha hetah pawh hian a chiang reng mai a.

Tin, PWD ah hian supplementary demand hi cheng nuai 74,702/- a awm a, a tam khawp mai a. Han enchian chuan cheng nuai 46,777/- chu SASCI atangin niin a lang a. Hei erawh hi chu a tha chi, kan state budget suan kual mai mai ni lo, ‘Central transfer’ tih nichina member zahawm takina a rawn sawi ang chi kha a ni a; a dangte pawh hi a ni deuh nual hlawm a.

Tin, Sports & Youth Services Deptt. ah hian nuai 2,562 a awm a, (Sports lo enkawltu hlui ka nih angin leh, tuna kan Sports Minister zahawm tak ka support-na te pawh a ni ang a) he supplementary demand hi chu khawih danglam loha a tlang loh chuan Sports Deptt-a kan Sports Minister zahawm tak budget kan sorkarin a pek hi Pu Speaker, nuai 2,500/- vel awr chauh kha a ni a, thil lian tham tak tihna tham a awm vak lova. Chuvang chuan, he nuai 2,562/- supplementary demand-a sorkar hmasa lama lo awm tawh, (la hman lohte pawh niin ka ring a) a vai hian a ni mai thei e, heng hi ka han sawilang ve duh hrim hrim a ni.

Tichuan, deptt. tam tak sawi tur a awm a; supplementary demand chungchanga ka sawi duh, ka point ber ta chu - hei hi a aia chiang zawk hian Pu Speaker, nangmah kaltlang hian kan House Leader pawh ka ngen duh a; Supplementary demand bu kha kan en chuan, “khawi atangin nge kha sum kha deptt. ah khan a luh tlai leh hnuhnawh?” tih hi chiang zawkin kan budget buatsaihtute hian tichiang ta sela; “Central transfer atangin nge, CSS atangin?” tih laia kha. State budget, Finance-a awm sa reng Mizoram-a kan pass tawh hnu tho, kan dahsawn avanga supplementary demand-a han tihlan ngai ang chi kha; “khawi deptt. berin nge supplementary demand tha chi hi nei chiah le?” tih te pawh kha he House hian chiang zawkin hre thei ta ila, chu chu ka suggest duh a.

Kan House Leader zahawm tak Finance Minsiter hian budget buatsaih leh hunah chuan supplementary demand hi (a ma vei tak pawh a ni bawk a) khawi khawi atangin nge khang supplementary demand kha, kha sum kha a lo kal; central atanga lo kal a nih chuan kan budget pass hnua deptt. ten khami financial year kuma sum tam zawk emaw, sum an thawk chhuak a, supplementary demand an rawn nei a nih kha chuan thil lawmawm tak a ni a; chutiang tur chuan kan minister-te pawh an tang vek turah ngai ila. Khatiang ni lo chi, han dawnkhawm hnawk te pawh kha a awm thei tho ang a. Chuvang chuan, supplementary demand ah hian fiah zawkin kan tilang thei ang em le? Tilang turte pawhin ka han rawt duh a ni.

*Pahnihna*-a ka sawi leh duh chu, SASCI chungchang hi a ni a. SASCI hi scheme tha tak mai a ni a, kan sorkar thar pawh hi an lawmpuiawmin ka hria a. (*Warning bell a ri a.*) Pu Speaker, minute 10 kha kan nei dawn.. (**Hon. Speaker:** Khi khi a tang a, ka timer ah hian...) Pu Speaker, a ni maw; khimi en khian ka lo ti si a, min hriatthiam loh chuan ka va sawi tam awm lo ve, minute 4 chauh a la ni. Ka sana ah pawh hian a niin ka hria. Engpawh nise, minute 4 ah min pawm sak hram la.

SASCI hi crore 694, Mizoram sorkarin sanction kan nei tawh a, a lo chhuak tak chu crore 462 a ni a; sanction a nih tawh kha chuan a vaiin lo chhuak tura beisei loh theih a ni lova. Administrative approval pawh a sanction zat ang hian Finance Department hian an pe tawh turah ngai ila. PWD te pawhin administrative approval an hmuh na na na chuan tender te pawh administrative approval amount-in an siam turah ka ngai a. Chutiang a nih mek lai chuan, tunhnaiah hian thil a chiri deuh em aw, tih theih turin, kan beng thlengin, ‘53% hi ni mai sela’ tih te a ri a, helai hi en that a tul hle mai a. Tin, sorkar a in ‘change’ emaw hian *lapse* hi a awm vak fo mai a. Mizoram-ah hian 2008-2009 congress sorkar hun lai khan khan sum tam tak a lapse a ni tih kan hria a. Tin, kumin 2023-2024 ah hian ‘change’ a thleng leh a, helaiiah hian *lapse* hi awm ve lo se ka duh khawp mai a. SASCI ah sum harsa taka rawn sanction a ni a, heng hi a lapse a hlauhawm a, a lapse loh nan kan sorkar hi tangin, mawhphurhna lo la hmasa te emaw, contractor hmasa te emaw han chhunzawm tir duh chiah lova han veh chung hian, sum hi a lapse duh khawp mai. Chu chu sorkar inthlaka sum a lapse thinna hi a ni a. Chuvang chuan, a lapse lohna turin work order an pek ang anga kalpui hi a dik ang tih ka sawi duh bawk a ni.

Tin, *hand-holding policy* hi ‘mamawhtute tanpuia khai chhuah’ tih kha a ni mai a. Sorkar hrang hrangin state hrang hrangah pawh hand-holding policy kan nei thin a. Congress hun lai chuan an hand-holding policy chu NLUP a ni tih kan hria a, MNF hun laia hand-holding policy chu SEDP kha a ni a. Tun sorkar thar hian an hand-holding policy ah hian engnge an tih ve dawn ka hre lova, ‘hand-holding policy’ tih chin chauh hi an sawi duh a, a hming hi an la phuah chiah lo a ni mai thei e. Engpawh nise, hand-holding policy tha kan tih te a inang lova. Chutih mak lai chuan MNF ina hand-holding policy duh taka kan lo enkawl leh, chumi hmanga chhungkaw singruk khai chhuahna

tur atana cheng nuai 15,000/- kan lo dah hran, supplementary demand-a depts. hrang hranga suan kual, suan kual ringawt mai hi a zia lo hle mai a tih hi vawiinah hian ka sawi duh a. Engpawh nise, ngaihtuah that leh theih te a nih chuan. A tak takin an lo la hmang lo a nih chuan, kan *hand-holding policy*-a mi retheite khai chhuah theihna tur atana kan ruahman ang khan, anmahni hian ‘an implement thei ve mai lawm ni?’ tiin ka’n ngen duh bawk a ni.

Tin, ‘kan budget siam hian Central Union Budget lam khu a hawi lo hret em aw’, tih te rilruah a awm a, helai kan implement chhohnaah hian Union Budget tinzawn deuh zawnga kan her rem te hi a van tha dawn em, tih te ka sawi duh a.

Tin, sorkar hmasa hun lai khan, “Finance Department changtu kan Chief Minister-in sum, a lipui a kawl a, a thutpui luau mai a, a khawnpui-ah sum zawng zawng an dah a” tih te kha a awm a. Hei, helai ka thlen hnuah budget bu hi ka han en a, ka keu thuak thuak a. Sorkar hmasa 2023-24 a budget estimate ah khan Finance Department changtu Chief Minister-in sum a neih chu crore 332.47 a ni a. Tunah hian kan Chief Minister zahawm tak Pu Lalduhoma’n Finance Department-a a khawnpui-a a sum kawl hi crore 343.813 a ni a, kan Chief Minister hlui zahawm tak Pu Zoramthanga khawnpui ai khan kan Chief Minister ni mek Pu Lalduhoma khawnpui hi crore 100 velin a tam zawk a. Chuvang chuan, kan sawi kan sawi thin kha a lo tha niin a lang a, a aia uarin kan ti ta ni pawhin a lang e.

Tin, *Ways and Means Advances* chungchang hi tawitein ka sawi duh a. *Ways and Means Advances* hi budget ah te reflect thin a ni a, tunah chuan reflect ngai tawh lovin A&G lam nge Finance lam ka hre lova, ‘reflect kher a ngai tawh lo e’ tih te a lo ni deuh a ni awm e. Chuvang chuan, kum hmasaa crore 1000 (*nuai, nuai khat* a nih chu, a nuai zawngin sawi ila) *Ways & Means Advance* sum puk tura lo lang kha kuminah chuan nuai 3 chiah a rawn lang ta a. Hei hian he sorkar thar ina bat kan tum lo, sum puk tam kan tum lo an tih chhanah chuan, ‘hengte mai mai hi a ni em aw’ tih hi rilruah a lang deuh a; an sawinaah an rilru te kan hre vek lo na a. Crore 1000 ziahlan a ngai lova, budget reflect a ngai tawh lova. Chuvang chuan, kha khan sum puk tur chu a tilang tlem a, budget te pawh a timawi a ni. A tak tak ramah hian (**Hon. Speaker:** Minute 5 in i pel ta e.) Pu Speaker kam hnih khat lekin, khawngaihin; chu chuan *Ways & Means* chungchang kha a rawn tichiangin ka hria a.

Tin, *Ways & Means Advance* ‘debt stock’ ah a lut ngai chuang lova. Rei lo tea sum advance-a laka, RBI in a phal chin adjust a rulh nghal zel kha a nih avangin, a lan loh pawh hian a buai chuang lova, budget a khawih buai lova. Debt stock ah a lang thiang lo; a chhan chu, Financial Year a tawp meuh chuan *Ways & Means Advance* hi an rul zo vek tawh tura ngaih a ni.



Tin, a tawp nan tak tak chuan, Governor Speech, kan session hmasa berah khan kan Governor zahawm tak khan “*in this Financial year, itself*” a ti a, a tawngkamah pawh. Kumin 2023-2024 chhung hian Pu Speaker, ‘hmunphiah te, thlai thar te kan lei ngei dawn a ni’ tih kha a sawi a, kha kha a takin a thleng ta lo deuh a. Engpawhni se, tun financial year a nih loh deuh pawh hian, hmunphiah chingtu kan bial lamah pawh khuan an tam mai a, an khawngaih thlak khawp mai. Hmunphiah hi lei vat ni se a lawmawm ngawt ang.

Tin, a tawp nan tak tak chuan, Pu Speaker, hei ADC pathum tana sorkar hmasain Finance Commission pahnihna a lo din anga budget dah hran hi a lawmawm khawp mai a. Sorkar hmasa ina thil tha a lo tih apiang chhonzawm hi kan sorkar thar pawhin a duh dan ni pawhin a lang a. Heti lo zawnga kal hi chetsual pawh a awl ang reng a. Chuvang chuan, sorkar hmasa thil tha tih a rawn chhonzawm tur hi a lawmawm hle a ni.

A tawp nan tak tak chuan, Pu Speaker, nangmah kal tlangin kan House Leader leh kan Chief Minister zahawm tak te, kan Minister zawng zawngte, ZPM sorkar hi he budget tha taka implement turin duhsakna ka hlan a ni e. Ka lawm e.

**HON. SPEAKER** : A lawmawm e. Minute 17:12 a ni e. Tunah chuan, Aizawl East-I Bialtu, Minister zahawm tak Pu K. Sapdanga ilo sawm ang. Aw, Sorry, Aizawl North-III zawk.

**PU K. SAPDANGA, HON. MINISTER:** Pu Speaker, ka lawm e. Hma lamah duh chen chen an sawi a, Chair atang pawhin a tawng fuh hleih theih loh a ni awm e. Hei, kan Chief Minister, Finance changtuin budget a rawn pharh a, a thu phuah chhuah a hi a lawmawm takzet a; kan zavaiin, kil tin atangin kan fak rawn a ni ber a. Nimin khan telephone call ka dawng a, House pawn lam thil mah ni se han sawi ve mai mai ka chak deuh a. Putar pakhat hian “Pu Sap, *Chanchintha Pu Duhoma Ziak* kha a bu i nei em” a ti a, ka bang bo khawp mai a. Chutiang a awm em ni? ka ti a. “July ni 27-a, House chhunga a sawi kha maw le” a ti a. ‘E, ngawi rawh; a bu hming i phuah kha ka bo deuh a nih chu’ ka ti a. February ni 27-a a sawi kha a ni awm e.

Aw le, hei kan hriat tlat angin he House-ah hian kan luh ve vawikhatna a ni a, thla thum em pawh member kan la ni lova, tin, session-ah pheichuan vawi khat kan thut luhna a ni a. Budget phartu te lama kan han thu ve hlawl mai hi a mak hle mai a. Thil thar a ni a, a zam awm ang reng hle mai a. Chutih lain kan eizawna ten a zir bawk a, Kum 30 lai chu gallery atang hian budget pharh hi kan lo ngaithla ve tawh thin a ni. Ka hriat sual loh chuan, kum 20-30 kal ta vel, kum 20 chhung vel kha chuanin budget hi saptawngin an pharh thin a. Kum 2013 atang khan a niin ka hria a, Mizo tawngin an chhiar chhuak tan ta a. Tunhma chuan harsa kan ti em em a, Chanchinbu-mi angin saptawngin, an chhiar rang si a, kan hrethiam thin lova; a bu kan enpawhin kan hrethiam chuang lova. Budget pharh a nih veleh hian Finance Minister pawh luhkhung lovin Official, Finance

Department-a mite budget hria kan luh khung a, an niin *note* min lo siam sak a. Chutiang chuan kan hrethiam hram hram thin a ni.

Chumi kan sawi duah duh chhan chu, tun tuma kan budget pharh, kan Finance Minister-in a pharh hi chu kan media thiante ka atanga ka hriat danin, “A pharh lai la la khan kan hrethiam fai vek mai a. Chuvangin, budget kan ngaihthlak tawh zawng zawngah chuan media mit atang leh media beng atang chuan, hriat thiam a awl ber a ni” tiin an comment a, chu chu he House hi ka han hrilh chak ve deuh a. Pawn lam mite phei chuan, ‘*Chanchintha*’ ti tein an lo phuah a nih kha; a mawh lo viau a ni.

Aw le, tuna kan budget sawi mek hian tinzawn thahnem tak a neih zingah langsar zual a awm a, pakhatna-ah chuan, - ‘*Mizoram mipuite tana eizawna kawng, tlo leh nghet buatsaih*’ tih a ni. He thu ringawt pawh hi, he budget bu ah hian chuang ta se la, thlamuanpui tlak niin kei ka hria a. Eizawna kawng tlo leh nghet Mizo mipui te tana neih hi sorkar din chhan, kan inthlan thin chhan, sorkar tinzawn ber, sorkar hnathawk tam tak rawih an nih chhan hi niin a hriat a ni.

A dawt lehah chuan, - ‘*Langtlang leh rintlaka sum leh pai enkawl*’ tih a ni a. Mizoram mipuite kan buaina ber chu, budget hi a lo lut hnem niin kan hre si a, central sorkar atangin leh, helai tualchhungah pawh ram chhiah te kan pe a, tui bill te kan pe a, electric bill te kan pe a, property tax te kan ti a. Chhengkaw tinin sorkara lut sum hi thahnem tak kan pe a, a hmanna lamah hian kan chian loh thin avangin kan rilru a buai thin a ni. He budget bu hian ‘*langtlang leh rintlaka sum leh pai enkawl*’ tih a rawn tinzawn tak avang hian, chu chuan corruption do pawh a rawn hril nghal ta a ni. ‘Eng angin nge a tihpuitlin ang?’ tih chu sorkar enkawltute kut a ni teh meuh mai; amaherawhchu, hetiang langtlanga a rawn tiam, mipui, khawvel hriat theiha a rawn tiama, a rawn tinzawn hi a lawmawm hrim hrim a ni.

Tin, ‘*chung sumte chu a neitu mipui hnen thlen phak tir tur a ni*’ a han ti zui leh a. Chutah a la duhtawh mai lova, ‘*a thleng pha ngei em, tih finfiah zui zel tum a ni*’ tih chu, thuhmahruaia awm kha a ni a. Thuhmahruai zawng pawh hi sawi fe tham niin ka hria.

A dawt lehah chuan, he House chhunga Member-te mai ni lovin, Mizoram pum hnenah hian thawhchhuah nei tam turin he budget hian min beisei a ni. Budget bua kan hmuh angin, kum khat chung Mizoram puma sum che vel, GDP kan tih mai kha crore ₹39,355 a ni a, tichuan, tunkum hi a tawp hunah chuan crore ₹48,037 ah hlankai tum a ni tih a lo lang a. Tichuan, mipuite’n kan thawhchhuah ve tura beisei chu crore ₹8,681 a ni ta a ni. Hei hi a lawmawm em em a, mipuite’n an hrethiam a. Tunah hian ngaihthlak nuam em em chu, kan ruling party block hruaitute pawhin iptechei aka Minister bungalow leh Minister office bathlara eizawn tum lovin, an chempui an tathriam a, an tuthlawh an chher tir a, lo an vat a. Sawhthing hmun a zau thei ang neih

tumin a ruling hruaitute meuh pawh kha an feh chhuak a ni tih han hriat hi ngaihthlak a nuam em em a ni.

Sum che vel tihpun ringawt hi intihtheihna tur a ni hauh lova, a pun chhan zawk kha a pawimawh lai a ni. Puk tam vangin a pung thei; grand avangin a pung thei; sorkar hnathawk hlawh tihpun vangin a pung thei; chung chuan GSDP hi sang takah a hlang thei. Amaherawhchu, puk vanga GDP sang ringawt a nih chuan leiba a tam ting mai a ni. Kan member zahawmtak te'n pawisa an han sawi pur pur a, 'heti zat hi a awm a, ti zat hi kan hnutchhiah a' tih te kan han ngaithla a, a lawmawm e. Amaherawhchu, khang zawng zawng kha kan thawhchhuah ni lovin, khawia mi emaw kan puk a ni tlat a ni. Chuvangin, tunah hian he sorkarin a bat chu, crore ₹14,000 a ni tlat a. Chuvangin, 'cheng 5 pawh min hnutchhiah lo e' kan ti ngam ta a nih kha.

Tunah chuan Pu Speaker, kan opposition member zawng zawngte hnenah hian nangmah through-in lawmthu ka sawi duh; hetiang khawpa budget fak rawn hi a awm ngai lo reng reng a. Chuvangin, a implementation-ah pawh, a tihhlawhtlinnaah pawh kan tang ho ngei ang a, he ram hi kan siamthat theih ngei ka ring a, tun atang chuan '*Zoram ah khua a var ta e*' tiin kan ziak ngam tawh ang tih ka ring. Ka lawm e.

**HON. SPEAKER** : A lawmawm e. Sawi duh kan awm tawh loh chuan, kan Leader of Opposition, Pu Lalchhandama Ralte kan sawm ang a. Ani chuan hun a hmang thiam turah ngai ila, bell ka hmang hran lo ang e. Tunah ilo sawm ang.

**PU LALCHHANDAMA RALTE, OPP. LEADER:** Pu Speaker, ka lawm e. Hei kan chau tawh deuh maithei a, ka ding lama thu kan Dy. Speaker hian min huphurh lawk khawp mai a; 'i sawi rei dawn em' min ti a, lehkha hi ka lo ziak deuh char char a, paper hi ka sam ka sam a, kan House Member zahawm tak tak ten an thusawi te he lam atanga han react chak ve deuh te ka lo ziak a, ka tihrei lutuk hi a hlau bawk si a. Chuvang chuan, a bulah pawh ka lo promise deuh chu, "ka sawi tum, ka inruahman atanga hmun thuma thena hmun khat vel chauh ka sawi ang. Kan lungrual tha em a, hlim takin he budget general discussion hi kan neih theih avang hian kei pawhin tawi thei anga sawi kan tum ang e" ka ti a.

Pu Speaker, a hmasabera ka sawi duh chu, kan Finance Minister, kan House Leader ni bawk hi ka congratulates a ni. Nichina an sawi ang khan, fak hlawh tak mai budget a pharhna chhan tur pawh, mipuite'n engati ngei heti em ema kan nghahhleha beng kan khawn? han tih takah chuan, kum 40 vel zet hi a lo vakvai ti ila (politics tawngkamin) tuna a thutna (Treasury) lamah thuin budget han pharh te pawh a chak ve a. Vawiiinah Pathian malsawmna a dawng a, a politics zin kawngte han chhut pawh hian a thawhrimna te, a tuarchhelna te, a teirei peihna te kha a fakawm a, thangtharte tan pawh '*hlawhtling tur chuan beih fat fat a ngai a ni*' tih kha a hnutchhiah a. Hei, mihring danah

kum 70 chunglam deuh hlek a nih tawh hnuah hetiang pass thei hi ama tan pawh a milestone tha tak niin ka hria a, thinslung takin ka congratulate phawt a ni.

A dawt lehah chuan, kan han sawi hrang hrangah khan lawmthu sawi pawh a tam a, Pu Speaker, nangmah kaltlang pawha kan sawi thin kha, i vei lama thute pawh hian constructive idea kan nei a ni. Amaherawhchu, democracy-ah kan mawhphurhna, Opposition kan nih anga thil a tha lehzuaw zawka awm theihna turin leh, sorkar han ben harh a ngaih ni ah chuan thu te pawh hi a lanna tlang dang atanga kan han thlira kan sawi ve a ngaih chang a awm ang a. Chungte avang chuan, thil tha tak a awm rual hian, a phenah hian ‘hengte pawh hi engnge aw a awmzia’ han tih te, han sawifiah ngai deuh leh a lehlam zawnga han thlir hret hret ngai te pawh hi a awm ve fo a. Heng hi opposition role atanga kan tih ngai a nih fo thin avangin chu chu a hmasain ka sawi duh a.

Tin, kan budget awmzia hrim hrim te, kan hriat dan te; hei a thar kan tam em em a, keini pawh inzir chho lai mek kan ni vek a. Ruahmanna kan siam a, a hmanna tur te, a hmuhna tur te kum khat chhung atan kan han buatsaih a. sorkarin sum lo hawna tur central lam atangin a ni emaw, keimahni state atangin kan hmuh dan turte emaw pawh beiseina nen kan thlir a ni. Chungah chuan supplementary a ngaih fona chhan pawh a tha lam zawngah pheih chuan kan beisei piahlamah malsawmna tam zawk kan dawn te, sorkarin a vur kum kan han dawn pheih chuan, chung chu vote leh ngai te, sawiho leh ngai te a nih thin avang te a ni fo a. Hei hi, a chang pheih chuan kan budget han sawiho a kan ruahmanna te a boruak a zirin han phak loh chang te pawh kan ngah a ni.

Sawrkar kal ta, MNF Ministry kan awm ve lai te kha, Zoram mipuite pawhin min hriatpui atana ka duhnawn em em chu, kan sawrkar kha budget mumal tak, Zoram mipuite tana beiseiawm tak, keini pawh phur tak hlim taka kan pharh kha, tumkhat chauh kan pharh hman a ni. A chhan chu, kum 2018 tawpah tuna in sawrkar hun angah khan kan sawrkara 2019 budget kan pharh bak kha chu, 2020 ah khan Covid in min man tan ta a, 2021-2022 chho zawng zawng kha Covid ah kan han awm a. Zalen taka budget kan han pharh leh theih chu 2023 chiah kha a ni a. Chumi ah chuan Covid-in a min han shock leh, chumi atanga damkhawchhuak tura kan tawrhna te, kan state economy a tihchhiat zawng zawng en khan harsatna lian tak neiin budget kha kan pharh a. Chutah chuan nasa takin, hei tun a kan sum hmante pawh hi, khami ina a nghawng chhoh thil tam takte pawh a awm chho a. Zoram mipui min beiseitute, min beiseina ang kan phak loh fona pawh kha kan hun tawng vang kha a ni a. Vawiinniah sawrkar tharin boruak tha tak hnuaiyah budget zalen tak a kan han pharh thei te hi a ropui ka ti a, ka lawmpui a ni.

Chutih rual chuan, kan budget overview - a tlangpui han thlirna tlema zawng han neih ve ka duh a. Kan hmuh ang khan *voted* ah khan crore ₹13,176.85 a ni a, *charged* ah crore ₹1,235.27; tichuan, kan budget estimate pumpui kha crore ₹14,412.12 a ni; tun kal lai aia a sanna kha 0.49% vel chauh a ni. Amaherawhchu, nichina kan member

thenkhatten an sawi ang khan, a sum punna hi sang viau lo mahse, a hmannaah tihtak zet, thahnemngai tak leh dik taka kan hmana, a thlenna tur dik taka kan thlen tir chuan, awmze neia hman tham a ni a. Nakumah Pathian khawngaihna a zarah budget session ah te kan awmho leh thei turah ngai ila. Kan budget tuna kan pharh aia tam zawk, supplementary ah pawh lawmawm tak zawka, malsawmna kan dawn avanga supplementary tam tak hmuh belh te hi kan lo beisei zawk a ni.

‘Supplementary’ han tih hian, ruahman thiam lo lutuk kan ni lova. A tha zawnga ngaihtuah chuan, malsawmna tam tak a lo luan luh zawk avanga helaiah hian supplementary pharh ngaia awm a reflect hian kan inlawmpuina turah ka ngai a ni. Chutih ruala ka sawi duh chu, state Own tax revenue ah khan kumina hmuh kan inbeisei hi crore ₹1,312.42 a ni a. Tuna a kal lai ai hian 21.04% in a sang a. Hei hi kan House Leader, kan Finance Minister khan nakinah min hrilhfiah tel ka duh chu, heng property tax te, vehicle tax te hian tuna kan hmanlai aia sang deuh hlek hian min hrutpui an tum nge, he ti tak maia 21% zet maia a han sang hi, ‘chhiah lak belh kan tum deuh hlek em?’ tih kha a ni a. Tin, state own non-tax revenue ah hian kumina kan beisei hi crore ₹1,222.39 a ni a. 25.13% in a dinglai ai hian a sang a ni. Heng hi tui bill te, electric bill te, kan ILP te lottery leh kawng hrang hrang atanga kan hmuh tur hi a ni a.

Pu Speaker, kan House Leader hian min hrilhfiah atana ka duh tel chu - i veilam, ka thutna laia a thut lai khan, kan state sawrkarin lottery kan kalpui kha kalpui chhunzawm a tha an tih chiah lova, ‘Kristian ram tan chuan lottery kalpui fo hi a tha em le’ tih te kha an sawi thin a. Amaherawhchu, kan sum source pawimawh tak a nih thin avangin kan han ti hram hram thin a. ‘Kan sawrkar hian lottery hi engtinngel kalpui zel a tum’ tih pawh kha nakinah min hrilhfiah turin ka beisei bawka a ni.

Hei, Post Devolution Revenue Deficit Grant central sawrkarin min han ruahmansak te a kum tela tlahniam telh telh tur si ah hian ruahmanna tha tak, hemi do letna tur hi an siam ngei pawh ka beisei a ni.

Tin, kan budget speech (para 51) ah khan, sawrkar kumthara Gross Revenue Expenditure tur kha crore ₹11,957.04 a ni a, sawrkar kum kal lai budget estimate BE ah crore ₹11,200.76 a ni a, chumi ai chuan 6.75 in a sang tihna a ni a. He thil hi kan Finance Minister hian sawrkar hnathawk hlawh pung leh thil man pung nasa te nena inmil tawk tura ruahmanna ni awmin a sawi khan ka hria a. Financial Statement (page 11) ah khan, heta tanga stock recoveries paih hnuah khan kan revenue expenditure dik tak tur net amount hi crore ₹11,821.54 ni awm ang khan a lo lang a. Hei hi kum kallai 2023-2024 RE a hriat a nih tawh angin crore ₹12,509.04 a awm niin a hriat theih a. Chuta (ka zawh duh leh ka hriat duh) realistic deuh nia lang chu, kan RE-a a lan danah hian expenditure hi 6.75-a pung tur anga awm kha, crore ₹ 687 hian a tlahniam zawk dawn lo maw, tih ngaihtuahna min neih tir a. Kan budget kha uluk deuha han thlir khan, kan budget kan

han khawr pum dan hi a langa mawi tur, mipui hriattur tlema tih mawi tur hi a awm em le, tih te kha ngaihtuahna min neih tir a.

Tin, ‘*Year of Consolidation*’ kumah kan puang a, hemi substantiate-na tur atan ah langsar tak kan chawilen em em chu - sum puk belh tur hi kum kal ta aiin crore ₹697.69 a tlem tur angin kan han sawi a. Helai hi uluk deuh a ngaihtuah leh en ngai niin ka hria a. Sawrkar kal ta ah khan crore ₹1000 kha *Ways & Means Advance* a puk tur te kha kan han dah a, kuminah hian lakh ₹3 chauh kan han dah a. Nichinah kan member zahawmtak, Hachhek Bialtuin a sawi tak ang khan, AG office lam atanga audit leh thilah hian hun danga tarlang ngei ngei tura min tih, tarlan ngai ta lo deuh a nih tak avang hian, helaiah hian kan dah tlem ta viau nge ni; *Ways & Means advance* hi kan lak fo tho hi a rinawmin ka hria a. A chhan chu, tuna kan transaction kal danah hian share of taxes emaw, central funding dang a ni emaw, keimahni State own revenue te pawh kan duh hun hunah kan hmu ngawt thei si lova. Thla thar tirah hnathawktute hlawh pek ngai te, electric eng kan chhit man central lama han pek ngai te leh thil tam tak han tih dawn hian sum kan duh ang hunah kan hmuh theih loh hian *Ways & Means advance* han lak hi inthlahrunawm lutuk ni chuang si lova in dah tlem lutuk hi, engnge a chhan aw ka ti a. Dah kher ngai lovin, ‘hei hi reflect a ngai tawh chuang lova, kan la dawn tho e’ in tihna nge ni, ka hre lova. Helai hi OMB te nen khan a danglam deuh hlek avangin sawrkar hmasa aia titem viaua in han inhriatna leh in sawi hi, central-ina Financial Rules an han siam tharah danglamna a awm avang a ni em?

Tin, hmannia kan Chief Minister in Lammual-a tawngtai runpui neih tuma, “leiba rulhna tur pawh crore ₹1,000 kan dah lawk tawh” a tih lai bawr te nen khan hei hi a inzawm nge, inzawm lo tih pawh kha, helai system thar awm avang hian sawrkar hi han inchhuang viaua, han uang viaua, “budget tha tak a ni e, a danglam khawp mai a; a hma aiin kan puk tur pawh a tlem khawp mai” han tih phahna tur hi a ni viau em; a taka kan puk leh tho tur sia kha?

A dawt lehah chuan, mi thenkhatte leh kan zingah pawh khan kan sawi uar viau chu, kan leiba tlingkhawm (outstanding liabilities) kha a tlem ber kum tur ang deuh tea han sawi rik deuh te kha a awm a. Mahse, ka sawi duh chu, 2024-2025 a kan leiba tlingkhawm tur crore ₹14,034.7 a ni a. Hei, kumin, kum kal laia kan leiba tlingkhawm aiin crore ₹1,325.5 in a sang zawk dawn a, Mizoram-in leiba kan la ngah ber kum tur he budget ah hian a lo lang zawk niin ka hria.

Chuvangin, hei hi budget tha tak a nih rualin, leiba kan ngah viau tur hi a phenah khan a lang ve tho a nia. Kan hotu hmasa thenkhatte phei kha chuan ‘bat hi a hmanna turin a zir chuan, a pawi viau lo e’, tih te pawhin, a tawngkam ngai ngai kha zawng, sawi lo ila, kan Home Minister kha a nuih a lo za sa em mai; kha kha chu ka sawi chhuak lo mai ang.

**HON. SPEAKER** : Khawngaih, hei dar 4 a lo ri ta a, kan business hour a zo a, discussion hi kan zo law law dawn em ni ang? (*House-in zaw law law rem a ti a*) Anih aw. Chhonzawm rawh le.

**PU LALCHHANDAMA RALTE, OPP. LEADER:** Pu Speaker, ka lawm e. Ka zo tep e.

Kan Chief Minister (kan Finance Minister) in remchanga min han chhan atana ka han sawi duh chu - (Pu Speaker, helama a thut lai tho khan, ka han ti leh ang e; a lunglen thlak ve deuh thin a.) GSDP chungchangah kan inhnial thin a, kan Chief Minister hmasa (Finance Minister ni baw) Pu Zoramthanga nena an debate nasat em em thinna, GSDP kan dah chungchangah ‘lan mawi tum vanga inchhutna hi, chuti khati’ kan ti a, kan chhut dan leh an chhut dan kha a inang lova. Amaherawhchu, budget presentation a tih ni, Ni 27 khan (ka hriatsual loh chuan) kan Chief Minister (kan Finance Minister) hian, “GSDP chhut dan phung mumal deuhin sorkarin a lo nei a; kalphung a lo awm thin a” tih kha a sawiin ka hria a. Hei hi kalphung thar sorkar hian financial year thar lo kal leh turah hian, tuna kan system kal laia chhut zel hi a tha nge; system thar zawk apply tur a ni tho em? A khawi zawk nge tha zawk; a khawi khan nge realistic stress zawk? tiha kha nakinah min chhan theih chuan.

Tin, kan budget kan ruahman te, sorkar tura inbuatsaihnaah an tai rei a, mipuite bulah an sawi tam em em chu, “Thil engkim hi research based in kan bei a, kan zir a, kan ti e,” an ti a. Tuna budget pawh hi research based tela pharh a ni vek em, tuna kan kal dan tur hi? A chhan chu, tun hnaiah hian research based-a kan thil tih nia kan sawi thenkhat hi hun tawite thla hnih chhung lek pawh hian pahnih vel hi chu *failed* a awm a ni. (Nichinah khan, ‘sir leh lam atanga thlir ve kher a ngai’ ka tih kha aw) Research based-a kan han tih thenkhat zingah pawh khan, thlaithar leina tur nichina kan han sawi, kan chhuan em em ‘*hand-holding-ah*’ tih te pawh kha, budget-ah crore 200 zet kan dah te a lawmawm rualin leh research based-in kha kha kan ti tawh a nih pawhin, tuna kan experience tawiteah pawh, kan Governor-in Ninth Legislative Assembly, First Session-a a address (Ni 12.12.24) ah pawh khan, “hmunphiah te, aieng te, sawhthing te hmarcha te lei a nih tur thu leh, chumi leina tur pawisa pawh kan dah tawh a ni; kan lei ngei dawn a ni” a tih khan dawhkan kan beng nasa mai a. Mahse hei, vawiin niah Zoram hmun ngeiah kan mi leh sate an mangang a, kan lei hleithei ta si loa hi, research lo tih tawh si kha, a fail hian ka hria a.

Tuna ‘*hand-holding policy* ah kan dah’ kan tih pawh hi, ngaih hi a ti tha lo a ni. Pawisa awm tawh tho si, kan han hmang thei lo hi. Tin, chuta Governor Speech-ah tho, hmanna session kan tan tirhah khan, “ka sorkar chu *responsible government* - mawhphur ngam, mawh la ngam kan ni dawn a ni” a ti a. Mahse, min tiphu leh, keima rilrua zawhna lian tak mai min neih tirtu, he sorkar pawh ka thinlunga ka welcome dan tlema min thlak tirtu chu - hmunphiah kan duh a, kan lei thei lo a nih chuan, “hei hi chu, sorkar kan fail;

kan thiamloh a ni” ti ngam rawh u. RR Associates, in thurualpui te in mawhpuh a, ‘kan beisei an lo ang lova’ han tih te. Tin, chu chang a ni lo, “lo kal tur vai thenkhat tute emawin an lo vau a” an ti a; chung te chu Home Minister kha lo hrilh ula, han man tir ta che u; “tutein nge thlai thar lo lei tur lo vau zam ru ni?” te ti ula. Nge, he sorkar hnuaiah hian dan leh thu pek kenkawhna a tha tawh lo em ni?

Chu chu ka han sawi kherna chhan chu, helaiah hian ‘hand-holding’ kan tih te, mipui tana sawrkar belh tlak ni tur chuan, vawiinah hian sorkar thar a lo piang a, kan kut-hnathawktute’n beiseina sang tak nen lo an vat a, huan sawhthing te, aieng te, hmarcha te, hmunphiah te an ti dawn a. Vawiin nia an experience tawiteah hian sorkara an rinna te a tla chhe dawn a; vawiin niah chuan hmunphiah pawhin man a nei ta lo, an khawngaihtlak a ni. Kan House Leader hian nakinah chuan, “Hei hi chu kan fail a ni” te pawh rawn ti ngam la ka du khawp mai, Mizoram mipuite hnena thu chahah. (**Hon. Speaker:** *Business Hours* a pel tawh a; i zo thei dawn tawh em?) A zo dawn tawh e, Pu Speaker. Minute 20 hian zawh ka lo tum deuh a. Zoram mipuite hnenah, helaiah hi chuan, “E, lo kal rawh u, sorkar kan inbuatsaih e; lei kan tum tak tak e” tia kan mipuite thlamuan an ngai a ni lawm ni?

Thil tam tak, (tun hunah pawh hian) hmunphiah chingtute hi han tihsak hram ila chuan; pawisa kha kan dah tho bawh a, kan thingtlang kut-hnathawktu harsa mekte tahna mittui hru hulin; *price support* pawh hi a tam tham lo a nih pawhin, ‘sorkar kan nia lawm maw le, pek dan a awm lawm ni’ kan ti a ni.

Sawi tur tam tak ka neih rualin, heti chin hi vawiin niah kan sawi ni se la. Pu Speaker, kan House Leader (Finance Minister) in a vawikhatna atana budget a rawn pharh, hriatthiam nuam tak mai leh thlir nuam tak, (nichina kan ngaihtlak tawh ang khan) thil tha tam tak pawh a inbilh a, kan member te tan leh ram pum tan pawha chenpakawm tak tak tam tak a awm a.

Chutih rual chuan, lawmthu sawi kha chu member dangte’n an tih tawh avangin, ‘helai hi a famkim lo deuh lo maw; helai hi han sawifiah deuh teh se, kan mipuite thlaphanga awm mek te hi rawn thlamuan teh se’ kan tih te kha, kan House Leader hian a windup hunah a theih hram chuan han react tel thei se langin. Keini pawhin budget tha tak, awmze nei, mipuite hnen thleng phak a nih theihna turin kan theihna chin chinah, he sorkar budget hi mipui hnena a thlen theihna tur a tan te, au a ngaih pawha aupui tur te, a theih hun apiangah tanpui tur pawhin kan inhuam a ni. Ka lawm e.

**HON. SPEAKER** : A lawmawm e. Member 28-in kan sawi a, participation a tha khawp mai. Aw le, kan member zahawm tak tak ten “*The Annual Budget for the year 2024-2025*” chu kan sawiho zo ta a. Tunah chuan kan Chief Minister zahawm tak (Finance Minister ni bawh) wind-up turin ilo sawm ang u.



**PU LALDUHOMA, HON. CHIEF MINISTER:** Pu Speaker, ka lawm e. A hmasa berin thupha chawi ngai ka nei a.

Budget document hi a thahnem tham a, figure hliir mai a ni deuh bawk si a. Budget Session-ah hian tihsual, chulmam ngai hi ‘a awm lo thei lo’ tih tluk deuhthaw a ni a. Tun tumah pawh hian chu chu kan nei a.

Kum 2024-2025 document pakhat - *Explanatory Memorandum on the Budget 24-25*, Budget Summary page 6-ah khan figure update laia tihsual palh a lo awm a. ‘Repayment of Loans, Public Debt’ tih zawna figure lo lang ₹42,722.21 lakh tia lo lang kha, ₹49,083 lakh tih tur a ni a. Capital Outlay hnuai a State zawna figure lo lang ₹1,70,054.53 lakh tia lo lang kha, ₹17,305.43 lakh tih tur a ni. Tichuan, Capital Outlay total ₹1,95,375.12 a lo ni ang a. Total chu ₹2,45,508.12 lakh tih tur a ni. Hetianga figure tihsual awm hi hun chep tak kara figure tihdanglam thenkhat lo update hmaih vanga awm a ni a, pawikan ti hle a ni.

Tin, Annexure II, page 14-ah figure update hmaih palh a lo awm bawk a, computer-a siksawina lamah line pakhat lo lang lo palh a lo awm a, chumi line-a figure chu a total ah lak tel a lo ni lova. Hengte avang hian Annexure II a Capital Disbursement Gross chu ₹2,45,508.12 lakh turah ₹47,132.21 lakh angin a lo lan phah ta a ni. Hei hian Annexure II Grand Total pawh nghawng telin, Grand Total Revenue & Capital Gross pawh ₹1,41,212.13 lakh turah ₹1,24,196.22 lakh angin a lo lang a, a pawikan ti hle a ni. He ti hi ni mahse, Capital Disbursement khaikhawmna - Annexure V, page 21erawh a dik taka update a lo nih tho avangin, page 21 figure hi pawm tur a ni. Page 6 leh 14 te kha correct ngai chu a ni e. Kha kha hriatthiamna ka rawn dil a.

Pu Speaker, kan Memberte’n thahnemngai takin an sawi hlawm a; a ngaihthlak a nuam a, lawmthu pawh ka rawn sawi hmasa duh a. Member hrang hrangten an point out kha react vek sen a ni lo ang a, a bik deuha han react awm mahse, a vai huapa rawn tuam ka han tum ang a.

A hmasa berah chuan, he kan Legislative Assembly ah hian Women tan recess room a awm loh thu leh bathroom hranpa a awm loh thu khan beng a verh khawp mai a. A chhan chu, hmeichhia MLA te kan lo neih loh thin deuh avangin kan lo ngaihthah deuh pawh niin a lang a. Tunah chuan pathum lai mai kan han nei ta a. Recess Room hranpa a awm thei lo a nih pawhin, bathroom hrang hi chu a rang lama ngaihtuah a tha hlein ka hria a. Hei hi chu kan Budget Committee leh House Committee lam mawhphurhna turah te ngai ila. Pu Speaker, an rawn bawhzui chak theih chuan a lawmawm khawp ang.

Tin, kan sawi tam deuh mai pakhat chu, *hand-holding* chungchang a ni a. ‘Engnge a hming in vuah dawn’ an ti a, ‘*Hand-holding Policy*’ - Bana-kaih Policy hi hming dang vuah kan phal lova, hei hi a hming dik tak a ni. Mahni kea kal thei lote, mahni kea ding

thei lote an banah kaiin kan kalpui dawn a ni. Kal tha duh lo erawh chu kan kai lui bik lovang. Kaiha kal duh, min zui duhte erawh chu kan kai dawn a ni. Chuvang chuan, he ‘Hand Holding Policy’ hi Mizoram-ah a awm vawikhatna a ni a. ‘A tlem e’ kan ti a, a kumkhatna atan chuan a tawk thei tura ngaih a ni a. A chhan chu, sem a ni ve dawn lova. Chhungkaw tin sem emaw, kan party chin zawng sem emaw ang chia va thlar ve tur chi kha a ni lova. Beneficiary uluk takin line-department ten an thlang ang a; a kum khatnaah pheii chuan tam tak kan thlang lovang. Mi hlawhtling ngei tur, entawntlak, an hnathawhte pawh video-a tarlan ngam, inelna thianghlim kan mipuite’n an neihna tura kan hmahruaitu tur; chutiang mite chauh han thlan hmasak phawt kan tum a ni.

Tin, Central Scheme awmsa chi hrang hrang hemi nena kalkawp tur, convergence-a kalpui theih tur a awm a, kan State sum hi helaiah hian chu ti teh vaka hman kan tum lova, Central Scheme thui tak kan ngenchhan mai dawn a ni. Tin, kan rama Bank hrang hrangte nen pawh kan inhmaw tawh a; Mizoram pawn lama an hotute pawh an lo kal a. “Keini chuan Loan latu tur reng reng hi kan duhsak zawng kan Party worker te kan rawn thlang ve dawn lova, tunhma chuan party-worker te an thlang thin a ni mai thei e; loan an la a, rulh pawh an tum lo, hman pawh an tum lo, an mimal pawisa emaw an ti nghal ngawt mai a. Chuvang chuan, repayment pawh a chhia a, tichuan, Bank leh Sorkar ah inrinlohna lian tak pawh a lo awm tawh a ni tih kan hria a. Tun atang hian inring tawnin hna i thawk ang u. Keini chuan a hlawhtling thei ngei tur chauh kan rawn thlang dawn a, kan thlang mai a ni dawn lova, kan enzui dawn a ni; kan supervise dawn a ni. Chutiang chuan theihtawp kan chhuahho dawn a nia” kan ti a, anni pawh an lawm khawp mai a.

Tin, kan Entrepreneurs ho pawh kuminah rih hi chuan chu ti lutuka sum mamawh tamna tur project an la siam hman kan ring lova. An lo siam hmana, a tul ta a nih chuan, RE ah kan dah belh mai ang a, a lawmawm lam turah kan ngai ang a.

Tin, Industrialization hi kan tan ve dawn ta a. Industry ah Zero State tih kan la ni a. He ti reng hi chu a dik lo va. Kan ramah Pathianin thil hlu tam tak a dah a, kan process ve thei a ni. Chuvang chuan, chutianga kan chet theihna tur chuan Investment Policy te kan han duang thar a, tunah chuan kan nei ve tawh a. A vawikhatna a ni a, kan hun tawn a zirin siamthat a la ngai zel ang. Foreign atanga invest duh te, India rama Company lian tak tak invest duh te pawh kan tualchhunga kan nau te bakah kan hmu teuh tawh bawk.

Sawmna kan hmu a, a-eng a-mah la hre ve lo leh industry lama sawi tur nei lo ber te kha Chief Guest-ah te min sawm awl lo mai a, an in hawng em em mai a, kan vanneihna niin kan hria a. Chung lo dawnsawmna tur atan chuan investment policy kan neih vat a ngaih avangin, hmanhmawh takin kan han buatsaih a. Kan Investment Policy-ah hian Mizoram pawn atanga investment rawn ti duhtute reng reng hi kan ram chhunga Pathian-in raw material min pek sa behechhana ti duh kan thlang phawt dawn a. A dawt lehah chuan, kan thalaite, tualchhung mite hmalakna dip dal lo tur kan thlang leh dawn

a. Keimahni sorkar atanga kan project-te pawh a recurring nature awm lo chi deuh, *Entirnan*: field pakhatu phul lem kan han phah rik ngawt pawh hi a maintain hi kan zo miah lo a ni; chutianga a maintain-na State-in a tih leh hleihtheih loh, tawl leh mai mai tur siam teuh kha kan hlau a; tangkai ngei tur, revenue pawh thawk chhuak thei ngei tur ang kha a theih chen chenah ni hram hram sela kan duh a ni.

Chutiang tur chuan State SIT-te pawh buatsaih mek a ni a, a la function lo deuh a. Heta tang hian kan rama project zawng zawng hirawn monitor a ni dawn a; dashboard a awm ang a, Chief Minister office-ah kan thlunzawm dawn a ni. Chief Minister Office atanga kan ram project hrang hrang monitor theih turin delhi lama PMO office an tih ang deuh khuan kan hmang dawn a. A function tak tak hunah chuan a tangkai hle dawn a ni. Buatsaih mekin a awm a, thil thar kan neih tur a ni a, a lawmawm hle a ni.

Hmunphiah chungchang kan sawi hnem khawp mai a, kan sawi fiah tawh a, mahse, kan sawi ngai hlir tho kan la insawi khum tho a. RR Associate-ten lei thei tura an inngaih avangin kan hotute'n inremsiamna an neihpui a, an niho khan an lei thei dawn lo tih kha research wing atanga hriat theih a ni lo a ni; kha kha chu tihngaihna a awm lova, kan vanduai a ni mai a. An lo inlei nawk nawk a, khatiang a ni dawn tih kan hriat loh avangin, sorkar chu ngaihtha takin kan awm lo thei lo. Pawisa chu a awm reng, mahse anmahniin 'kan thei ang' an tih avangin kan pe a, an theih leh tak si loah khan an lo in hralh ta nawk nawk si a. An inhralhna kha chhinchhiah a awm baw si lova, pawisa kha va pe ngawt dawn ni ila, chhinchhiah awm lo tam tak, mi-mala lo kal ral kha a awm tawh a, diklo a awm dawn a, dawt te pawh kan sawi duh ang tih kha a rinawm a. 'A ngaihna a awm tawh lo a nih hi, kumin hi chu' tihah kal phawt sela. 'Finnan kan hmang ang a, inzirnan kan hmang ang a, nakumah mumal takin area-wise in kan ti dawn nia' tih kha kan tum dan a ni a. Chuvangin, "kan ti ang tia, ti leh si lo" han intih em emna turah kan ngai lo. Keini pawhin hrehawm kan ti a, pawi kan ti a. Thil hi, *tih tum, tih leh theih si loh* hi a awm ve a. Independent te pawh kan sual a, kan sual lo ve leh mai a; traffic jam awm lohna khawpui te pawh kan sawi a, a ni chuang lem lova; kum thuma intodelh te pawh. Khalam pang kha chu sawi tam lo ila kan zavaia tan hian a that zawk ka ring deuh a.

Transformer chungchangah, 'electric lamah pawisa dah a tlem' kan ti a, transformer leina tur kha crore 20 bawr vel dah niin ka hria a. Kan transformer-te hi a hlui-chhia vek an ni a. Sawi hrehawm tak chu - a thar anga lo lei thinte pawh kha, a hlui a lo ni thin a ni awm e; chu pawh chu middle-man kal tlangin to taka lei a lo ni thin a, tunah hi chuan pawisa tlem zawkin transformer tam zawk kan lei thei tawh dawn a ni. Eirukna a awm loh hi chuan, sorkar pawisa hian a daih zai dawn riau mai, Pu Speaker. Chuvang chuan, solar te, hydel te, rooftop te nakinah demand lamah chiangkungin kan Minister-ten an larawn sawi chho ang a.

‘Roads and bridges-ah hian dah a tlem’ tih kha kan sawi nual a, dah tam thei pawh kan ni lova. NHIDCL an awm a, BRO an awm bawk a, thuang hnih- thuang thumin kan ram kawng kan lai a, keimahni budget atanga kan laih theih hi chu englai mahin a tam ngai lova. India ram road density kan en chuan, km 1 bial zela kawng nei chhe ber, a hniam ber pawl kan la ni reng a, kan inngahna chu Central lam atanga sum lo kal kha a ni lo thei lova. Chungah chuan kan contractor-te hi (ka sawi lo thei lo,) an hna a chhe em a ni; tihngaihna a awm lo. Tunah pawh hian kawng laih leh lei dawh ah te pawisa la tawh si, sorkar hmasa hnuai contract an lo pek, zawh mumal si loh, hna chhe si, chung kan chhawm chuan kan lu hi a ti hai lutuk a ni.

Hmanni Delhi-a ka kal khan Petroleum Ministry-ah an mi pawimawhte nen kan inhmua, “kan ramah petrol leh gas zawn chhuahna kawnga hna a chawl thup hi kan ui a, rawn thar thawh leh rawh u” kan ti a, chumi ngai pawimawh chuan hmanni khan an hotute an rawn tir chho a, airport-ah an tum a. Kan in an rawn pan vang vang a, kan inkawm zawhah a ni la lain an thlawk haw leh nghal a. Anni chuan, “Tuna Meidum-a kan gas hmuhchhuah khu, khu aia tam khu a piah lawk hmun 2-3 ah verh lehna tur kan identify vek tawh a; mahse, Chhimluang lei in dawh zo har lutuk a, tihngaihna kan hre lo a ni. Tun thal chhunga verh hman hi kan duh” an rawn ti a, an rawn bawhzui vat mai a ni. Tihngaihna kan hre lova, tun chawlhniah khan (chawlhni pawh pawisa thei lovin) PWD hotute nen kan residence-ah meeting kan nei a, ‘engtinge khu lei khu kan dawh vat vat theih ang’ kan ti a. A contractor Kamrula hi a khawngaihthlak lutuk, ‘pawisa a nei miah lo’ an ti a ni. “Contract a ngah tehreng nen, a bill a tang ve ngai bawk si lova, nikhatah te a lehlan zel si a, engatinge pawisa a neih loh” ka ti a, “a chang tlem a ni ang” an ti deuhin ka hria. Kan Minister Pu Vanlalhlana a zuk kal a, khawngaih a lo dil a. A niin ‘ni 10 chhung kan enchhin ang che’ a ti a, mi cement bag te a puk a, a pe thei tawh lova; Airport-ah pawh a thawk a, hlawhfa pawh a hmu zo tawh lova, a ba zel si a; pek tur a nei bawk si lova. Kha kha a nih avangin, ‘tihngaihna a awm lo e, a tan pawh a fihlim thlak zawk ang e’ tiin i terminate mai ang kan ti a ni. ‘Terminate mai ila, midang ti thei zawk i pe tawp mai ang’ kan ti a. Fur tui len hmain tih a ngai si a, hei hi; ‘restricted tender pawhin, dan ang thlapin tih ngam a ni e’ kan ti a, chutiang chuan tih kan tum mek a ni.

Chu chu kan tih vat chuan oil pawh hi kan lai chhuak leh thei dawn niin kan hria a, a pipeline a rawn kal chho tawh a, helaiah. Cylinder put luk luk hi tih reha, tui kan herh haw ang a mahni inchhungah gas herh haw ve thuai thuai kan nghakhlel a ni. Chutah te chuan kan ram gas ngei te a lo tel ve theih chuan revenue kan earn ve thei dawn a.

Tin, kan ramah hian hmun sarh - hmun riat laiah seepage a awm a, kan sih ah te tui al a awm a, hmanni lawkah pawh Rabung tui al, sa leh sava ten an tlan luai luai kha lighter-in an hal a, a alh pawp pawp mai anih kha; khangte kha kan lo hrilh a. Hrilh hriat an lo ni ngai reng reng lova, an vawikhat hriatna a ni a, an beng a verh em em a, “a hmunah kan tlawh ang; a list lo siam ula” an ti a. Tunah hian kan khawn mek a, a video te nen,

chu chu an rawn tlawh ang a. Chutiang chuan kan gas leh kan petrol te hian ‘heta hi ka awm, min rawn zawng hmu har ve’ min ti ni awm takin min ko ni te hian kan hria a ni. Chuvangin, khang te kha kan han ngaihsak vat vat dawnin ka hria a.

Tin, Healthcare chungchanga Thorang Bialtu, member zahawm tak Pu R. Rohmingliana khan ‘golden-card an hmang hleitheh lo’ a ti a, kan ngai pawimawh khawp mai a. Kan han bih chian, chuan central lamin a kalphung an rawn ti danglam a, chumi insiamrem leh chhung hman theih loh hun reilo te a lo awm a ni; chuti tih loh chu a golden card hrim hrim hman theih loh kha a lo awm lem lova.

Tin, ‘damdawi lei tur awm lo’ tih kha a lo dik a, tun hmain canteen atangin damdawi man tlawm an zuar thin a, a hlawk lem lova. Tichuan, mipui tana tangkai em em thin si kha sorkar hmasa khan a lo tih tawp sak a lo ni a, a pawikan ti khawp mai. Kan Minister tharin rang takin a tlawm chi kha a zawrh tir leh tawh a, tunah chuan. Mipuiin, ‘damdawi tlawm a awm tawh lo’ an tih kha, a awm leh tawh turah kan han ngai a ni. Tin, golden card neilote pawh an siam chawp chuan kan pawm sak zar zar; tiang kha kan phalsak zar zar a ni.

Tin, kan healthcare system hman lai hi keini chuan kan ti tawp dawn a, a aia tha zawkin kan thlak dawn a, tunah hian buatsaih mek a ni a. A vaiin kan healthcare system hnuaiiah chuan *cashless* vekin kan ti dawn a ni; pawisa ken a ngai lo; pawisa pek a ngai tawh dawn lo; *cashless* vekin kan ti dawn a. Tichuan, hemi atana ADB Loan sorkar hmasa-ina hma a lo lakna te kha a tha kan ti a, amaherawhchu, July thla velah kan intifel thei chauh ang an ti a, kan nghah rih a ngai a. A thar kan hman hma hi chuan, tuna a hlui ang hian eng emaw chen kan kal a ngai ang.

Tin, healthcare bill atan hian sorkar hmasain tun financial year ral mekah hian crore 60 a lo dah a, chuta tang chuan crore 35 an lo pechhuak hman a. Keini kan sorkar ve leh reilote chhungah crore 15 kan sem chhuah tir leh a, tunah hian crore 10 a la bang a ni. Chu crore 10 leh crore 40 kan pek belh, a belkhawm crore 50 chu vawinahn khan kan release vek a ni. Kar leh lamah chuan damlote ipite a thlen theih tawh kan ring a. ‘Hei hi in va release har leh ang reng si ve; in sawina kha a rei tawh si a’ kan ti maithei a. Ni e, Pu Speaker, reprovizion ngai a ni a, a tira a hmanna tur kha thildang daih a ni a; keiniin, ‘damlo bill hi ngai pawimawh zawk ang, hemi atan hian i hmang zawk ang’ kan han ti ve leh ta si a. A reprovizion chhung khan hun te a duh rei a, a neka-nawk a tam ve a. Chuvang chuan, kan inpeih har deuh hlek a, kan damlote pawhin min lo hrethiam sela. Tunah erawh chuan ‘crore 50 kan release’ tih kha lo hria se, lo ngaihven selangin a tha ang e.

Tin, ‘SASCI sum hman bang engtinngin in tih’ tih vel kha, member te khan in zawt nual a. SASCI sum hi pakhatmah hman bang awm lova; hman ral kan duh ngawih ngawih a. Amaherawhchu, tuna contractor ho hi sorkar hmasa hun a mi vek an ni a, a thawk tak

taktu chu party worker deuh vek an ni a, hna an thawk lo em a ni; hna an thawh loh chuan bill a lak theih loh; chu chu a ni mai, tihngaihna a awm lo. *Entirnan*: contractor hmingin crore 20 lo pe ta sela, a hnuaiyah party-worker an intlar thla a, nuai 5 te, nuai 10 tein, khang intlar thla zinga mi a tu emaw ber pawhin cheh khat lek pawh a lo cheh hman chuan, kha contractor khan hna a thawk tawhah kan pawm sak hram hram a ni. Chuti chuang pawh chuan 53% bak hi an khawih thei dawn lo niin kan hria a. Hei tal hi chu zo sela, hemi daih tur tawh pawisa hi chu pek kim ni sela, pek hmaih palh hi awm lo selangin kan duh a. Amaherawchu, financial year a tawp dawn tawh a, an ti hman dawn lo tih a chiang a, chutah chuan keini sorkar lam mawhphurhna engmah a awm lo e. A thawktute'n an thawk muang a, UC te a lut chak lova, khatiang anih na na na kha chuan a lapse lovang tih kha a sawi theih loh a ni. Chu chu tuna kan dinhmun a ni a.

Sorkar hmasaa crore 463 rawn sanction-ah khan crore 200 chiah pek chhuah hman a ni. Chu pawh chu hna an la thawh tam loh avangin pek vek theih pawh an la ni chuang lo. Keimahni lam zel hi kan muang a, kha kha a buaithlakna a ni. Tunah hianin crore 500 min rawn pe leh tawh a. .... (*interruption*)

**PU LALCHHANDAMA RALTE, OPP. LEADER:** Sorkarna inthlak hlimah khan sorkar hmasa hnuaiyah SASCII contractor te'n hnathawh an tum reng reng khan hnathawh phal loh vek a ni a, verbal-in thlahnih chuang hna thawk duhte pawhin an thawk thei lo a ni. House-ah hian 'hnathawh kan phal' in ti a, kan officers hote hian, 'verbal instruction kan dawn danin' an ti vek bawh si a. Chuvang chuan, mawhphurhna kha tun boruakah hian, thawk tura kan tihte kha kan puh leh lawi si a, helai hi chu sawi chian hi a va tha em!

**PU LALDUHOMA, CHIEF MINISTER:** Ni e, kan sorkar hlim khan, "hna la tan lo ho kha chuan lo la tan suh u. Tin, work order la lachhuak lo ho kha chuan lakchhuah loh ni se, chu chu a report kan lakhawm phawt ang" kan ti a ni. Kan han lakhawm a, work order lo dawng tawh security te pawh deposit ngai ngai lo pe tawh, hna pawh a hmingin mi 20 in lo thawk ta ni se, mi 19 in la tan lo se, mi pakhatin, a tan chuan hna tanah kan pawm sak ang. Khang zawng zawng kha 'go ahead' kan ti ta ni. Hna pakhatmah cancel kan nei lo; pakhatmah *bill of quantity* sign luh tir pawh kan nei lo; tunah hian an thawk vek a ni. Chu chu thil awm dan a ni a, hmannah pawh House-ah pawh ka sawi tawh a. (*interruption*)

**PU LALRINSANGA RALTE:** Pu Speaker, *Point of clarification* - Kan House Leader-in khawngaihni min hrethiam se. Hmun thenkhatah, bial thenkhatah, kan bialah pawh a ni a, hna eng emaw zat, hna awm zawng 60% te, 70% te khawih a ni a, la khawih loh ho pawh hi EE leh SDO te hian 'verbal instruction chunglam atanga kan dawn angin, khawih zui phal a ni lo' an ti a. Vawiinni thlengin bial thenkhatah pawh an la dang vek a ni. Chutianga hna lo tan tawh work order pangai tak *Letter of acceptance* te, agreement te, deposit *performance security* engkim clear vek tawhte pawh dan an nei ta a ni. Chu

chu, a nih leh vawiinniah hian kan House Leader hian khawngaihtakin clear cut deuhin min sawi sak la; khang ang kha, tun thla chhunga an la thawh zawh hman tur tam tak a awm a ni. Chu chu an thawk thei ang em?

**PU LALDUHOMA, HON. CHIEF MINISTER:** A vawihnihna atan ka han sawinawn leh ang a; he House ngeiah pawh ka sawi tawh a - Problem a awm lo; thawk se kan duh a, thawk chak se kan duh; engmah khapna kan nei lo. Amaherawhchu, a contractor khan a hnuaiia thawk turte chu a duhsak zawng a dah a thiang a, kha chu kan thu a ni lo; ama mimal thuneihna a ni. A buaithlakna chu, sub-contract a awm hian bill reng reng contractor account-ah a lut vek si a, a contractor tak tak khan a thawk mang si lova, a thawk tak tak tu, a hnuaiia sub-contractor kha pawisa a pek duh loh chuan an buai a ni mai. Chung ang harsatnate pawh chu sub-contract ah hi chuan a awm nuai a, chungte pawh chu awm lo se kan duh khawp mai a. Tha takin thawk sela, thawk tam sela; kan pawisa a ni lova, kan ui tur a awm lova. An thawh tam poh leh pawisa hi release tam ila, hmang hman ila kan duh ngawih ngawih a ni. A vai hian hmang zo vek hman ila kan duh ngawih ngawih.

Chuan, a dang lelah chuan, Lok Ayukta chungchangah zawhna a awm a. Lok Ayukta hi sorkar hmasa khan Chairman tur a lo ruatfel a, amaherawhchu Selection Committee Member zinga a thenin an sign duh lova. Tin, a file ah a minute pawh hmuh tur a awm loh avangin, pawm theih a ni lova, kaltlangpui theih a ni lova. Chuvang chuan, 'Search Committee din that leh a ngai a nih hi' kan ti a. Tichuan, hmannah Selection Committee kan thu a, kan Opposition Leader zahawm tak te nen kan sawi ho a. Tichuan, Search Committee kan din thar a, chu Search Committee chu an ding tawh a, chu chuan an rawn zawng dawn a, an tih zawhah an rawn thehlut ang a, sealed envelop-in an rawn thehlut ang a, chu chu Selection Committee kan thut hma chuan hawn a thiang miah dawn lo a ni. Tunge an rawn rawt tih kha kei pawhin ka hre dawn miah lo. Tichuan, an rawn tih ran chuan, Selection Committee kan thu rang thei ang a, kan Lok Ayukta Chairman tur pawh kan appoint rang thei turah kan ngai a. Mipuiin a an pawmtlan theih, 'a awm khawp mai' an tih ngei hi kan Search Committee hian zawn hmuh an tum a ni. Tute emaw duhsak zawng leh eng emaw a han inpuhmawh theih ang chi, 'ka inhnawkpui' tih ang vel lampang kha, khang kha awm ve tawh lo se kan duh takzet zet a. Corruption tih reh duh sorkar kan ding a, chuta kan kut-ke tur chu an ni; Chief Minister thlenga chhui thei tur an ni. Chuvang chuan, eng emaw tia ngaihbel theih mihring ni lo hram hram se kan duh ngawih ngawih a ni.

Tin, kan Member zahawm tak Siaha bialtu Pu Pawchhua khan, 'Explanatory Memorandum phek 17-a lo lang hi a inmil lo e' kha a ti a. Kha kha Capital Expenditure Under State chauh a ni a, Capital Expenditure CSS phek 19 nena belkhawm chuan phek 21-ah a total a lo lang ta a, chu chu crore ₹2,455.08 a ni. Kha kha a awmzia a ni a.

Tin, a sawi pakhat - election reimbursement, chungchang kha *1601 GIA from Central Government 06 Grants for CSS 101 Central Assistance* hnuaiyah dah a ni thin a. Amaherawhchu, *1601 GIA from Central Government 08 other transfer 113 Special Assistance* hnuaiyah an rawn dah ta a. Chuvang chuan, double entry a awmlohna turin a *Head of Account* kha thlak vanga thil lo awm a ni a. Amount chu Annual Financial Statement phok 5-na ah khan hmuh mai theihin a awm kha.

Tin, Pu Pawchhua bawkin clarify atana a duh kha, Budget Speech, sl. no. 51 a lo lang *Total Revenue Expenditure*-a crore ₹11,957.04 hi, *Gross Revenue Expenditure* a ni a, Annual Financial Statement, page 11-na a lo lang kha *Total Revenue Expenditure* a ni ve thung a. A amount kha crore ₹11821.54 a ni a, kha kha *Net Revenue Expenditure* a ni. Hei hi *Deduct Recoveries* crore ₹135.50 a awm vang a ni a, khami deduct sa kha kan rawn tarlang a ni. Chu chu, *net revenue expenditure*-a kan belh chuan, a *Gross Revenue Expenditure* crore ₹11,957.04 hi a lo chhuak chiah dawn a ni. Kha kha Annual Financial Statement, phok 11 ah hmuh theihin a Chiang zawkin a awm bawk a ni.

Tin, Performance Budget chungchangah, “hei hi engatinge in va ti lo ve; in ti thei ang em?” tih zawhna kha, tunhma thil a ni a. *Performance Budget* hi Planning Board kan neih lai plan leh non-plan expenditure te, receipt te kan neih hran lai thil kha a ni a, tunah chuan tihbo a nih tawh avangin Performance Budget neih hi a rem tawh lo a ni.

Tin, District Council chungchangah khan, “*Object Head* ah khan salary leh non-salary ti hrang tawh lovin min rawn pe ringawt mai a, engtin nge kan lo then hran thiam ang?”, tih kha Lawngtlai West Bialtu Pu Nguna rawn zawhna kha a ni a. Tun hma khan *Salary* leh *non-Salary* a hrangin an siam thin a, salary head ami an hman zawh loh khan sorkar-hna laknan te, thildangah te hman an lo ching thin a ni; amah pawh hi a tel ve mai thei a ni. Chuvang chuan, tunah chuan avaiin Central atangin General Head ah kan dawng tawp a, state sorkarin hetia Budget Session a kan thensawm leh ang chiah hian, anni pawh zalenna kan pe ta a ni.

Tichuan *General Head* hnuaiyah tikhan kan va pe tawp a, “hlawh atan heti zat hi i dah ang; hemi atan heti zat hi i dah ang” tih kha an District Council-in tul an tih ang angin; keini aia an dinhmun hrechiang zawktute an nih avangin, ‘an kuta awm a tha ang e’ tiin, khatiang khan then sawmlain dah a ni ta a.

Tin, ADC pathum kan neihte ‘sum dawn dan inkhairual lo’ tihah hian, Sorkar chuan khawih tur kan nei tlem khawp mai. Kan 2<sup>nd</sup> Finance Commission ten ruahmanna an rawn siam ang ang hi a ni mai a. Hei, India ramah chuan 15<sup>th</sup> Finance Commission ruahmanna kan pawm leh mai a; tunah 16<sup>th</sup> Finance Commission-ah kan lut dawn tan a. Mizoramah pawh hian kan State-Finance Commission-in a ruahman dan ang kha Sorkar chuan kan lo kalpui mai a ni.



Tin, consolidated sinking fund kha, ‘a total kha a va sang leh si ve’ tih a ni a; crore ₹374.66 a ni a. A hmaa kha *Sinking fund*-a pawisa lo awm tawh sa zat kha sawilan a ni lova, chumi nen chuan belhkhawmin khati zat kha kan nei tihna a ni. Tin, ‘Quarantee redemption fund-ah belh kha a dik lo’ tih a ni a. Ni e, a lo belh dik khawp mai, member zahawm tak Pu Nguna khan, ₹52.88 kha a dik a. Amaherawhchu, kan department lam hian MUCO Bank rulhsakna tur, kha kha an rilruah a lo awm a, khami kha paihin crore ₹45 chiah kha kan la neih tur a nih avangin, kan pek leh tur ngai zat kha an lo ziaak tawp mai a ni e.

*Guarantee Redemption Fund* hi kan ngah poh leh a tha a, ngah tura ngaih kan ni a. Hemi kan ngah hian kan puk theih chin a sanga, kan bat theih chin te a sang a, a tha viau a ni. Chu chu khawih chet thiango ang tluk deuh thawa ngaih a ni a. Amaherawhchu, Sorkar hmasa khan a lo draw then a, tunah hian kan han dahkhat leh dawn mek chauh a ni. chutiang chu a ni a, dahpun zel kan tum nghe nghe a ni.

Tichuan, kan budget-ah han lut leh ta ila. Hei, kan budget-ah hianin a thalo lam, a lungawithlak loh lam hi a awm a, kan pha hauh lova. ‘*Post Devolution Revenue Deficit Grant*’ kan tih hi crore ₹395 ngawt maiin kan dawng tlem a, nikum lam aiin; a tlemna pawh hi 36.06% a tling hial a. Hei hi chu tlem tial tial tura siam sa a ni a; nakumah a aiin a tlem leh ang a, a tawpah a zuih ral dawn a ni. Chu chu a nih avangin, tumahin tihtheih kan nei lova. Hei hian kan revenue receipt kha chu a pawt hniam kumtin dawn hrim hrim a ni.

Tichuan, ‘*Revenue Expenditure* hi a pung’ tih sawiselna a tam a, kan pha lo a ni. Kan Revenue Expenditure hi tlem sela kan duh ngawih ngawih a, *Capital Expenditure* te hi tam sela kan duh a ni. Amaherawhchu, tunah hianin Revenue Receipt hrim hrim pawh hi nikum aia kan hmuh tam avangin, a receipt a tamna na na chuanin expenditure pawh kha a tam lo thei lova. Chuvang chuan, kan hmuh kha pung chuang si lova hmang tam kan ni lova, kan hmuha pawh a pun ve tho avang khan, kan hman tura pawh hi a inhen tawka khatia tihzel a ngaih avang khan a lo pung ta a ni a.

A punna chhan chu, Sorkar-hnathawk hlawh pung hi a han ni phawt a, kum tin hian increment 3% pek a ngai a. Chuvang chuan, revenue expenditure hi tei tet ngawt theih a ni lova, pun lam a pan zel dawn a ni. Tichuan, MR eng emaw zat hi PE-ah hlan kai anni a, kha khan an hlawh a tisang leh bawk a. Tin, pension an pung chho zel a. *Salary* leh *Pension*-ah ringawt hian kan budget atanga 40% chuang hi a kal ral a ni, Pu Speaker. Thla khat hlawh leh pension kan han pekchhuah hian crore ₹400 chuang a kal nghal tawp mai a ni. Hei, tunah pawh hian thla a thar a, thla thar tirhah holiday-in min han nangching a. Thla thar tirh ve leha hlawh inpek nghal chu holiday te a tlak avangin, a theih lova, amaherawhchu, pek nghal tumin tihian hma kan han la chho a, kan hretlang theuh a.

Tin, tui bill te, power bill te, buhfai man te thlengin a lo to ta zel a. Tunah pawh hian kan buhfai supply tura ruatte hian, ‘a rate ang hian kan supply theilo, “hei aia rate sang lo chuan...”, an rawn ti a; khang kha kan tawh mek a ni a, Administrative Expenditure te a lo sang zel a. Tin, Sorkar kal tain sikul eng emaw zat a lo upgrade bawk a, khang a nih avang khan heng hi a sang lo thei lova. Chuvang chuan, pawng tihnam ringawt theih kha a ni chuang lova; anih ang angin a sang tur ang hi chu kan lan san tir mai a ni.

Tin, kan Opposition Leader khan, ‘lottery te hi...’ a ti a. Ni e, lottery hi ringtu ramah chuan ‘tih loh ni se’ tih te pawh a ni thin a; amaherawhchu, kalpui reng a ni tho a, tunah pawh kalpui mek reng a ni a. Mizoram ah an zuar chuang lova, state dangah an zuar daih tho a. Kan State-ina revenue a lo lakluh vena remchang a ni a. Chuvang chuan, tunah hian Sorkar hmasain a lo tihtir ang khan kan chhonzawm ve zel rih a ni. A agency pawh a ngai kan hmang a. Amaherawhchu, a thlan danah sawisel a awm deuh a. “hei lo zawk hi chu thlang sela pawisa kan hmu hnem zawk ang,” tih te chu a awm.

Tin, kan sawisel leh chu, Capital Expenditure lo tlahniam ta hi a ni a. Hei hi a chhan ber chu - *Year of consolidation* leh *Austerity measures* kan kalpui vang a ni a. Kan ngaihthlak tak ang khan crore ₹686 ngawtin kan capital expenditure hi a tlahniam a, a chhan a awm a ni. A chhanah chuan, kan *opening balance* hi crore ₹-389.89 a ni a. YMA Branch ni ta ila, OB hluite khan cheng khat mah min hnutchhiah lo sela, crore ₹389 ba, in-charge min hlan se, chutiang chu a ni. Chuvang chuan, ‘cheng khat mah min hnutchhiah lo’ tih kha, hnutchhiah lo mai pawh a ni lovin, crore ₹ -389, kha kha kan *opening balance* a ni. Chu chu thudik tak a ni e.

Tin, ‘kan consolidated debt hi a sang lutuk’ tih a ni a, hei hi a dik khawp mai. Nichinah khan kan Opposition Leader khan, “tuna sorkar hi leiba ngah ber sorkar hmasa ber a ni” a rawn ti a, a dik khawp mai. Engvang nge kan tih chuan, crore ₹13,584.80 zet leiba hi kan chhawm tlat avanga sang chu a ni. Tuna kan leiba hi pe vek ta ila, kan budget 97% hi a kal ral dawn a, thla khat chhung sorkar-hnathawk hlawh pek tur pawh kan nei loving; chuti khawp leiba chu kan chhawm a ni, Pu Speaker. Chuvangin, kha kha kan titlem ngawt thei lova. Kumin chhung hian puk ve loh theih loh puk tur sorkar danin a phal sa puk ve tur te kan nei ve bawk si a, a pung lo thei rih lo a ni.

Tin, nichinah khan kan member pakhat khan, eng document emaw kha a rawn khai a; ka document neih ve chu, hei, RBI Statement, Ni 16.1.2023 a mi-ah hian - kum 2021-ah Mizoram leibat chu 56.7% India ramah a sang ber; 2022-ah 55.7 sang leh ber; 2023-ah 53.1% kum thum a zawnin India rama leiba ngah ber kan lo ni tawh a. Chu chu kan Member Pu C. Lalsawivunga hian zawhna a lo zawt a. Hei hi khatih laia kan Finance Minister Pu Zoramthanga chhanna a ni a - “*India ram State Legislative zawng zawngah leiba ngah ber pakhatna kan ni e*” tih a ni a; in duh chuan a copy te pawh kan pe thei ang che u. Chuvang chuan, ‘thil hi kan sawi chuan, a dikin a tluantling tur a ni’ tih hi kan inchah duh a ni.

Tichuan, sorkar hmasa khan crore ₹3,246.71 a puk a, keini chuan kha zat zat kha puk kan tum ve lo a. Kan puk tum hi crore ₹1992.03 a ni a. Nikum lama pawisa an puk ai khan crore ₹1254.68 in keini chuan puk tlem kan tum a ni. A chhan chu kan leibat te kha a rulh dan te kan ngaihtuah a ngai a. Puk belh zela kan kal chuan kan la chhe mai tak tak dawn a. Chuvang chuan, kan tih duh te pawh ti lo ila, “insum teh ang kumin na na na hi chu; mipui pawh in min hrethiam selangin, i inhrek teh ang, financial reform hi a ngai a ni. Reformation kan siam loha, heti zela kan kal chuan kan chhe lutuk dawn” kan ti a.

Tun Financial year a kan sorkar kal tain puk tura a lo ruahman crore ₹1,200 pawh kha an lo puk kim hman lovam anni khan, keinin hei hi a vaia puk kan tum lo. Tun financial year kal laiah pawh hian crore ₹229 hi puk ban kan la tum a ni; lak vek kan tum lo, tun financial year kal mek liam tur ami pawh hi. Tiang chuan kan insum a. A chhan chu, CSS te, Externally Aided Project te, loan han tih ang reng reng kha a pung tlem chi, tha si, revenue siam thei tur si ang chi i ngaihtuah teh ang u. ‘Helaiah hian pawisa a awm a lawm’ tih avanga lak pawp pawp ringawt hi a dik lo e’ tiin fimkhur takin kan kal a. Tiang khan pawisa pawh puk tlem kan tum a. Khami anih na na na kha chuan, kan development work pawh kan sawi lawk mawlh mawlh a, ‘kum khat chhung chu project liante kalpui vak vak thei kan ni lo’ kan ti kha a ni a.

Tin, *Ways & Means* chungchang hi thil holam te ang khan kan han ngaithla a, nichinah khan kan senior member te atangin. *Ways & Means* hi thil serious tak a ni. Kan State ina sum kan neih zawng zawng hman zawh vek tawh hnu ah, puk tur zawng zawng kan puk zawh vek hnuah va puk lehna kha *Ways & Means advance* chu a ni ta a ni. Chuvang chuan, thu tawp a ni a, mangan tawp thil a hman tur a ni a. Chumi atan chuan kan sorkar hmasa khan crore 1,000 an lo dah a ni. Mahni budget awmsa pawh hman zawh vek hnuah crore 1,000 puk tum sa khan bul min tan sak a; a hrisel lo a ni khang kha chu.

Chuvang chuan, keini chuan e, “Ni lo e, ways & means advance-ah hian a lo tul ve tak hlauh in tlem te chu i han dah ve ang hmiang” tiin nuai 3 em ni kan dah ve kha, chu te chu kan dah a, tih ve ngai lo tura kal hram hram kan tum a. Chu *Ways & Means* a kan lo kal rei tawh avanga vawiina kan la rulh char char hi a awm a, kan la rul char char a ni tunah hian. Kan sorkar tirh khan ni 9 overdraft in kan awm a, kan chhuak lo ang tih hi kan hlau em em a ni. Tunah hian WMA sorkar hmasa atanga an lo lak tawh rul hian nitin hian hun hi kan la hmang a, nitin hian report tlaiah kan dawng a; engzat nge rulh bang kan la neih tih hi kan en ziah a ni. Chu chu kan dinhmun a ni a.

Chuvang chuan, kha crore 1,000 lo dah pawh kha budget a tih ngai a ni lova, thil kalphung pawh a ni ngai lova, miin an ti ngai bawk lo a ni. Amaherawhchu, kan Finance Minister hmasa khan ti tur in a lo hrilh a, “A, hetia tih hi a tha ang” a ti a, pawisa a puk tam theih phah tlat a, leiba a lan tlem phah tlat a. Hetiang lan mawi tumna powder hi keini chuan kan inhnawih duh ve lova, kan paih a ni. A nih ang anga lan kan duh a ni.

Tichuan, *Ways & Means* advance hi kan lo lak chuan thla thum kan lak chuan reappropriate in interest kan chawi a. thla thum chhunga kan rulh theih loh chuan reappropriate rate plus 1% a ni a. Tichuan, ni 100 a tlin chuan reappropriate plus 2% a ni a, ni 100 chhung pawh a kan la rulh hman loh chuan reappropriate rate plus 5% a ni. Ni khata a interest ringawt pawh a turu lutuk. Kha pawh kha kan rulh leh theih loh chuan overdraft-ah kan lut ta a ni. Overdraft a nih chuan kan Treasury an khar ang a, pawisa kan la chhuak thei lovang.

Chutiang dinhmunah te chuan ding thei thuak thuak khan kan awm a. Amaherawhchu, ding lovin he lamah bill te kan inhrek a, tikhan hlawh te kan inpe lova, tun hi kan lo thleng a. Khatiang kha a nih avangin, *Ways & Means* hi innghah nan hman loh tumin theihtawp kan han chhuah a, tilo theilo dinhmunah te pawh kan ding miah lovang tih chu ka sawi thei lo; kan lo ding palh anih pawhin, tam kan hman ve chu kan ring lo a ni.

Pu Speaker, kan dinhmun khatiang a ni chung khan hei tunah hian Prime Minister-in a rawn hawn tur project eng emaw zat kan chhawp ve a. Helaiyah hian khum 50 awmna tur Hnathial hospital te, Khawzawl hospital khum 50 awmna tur te, Saitual hospital khum 50 awmna tur te, Mamit Water Supply Scheme part-II atan te, Aizawl by pass (western-side) atan te leh 132 kV line (Bairabi-West Phaileng) tih te, hengah hian crore tam fe ai tunah hian hawn theihin a awm a, hei hi kan Prime Minister-in min rawn hawn sak rawh kan ti a. Hemi pah hian Mualkhang Gas Bottling Plant pawh kan peih ta a. An lo kal vat vat a, a changtu Minister Pu B. Lalchhanzova hian a um chak khawp mai a; 'Prime Minister hnenah DO min ziah sak rawh' an ti a, nizan hmasa khan ka ziah sak a. 'Hei hi i rawn ti tel thei dawn em; engtikah nge i rawn tih theih ang; i rawn kal thei lo a nih chuan virtual-in rawn hawng mai la,' kan inti a. Prime Minister 'zanin lamah te hi chuan chuan ka rawn hrilh Chiang thei tawh ang che,' min ti a, kan la nghak mek a.

Tin, khami bakah khan Delhi ah kan zuk kal a, kan zuk sawi ve a, kan thiam ang angin. Aizawl by-pass Eastern-side tur Pu Nitin Gadkaria'n kan inhmuh tukah crore 1,313.28 min release sak nghal a. Hei hi sorkar hmasa hmalakna kha a ni a, chu chu anni pawh lawmthu ka han hrilh duh a. Amaherawhchu, a pawisa lam kha a awm lo thung a, pawisa kha a awm tlat loh chuan, thawh ngaihna kha a awm lova, chu chu pawisa lamah khan kan hun a thleng ve a, kan nang ve ta a ni e.

Tin, NHIDCL kawngpui Kawnpui - Sairang laihna tur hi kan zuk kal tum khan crore 1,742.11 min pe bawk a. Tichuan, Aizawl PM-DeEVINE ami tur kha sorkar hmasa hmalakna bawk kha crore 500 la sanction loh khan a awm reng a. Chu chu 'mi pechhuak thei tawh lawm ni' kan zuk ti a, min lo pe chhuak a.

Tin, ZMC hi min endik hun tur kan hre lova, kan tling lo palh ang tih kan hlau khawp a. Kan Health Minister Pi Rinpui'n theih tawpin Delhi ah hma a zuk la a, tichuan Union

Health Minister te pawh ka zuk kawm zui ve a. Tah chuan kan Medical College tihchangtlunna tur hian ‘crore 300 chuang rawn siam rawh u,’ a ti a. Tunah hian a first instalment tur crore 119 vel hi kan peih ti tih tawh a.

Tin, House-ah hian ka’n sawi duh chu - OSD - Officer on Special Duty chengkhat hlawh, Pu Jonathana kan nei a, a tangkai khawp mai a. Ani hian engmah min tih hekna a nei lova, chengkhat hlawh kha a ni mai a. DM&R Minister hnenah te kan kal ho a. Tichuan hman zan khan min rawn phone a, “hei, crore 40 vel han pek mai tur che u kan nei a, Director rawn tir thla rawh’ min rawn ti a. ‘Engmah kan buatsaih hman hlei nem; concept paper tak ngial pawh kan nei si lova,” ka ti a. Director chuan, ‘a seal rawn keng thla tawp sela, rawn tir thla rawh; naktukah kan lo tih sak vek ang’ an ti a; a tukah kan intir thla ta a. Tichuan tunah hian crore 40 hi Disaster Management lamah hian min pe thei dawn bawh a; hei hi Fire Deptt. lama kal tur a ni.

Tin, kan Minister District Council & Minority Affairs Deptt. changtu te hi ‘kan lo bawksik ang che u’, an rawn tih leh thut avang khan, PMJVK hnuaiah hmanhmawh takin concept paper te an han siam a, hmanhmawh em emin. Tih ngaihna vak kan hre si lova, a hmanhmawhthlak tawh si a; ‘Vanapa Hall hi sa tha mai ang’ te kan ti a. Vanapa Hall sak thatna tur khan ‘crore 50 in rawn siam teh u,’ ka ti a, crore 37 in an rawn siam a. ‘A hmun hmain crore 50 chu a zo ngang lo a ni’ an ti a; chu leh a dangte tunah hian hmuh tur kan nei bawh a.

Tin, Finance Minister, Minister of State leh Union Minister te nen kan zuk inkawm a, kan OSD ten an bawhzui a. Tunah hian Chief Minister office atanga tih turin hei hi chu induhsakna liau liau a ni a. Crore 55, library khaw 300 vela dinna tur leh computer a thlawna sem tur min rawn pe dawn a. Chu chu tunah hian a first instalment an rawn thawn thleng der tawh a, crore 27 leh tlem chu kan account ah a lut tawh a ni. Chu chu DC te kaltlangin kan ti ang a; an bial chhunga khua te an thlang ang a, sikul te kan thlan tir ang a. Ti hman dawn ila chuan, ‘ni 31 hma hian 2<sup>nd</sup> installment kan rawn pe leh thei che u,’ an ti a, mahse kan tih hman hmel loh viau a ni.

Tin, Development Bank kan sawi ri a. A bul tan nan Development Bank hi kan hmanhmawh hrih lova. Amaherawhchu, a bul tan nan tiin Finance Minsiter-in, ‘CMO Chief Minister office atanga operate turin interest awm lo loan ka rawn pe ang che ang a, tichuan state bank ah kan rawn deposit ang a, Chief Minister office atangin kha loan hmanga mi hlawhtling thei tura in ngaihte in lo sem dawn nia’ min rawn ti bawh a. Chu chu tunah hian a zat chu kan la hre hrih lo a ni.

Tin, mizo contractor leh supplier-te, a tupawhin thil kan han tih reng renga income tax return document min demand ziah hi, ‘keini income tax min awl si a, min tibuai lutuk, hei hi tireh kan duh e’ tiin Finance Minister hnenah kan thlen a. Chu chu ti tawh lo turin tunah hian bank zawng zawngin instruction an rawn pe mek a, a copy pawh min rawn

pe dawn a ni. Tin, kan MRB-a thawk ho khian state bank-a hnathawkte ang tlukin allowance an hmu ve lova. Thawhna inang si State Bank a mite hian an la tam bik a, chu pawh chu, ‘allowance inangin min siam sak rawh u’ kan ti a, chu pawh chu min rawn tih sak dawn a. Tin, MRB a hna dilnaah hian Mizo te kan tling thei lova, vai kan phak lo riau mai a, a tlingate an awm tha duh mang si lova. ‘Mizo te kan luh ve theihna turin *special recruitment rules* hranpa min siam sak rawh u’ kan ti a, kan dil bawk a. Chu pawh chu min rawn tihsak mek a ni.

Tin, CSR pawh hi an inhawng hle mai a, hei tlem tlem chu eng emaw kan ti tan a, CSR pawh hi a nachang kan hriat leh hriat lohah hian a innghat a, kan Minister te an inang vek lova. Chuvang chuan, ‘Chief Minister Office ah hian centralize ila, heta tang hian a sem sawm dan te ngaihtuah ila, kan chhawr tangkai thei ang a’ tih te kan ngaihtuah a ni. Pu Speaker, nichinah khan ‘Delhi lama tlatlum’ tih te kha kan han sawi a, a inthlahrun awm khawp mai a. Khangte kha min han tihsak ve te chu a ni a.

Chubakah chuan, hei, SASCI ah hianin crore 275 min rawn pe leh tawh a, an hmanhmawh khawp mai a. Hei, kan han peih hram a, Chief Secretary te nen, chhun chawlhah khan kan han buaipui a. Hetah hianin central jail leh district jail 7 sak thatna tur crore 55 leh Aizawl Water Supply Construction, hei hi crore 16.50 a ni a. Tichuan, Lunglei Water Supply Scheme tur crore 55.70 leh Aizawl Water Supply Scheme tur crore 47.80 a ni bawk a. Tin, zirtirtu quarter hi kan ngai pawimawh a keini chuan; kan sawi thin a. Hmun hrang hrangah zirtirtu quarter sakna tur crore 31.50 kan dah a. Tin, Industrial Institute ITI Aizawl tihchangtlun a ngai a, crore 25 kan dah bawk a; Tuirial 60 Mega Watt atan crore 28 kan dah bawk a. Tin, Govt. Residential Quarter Type 5 leh 6 hi tunah hian kan inchan lo lutuk a, kan MLA te pawh kan pe thei lova. Chuvang chuan, hemi atan hian crore 15.44 hi chu i dah teh ang kan ti a, kan dah bawk a, hei hi tun hnaia kan han tihngal tur a ni.

Keini hi chuan Delhi lama tlaktlum kha kan tum hranpa lova. Amaherawhchu, Pathianah kan innghat a ni, Delhi ah ni lovin. A ram leh a felna zawng hmasa turin kan Pathian-in min ti a, a ram leh a felna kan zawn hmasak chuan, kan mamawh dang zawng zawng mi pek belh a tiam a, vawiinah hian min pek belh mek niin kan hria a. ‘*Chakna ni lovin, thiltihtheihna ni lovin, ka thlarau zawkin le*’ tih kha tunah hian a takin, chak lo chung chungin hman ve kan tum mek a ni.

Tin, kawng leh lamah chuan hei kan revenue receive a lo pung hle a, a lawmawm a; Social Service Sector ah te kan dah tam thei ta viau mai a. Khang kan sum harsatna zawng zawngin min delh chung khan Social Service ah khan crore 400 chuanguin kan dah thei a, Economic Sector ah crore 400 chuang, Tichuan, development expenditure hrim hrimah hian kan budget pumpuia 57% chuang kan dah thei a ni; 57.22% a ni a. Chu chu, ‘helai hi a tlem; helai hi a tlem’ kan han ti takna a, kan pawisa neih chhun chhunah hian development expenditure tur hi hmun zau tak kan chan tir a. Tin, kan

fiscal deficit, ‘3% hi chu pel suh u aw’ min tih ngawih ngawih thin kha a ni a, sorkar hmasa ten an zawm phak ngai lo reng reng a, an bawhchhe reng a. Tun sorkar kal ta khan 4.73 GSD-a pein, chu chu an fiscal deficit a ni a. 4.73 atangin, a kum khatnaah keini chu 2.84 ah kan tlathla nghal dawn a; hei hi achievement ropui tak a ni. Central-in ‘3% pel suh u’ an tih kha, kan pel dawn lo nghal a ni.

Tin, Revenue Surplus kan la nei thei bawk a, kan GSDP growth rate hi 11% in a pung dawn bawk a. Tin, ‘pawisa chuti, khati’ kan ti kan ti nain, development atana kan dah hi a thahnem khawp mai. Pu Speaker, capital outlay hi (Annual Financial Statement tawplam kha lo en ula) sorkar hmasa khan 2023-24 ah crore 1,696.67 a dah a, keini hian crore 1,953.75 kan dah a; crore 257 in kan dah tam a ni, he lai capital outlay ah pawh hian. Hei hi development kan thawhna tak tak tur a ni a, chu chu, ‘eng sorkar nge kan nih; engtinge hna an thawh dawn’ tih min tehna tur a ni. Tin, kan GSDP hi crore 8,681 in tihpun chhoh kan tum bawk a ni.

Tin, kan Village Council te chungchang hi han sawi ila. 15<sup>th</sup> Finance Commission khan RLB grants hi a pe a, kum 2021-22 financial year chhunga kan installment kha crore 34.50 a ni. Chu chu sorkar hmasa khan cheng khatmah a la pe lova, tunah hian an la dawng thei lo a ni; a rei tawh khawp mai. Tichuan, 2022-23, heta 1<sup>st</sup> Installment crore 35.50 pawh hi cheng khat mah la pek a ni lova. Nikum (tun kal lai) ami hi chu sawi thu a awm lova, avaiin dawn loh vek a ni. A vaiin kum thum ang deuhthaw anih chu. Chu chu Finance Commission ina min pek tawh si, kan VC khaw tinte ta tur pek theih lova lo awm a ni a, hei hi ‘a dik lo e’ kan ti a, thei tawpin hma kan han la a. Kan Finance officer te pawh hemi buaipui tur hian, ‘LAD lampang lo va pui teh u’ tiin, kan hawh tir a. Tichuan, tunah hian heng hi kan phih chhuak thei dawn chho tannin kan inhria a, kan lawm hle a ni.

Pu Speaker, a tawp berah chuan lawmthu kan sawi tliar tliar a; kan lawm tlang a; project monitoring committee chungchangah te kan zavaiin lawmthu kan sawi tlang a. Tin, CBI hnena general consent kan han pe te pawh kan zavaiin lawmawm kan ti tlang a. Eiru lo tur sorkar a lo din tak avangin helaiah hian eiruk a bo theihna tura tih theih ang ang han tih nghal a ni a. Tin, kan work culture a lo danglama, a lo thata, hunte kan vawn dik theihna tura biometric attendance system kan han dah ta te pawh hi kan zavaiin tha kan ti tlang kha a ni a, a lawmawm khawp mai. Hetah hian kan thawktute kan official-te pawh lawmthu ka hrilh duh a. Tha takin min tawiawm a, tha takin, punctual takin tun atang hian hna an thawk a. A tuk-khatna mai atangin an hunte an hmang dik nghal thei hi kan lawm hle a.

Tin, ruang phurhna tur sorkarin a buatsaih hi tha kan ti tlang hle bawk a ni a. Hei hian ‘mitthite chauh ni lo, damlo te pawh huap rawh se’ tih kha kan ngaipawimawh hlawmin ka hria a, i ding leh i vei lam atangin. A guideline-ah a Minister-in a lo hria ang a, a

rawn thun ngei turah ngai ila. A guideline erawh chu fimkhur a ngai hle ang a, kan Opposition lam atangte pawh hian min duanpui thei sela, ti ho ila a that viau ka ring a.

Tin, *Old Age Pension* te a lo pung ta hi kan zavaiin kan lawm a ni. Kan tawngkam lar tak chu – “he budget hi budget dangdai tak a ni; thil thar hmuh tur a tam” tih kha kan comment dan tlangpui a ni a. Chuvang chuan, tunhmaa la awm ngai lote a lo awm a, kan sorkar hnathawkte pawh hian helaiah hian, ‘hei hi chu kan tih dan a ni lo’ tih emaw, ‘tunhmain hetiang kan ti ngai lo’ tih emaw, a harsatna lampang chhut lova, a tih theih dan kawng - positive mindset min putpui a. He sorkar tharin sum leh pai eng emaw a zuk haichhuahin emaw, project a kalpuiin emaw khang ang reng rengah khan kan la tawn ngai loh thilte a lo nih pawhin kan official ten theih tawpa he mipui-sorkar hi min thawhpui turin ka han ngen bawk a.

Tichuan, Pathian leh mipui hmaa kan thutiamah kan zavaia kan dina, Pu Speaker, i vei lama mite pawhin vawiina an sawi anga, theihtawpa kan ram tana thawh ho an inhuamna an sawiah khan an din bawk chuan, kan sum tlemte hmang hian ropui takin hna kan thawh theih ka ring a. Tin, mimal taka min lawmpuitute chungah mimal angin lawmthu ka sawi a ni. Kan lo tei rei ve tawh a, a tawp a tawpah chuan kan han ni ve ta ngawt chu a ni a, mi in lawmpui vekin ka hria a, in zavai chungah mimal takin lawmthu ka sawi a.

A tawpnaah chuan, Dampa Bialtu, member zahawm tak, (a awm lo a ni maw?) ani tawngkam hmang khan tihtawp ka duh a ni a. He budget hi a tlangval laia love letter thlum tak a hmuh ang nen khan a tehkhin a, kha kha ka lo chhinchhiah ran a. Chuvang chuan, kan Dampa Bialtu-in a tlangval laia love letter a dawn thin, khami ang mai nena a rawn tehkhin avang khan a lawmawm leh zualin ka hria a. Vawiinah hian hlim taka pass ho turin ka sawm che u a ni e. Ka lawm e.

**HON. SPEAKER** : A lawmawm e. Tun budget pharh tak chu kan phurpui a ni ang e; a pharhtu pawhin darkar chuang a hmang a, mahse a ninawm lo hle mai. Tin, ka vei lam panga thute pawh a tlangpui thuin an sawi dan beiseina sang tak nen, fel lo lai te chu awm thei a ni. Amaherawhchu, ‘kan tang ho ang a, kan bei chho ang chu’ tih kha a tlangpuia ka lo khai khawm dan a ni a; a ropui tak zet zet a ni.

Sawi tak ang khan members 28-in kan sawi a, khang sawi tura ding zingah khan hun hmang thiam ber chu, Pu K. Hrahmo, Palak Bialtu kha a ni a; chu aia hmang thiam chu an la awm a. Kan Leader khan a sawi a, Dampa Bialtu, Member zahawm tak Pu Rintluanga Sailo khan West Phaileng-a ruihtheih thil leh eng emaw thil fel lo rawn lut thin a ven nan khulaia gate dah kha a vei em em mai a, awm ngei se tih pawh a duh a. A vei tlat mai a, a muthmunah te pawh a ngaihtuah chhuak zauh zauh thin niawm takin an sawi a. Khati taka vei kha vawiin khan a bula thu hnenah khan, “min lo sawi kep



rawh” a ti a; kha khan hun a la hmang tangkai thiam zawk a, a champion a ni, vawiin a hun hmang tangkai thiamah chuan.

A lawmawm e. Tikhan, vawiina kan business chu kan zo ta a, naktuk March, Ni 6, 2024 (Nilaini) chawhma 10:30 ah kan thukhawm leh dawn nia.

*The sitting is adjourned. (5:15 PM)*